



1939-2014

*Masadangtet
Temeim*





The logo for the Kohima Ao Baptist Church 75th Jubilee is positioned above the title. It features a grey cross at the top, with a circular emblem below it containing a red cross and the text 'KOHIMA AO BAPTIST CHURCH'. To the right of the emblem are three wavy, colorful lines in red, yellow, and green.

KABA KÜM **75** JUBILEE
Masadangtet Temeim

Published by: JUBILEE PLANNING & SOUVENIR COMMITTEE

on behalf of Kohima Ao Baptist Church

© Kohima Ao Baptist Church

Photos : Moro Lcr, Lima Lcr, Wadener

Design & layout -  **artworks** NAGALAND

*“Amen, temoatsü, sentsüwangshi, shisatsü, teniüngsang,
tetushi, ain aser tashi teti tatem maka asen
Tsiüngrem dang sang! Amen”*

Jungkai Adok 7:12

Kohima
February 12, 1989

Ao Baptist Arogo, Kohima
Platinum Jubilee nung atener ajak dangi,

San nuker ajanga.

Tsungremer kibong nung zungsem tajungtem,

2014 kum nenok Platinum Jubilee amongdang, onok ajaki
Yisu Khrista tenung nung, temoatsu tulu Tsungrem nungi liang
ta Salam metetdaksur.

Onok tendak Arogo hon Jubilee 1989 February 10-12 tashi,
PAI INYAKBA TESUNG MANGTSU MAPATEM ASOSHI KIBUBA NUNG
PELAANG, ta omen lateter,

- I. Rev. T. Subong, Pastor mapang nung,
- II. S. C. Jamir, Nagaland Chief Minister tendak,
- III. Kum 50 tejaklen Arogo tenzucker tebur ~~XXXX~~ 10 rongnung
2 tensema,
- IV. Tangalen Ao Arogo 22 nungi arusema,
- V. Arogo-i yariba Mission School, Baregaon nungi tanur
aser tesayur 10 tensema,
- VI. Kohima Town Arogotem nungi tensema aser shilem agia,
- VII. Tenla kidang masem, temeket nung ki suloker, nisung
3317 shi ken sentep nung atenshia,
Kanga longsotepa, tsungsang tajung nung, kecha mepetmesu
madoki, alima tensa sungjema lia, mongogo. Jubilee
programme aser ken kakat, aser Arogo tetenzuk kum 50
otsu kakat enoksemtsur.

-maneni-



KABA KUM 75 JUBILEE

tapak 2

Jubilee amongnu, Arogo aser atenertem ajaki item
resolutiontem sarasadema latet:

1. Arogo Hon Jubilee Nungshi, Kohima nung ali tesadem ka alia,
JUBILEE CENTRE ta jar, yangji Tsungremi tenyaba mapa
Payimli zuintsu, Arogo aintsu aser nuburtem ajungtsu
mapatem Tsungrem dang asungdanga inyaktsu lemtet.
2. Missionary Arogo ka akumtsu sarasadema lemtetba 1978 kum
nungi, tanu, hon Jubilee amongnu tashi Tsungremi Pa
Yimli asoshi iba Arogo amshiba aser moatsuba tejangja
meteta, Tsungremi mulungra, ano tali temulungtetba aser
tejangraba den iba wadang nung maneni inyaktsu Arogo-i
lemteter.
3. Naga lima nutsung yongsuk 100 shia 85 Khristan lia Hon
Jubilee amonger. Aji saka, Nagaland nung loktiliba,
sobaliba, yimtenyimli aser yimsusuba maparen nung Khristan
yimyaliro tapet majiteter. Anungji, kija aser kibong
shiai tamang agi, Laishiba tuyuba ama aliba ajanga,
item maparen yimyaliro tajungba kumdaktsutsu merangdi
ta lemteter.

Tsungrem shiba tetenzuk aser Tatem, Pa temulung
lemtetba asen KIBUBA lir. Kum 25 tsungda tajung inyaktetba
ajak, Pa taochi agi lir. Tamakok kar alua lishia, itemji
nisung tashi maet agi lir. Nenok rongnung karbo Hon jubilee
nung tensemogo sudi. Onok karbo ali ajanga or kotak nung
alitsu; aser onoki nenok den Tanela nung tensemer.
Platinum Jubilee amongdang, nenoki tesuiba reprangshia,
tarutsu nukla tesadem aser Tejangja Tsungrem nungi ngua,
Asen Kumtetdakba Yisu Khrista sendong maneni bener nenoki
aotsu, sarasadeja aser temoatsu meshija nungloktsur.

- maneni -

tapak 3

Mapang agi kum 25 tetsungda asenok rongnung aitdaksuogo.
Saka, kodang asen Kumttdakba Yisu Khrista tanaben arudir,
asenok ajak kasa putupur kuma, Pa den kulemi Kotak nung
alitsu teyimla nung ibai zulus.

Tebu Tsungrem temeim, Techir Yisu Khrista Taochi, aser
Tanela Temeshi tatenba nenok den teti liangma.

AMEN.

AROGO ASER HON JUBILEE NUNG
ATENER AJAK TENUNG NUNG,

T. Subong 12/2/89
(Rev. T. Subong)
Pastor, Ao Baptist Arogo
Kohima.

I. Panger 12/2/89
(I. Panger)
Chairman, Hon Jubilee Committee.

(Iba shite tenla kidang, ajaki ngua aser kuli sua,
February 12 aonung sign asu)



KABA Golden Jubilee sentong tempangba aonung,
Platinum Jubilee monger dangi züluba shiti telok dang zünga sayur

AO BAPTIST AROGO, KOHIMA
Hon Jubilee 1989 February 10-12 nung amongdang latetba
RESOLUTION tem:

1. Arogo Hon Jubilee Nungshi, Kohima nung ali tesadem ka alia, JUBILEE CENTRE ta jar, yangji, Tsungremi tenyaba mapa, pa yimli zuintsu, Arogo aintsu, aser nuburtem ajungtsu mapatem Tsungrem dang asungdanga inyaktsu lemtet.

2. Missionary Arogo ka akumtsu sarasadema lemtetba ~~ama~~ 1978 kum nungi Tanu, Hon Jubilee amongnu tashi Tsungremi pa yimli asoshi iba Arogo amshiba aser moatsuba tejangja meteta, Tsungremi mulungra, ano tali temulungtetba aser tejangraba den iba wadang nung maneni inyaktsu Arogo lemteter.

3. Naga lima nutsung yongsuk 100 shia 85 Khristan lia Hon Jubilee amonger. Aji saka, wagaland nung loktiliba, sobaliba, yimtenyimli aser yimsusuba maparen nung Khristan ymyaliro tapet majiteter. Anungji kija aser kibong shiai tamang agi, Laishibai tuyuba ama aliba ajanga, item maparen yimyaliro tajungba kumdaktsutsu merangdi ta lemteter.

Resolution 1-ji Arogo general meeting December 10, 1988 nu amendang agizuk. Resolution 2 aser 3-ji Deacon Board-i February 11 nu amendang agizuk.

Item mulungteta latetbatem, mapa kuma inyaka ojettsu, asen Arogo dang Tsungremi aochiangma.

Resolution Committee Zungsemtem:

1. Rev. T. Subong, Pastor (Convenor) Molungyimsen
2. Kiremwati, Waromung.
3. T. Masa, Molungkimong
4. Imtilepden, Deacon, Aliba
5. Dr. Taka, Deacon, Longsa
6. Dr. N. Moa, Mopungchukit
7. Mrs. Yashila, Asso. Pastor, Ungma
8. Mrs. Nokpangla, Longjang
9. Mrs. Ainala, Longkhum

Dated Kohima the
12th, Feb. 1989.





KOHIMA AO BAPTIST AROGO



“Tamang, Tenzükba Aser Tenyaba”

NÜKJIDONG

- Tamangertem telongjem aser Tsüngrem külemba
- Arogo nung tanela anir aruba aser mesüba
- Arogo nung züngsem shia Khrista nung teintet küma indaktsüba
- Ajaklen osang tajung sayutsüngia samaba tanelatem anir arutsü
- Ajaklen Tsüngrem yimli yangerba mapatem nung shilem agitsü
- Lai tesayuba nung amendaker Baptist tamangba nung Arogo anitsü

Keta Alibatem

● KABA Golden Jubilee Mongertem Nungi Platinum Jubilee Mongertem Dangi Shiti	- <i>ii</i>
● KABA Golden Jubilee Resolution	- <i>iv</i>
● KABA 75 Jubilee Omen Ken	- <i>viii</i>
● Jili O	- <i>1</i>
● Okila	- <i>3</i>
● Kohima	- <i>9</i>
● Tsüngrem Temeimi Ya Tashi Anir Aruogo	- <i>11</i>
● Salem Osangtem	- <i>16</i>
● Menungra Bilemteter	- <i>29</i>
● Kohima Ao Baptist Arogo Otsü	
- Tapu 1	
<i>Mezüng Küm 25 Tain Arogo (1939-1964)</i>	- <i>35</i>
- Tapu 2	
<i>Tanabuba Küm 25 Tain Arogo (1965-1989)</i>	- <i>41</i>





- Tapu 3	
<i>Tasembuba Küm 25 Tain Arogo (1990-2014)</i>	- 45
- Tapu 4	
<i>Mission And Evangelism Ministry</i>	- 73
- Tapu 5	
<i>Women Ministry</i>	- 97
- Tapu 6	
<i>Youth Ministry</i>	- 109
- Tapu 7	
<i>Christian Education Ministry</i>	- 123
- Tapu 8	
<i>Music Ministry</i>	- 133
• Baptist Tamang Tenzükba Aser	
Naga Lima Atongba Otsü Tatsü Agi	- 149
• Tsüngremer Tesüngmangtsü Temeim	- 161
• 75 Jubilee Sülen Kohima Ao Baptist Arogo	- 167



TSÜNGREM NE TENÜNG ASANGER KABA 75 YEARS CELEBRATION *Theme Song*

Joyfully with feeling

Temjen Aier, 2014

1. Ki - bu ba te - me - im te-süng-mang-tsü, ma - sa - dang - tet ta - lu - bo -
2. Ne - bur tem - i Ne te-nüng a - sang - er, o - zü Küm - tet-dak - ba Tsüng-

sa, Pu-tu a - jak nung Ne'mu lung lem tet - ba ta-tem ma - ka, Ne tsüng-
rem, Ta-ma - ren Chu - ba o-nok - i Ne 'nüng te - ti mo - a - tsür, Sen-tsü -





dang o - nok - i a - pu - dak - er, Ne 'nüng - sangken o-nok-i a - ten - er, Na
wang - shi ko-rang Ne nem sem-tsür, Te - pe - la tu-lu a - gi Na tu-shir, Na

te - me-shi Tsüng - rem, Hal - li - lu-ya, Hal-li lu -ya, o-nok - i Na kü-lem - er.
te - ti Chu-ba - tsü, Hal - li - lu-ya, Hal-li lu -ya, Ne te - nüng a-jung-ket - er.



Fili O

Tamasa asen Kibuba Khrista Yisu shiba meimchir ajak temenen nungi alangzüksü, tematiba Kotak menden toktsür iba alimai alu, Kangki nung taküm tenla, asü aser leper nung arem. Saka tasemnü temenen, tasüba ain ajak madak takok ngur shia aru. Kotaki atu, tanaben arutsü. Pa marutsüngda alima tatem tashi oa, meimchir ajak netsüng kümdaktsütsü tashi ain ajak Pa senti zü agi alangzükba Arogo nem agütsü Pa tenüng nung salem.

Ao lima nungi pilar Naga lima yimtiba Kohima nung Ao Baptist arogo amenoker küm 75 tashi Tsüngrem temeim aser tawapangba küpok tanela, tamang, nungloktsüba mapa tulu aser taneptsüba sentong anogo shia renloka tain küma anir aruba asoshi Tsüngrem tenüng sangdi.

Jatetba Israel kin, arem mein nung Arogo ainba nung alizüng ka tongtetba shia longzüng azüng. Aser Mitkar sapang nungi tarulen, tang noktaka aliba aser tejakleni jaja aotsü lenmang penzü. Kohima Ao Baptist Arogo küm 75 ajungba longzüng nung nokdaker penzütsü mapang tajung bener arutsüba atema Pa dang pelar.

Taküm aliba ajak ainer, ainba anenra tasütsü tenzüker. Khristar Arogo yabo tanen maka yinjen aintsü Tsüngrem Oi melar. Anungji iba longzüng nungi penzüa tamang, tanela jenjang aser alima renloka aoba den külemi jangyu medema maneni tejakleni aotsü tali kümkümshidi.



Jubilee amungdang asenoki aiben memeteti nisunger kunang aser tenzükbaji teyungtsü südaktsür amonger. Saka asen arogo 75 abensaba Jubilee yabo Tsüngrem temeim teyungtsü südaktsütsü tangatetba nung, Tsüngremi inyakba, aniba aser moatsüba teyungtsü sütaktsür mongtettsü kanga meranger. Iba yongji Arogo küm neter pongu junga arudang, KABA ministry balala nung nübur aikati pei tajungtiba sempet tenlaa Tsüngrem sentsüwangshi asoshi inyakogo. Arogo record nung tenzükba aser küm tatemzünga yutsüba dak alaka, iba kakat nung shinga tenüng teta mezülusemer, saka nenok mapa tajungtem KABA-i kodanga mamatsü.

Iba kakat züludang Tsüngremi Kohima Ao Baptist Arogo aniba ya kangasa balaka ta maparen ajak agi sayur. Anungji Pa sentong tuluba inyaktettsü, amangbapur shia Tanela aser tamang nung teintet küma indaktsütsü, tanü dangtsü nükjidadong nung züluogo.

Yimtsüng Arogotem ya limapur temulung meyipba Khrista agizüka baptiba nung amendaker tenzüker. Saka KABA yabo Arogo aser yimtsüng balala nungi tamanger Sorkar mapa inyaktsü aruba neburtem teponglangteter tenzük. Asen Ao lima nungi pilar Ao arogo tentetba ya ibai mezüngbuba lir.

Iba kakat ya pei pei department nung teinyakdak tenzükertemi zülu aser arogo rangpen otsüji committee yaritepba züluogo. Iba den Article balala tenzükertemi zülua yutsüogo.

Iba kakat züludang shirnokisa shisatsü agütsü, tatalokba otsü ashiba agi kanga yaritepogo aser putu balala nung kakat ken o zülurtemi otsü terajem bendena yutsüba aika bendena agiogo parnok ajak dang pelar.

Tsüngremi tazünger ajak moajang.

KABA 75 Jubilee
Souvenir Committee

Masadangtet Temeim / 2

Okila

Tenem nisung tekolak bushiba kin dangi Tsüngremer tesüngmangtsü temeim osangtajung kishi lapokba.



India lima nung aliba neburtem ya tamangba yimsü balala aika agizüka amangba nübur masü, saka yimsü ka ana amangertem dang liasü. Aser parnoki amangba yimsüji kanga tejen yimsü. Iba nung tera yangja yanger aliba neburtem liasü. Yisu netsüng Thomas, Tsüngremer tesüngmangtsü temeim osangtajung bener mezüng putu (1st century AD) nung asen India lima anüolentip nung aliba kintem dangi aru. Koba tanü tashi pa tsüngnep mesamai lir. Ibaji asen India nung aliba nüburtem dangi **mezüngbuba** Tsüngremer osangtajung kishi lapoktsübaji liasü.

Kodang East-India Company ya India lima nung amenok, ibai ajanga *"Ammang nung mena alirtemi tesangwa tulu ka angu, aser tasür lima tasüba akhüm nung mena alir dangi tesangwa adok."* Iba maparen tulu ajanga Tsüngremer tesüngmangtsü taochi osangtajung sangtongba nung terenlok tulu ka bener arutsüba angur. Tetenzük nungi company den Chaplain dena yok, aser parnoki idakji mapa inyaker tamanger aser mamangertem kümzüksü nükjitong yur maparen ajak inyak. Anungji asen lima nung Tsüngremer osangtajung sangtongba kishi **tanabuba** lapoktsübaji ibaji liasü.

Alima yina aodang Companyji India yimten nung tashi tuluba aküm. Item teyaritep ajanga British Missionary William Carey 1761 nungbo Calcutta tonga arutet. Pai Tsüngremer osangtajung metsüjang bener arua proktsü tejangraba tulu liasü. Saka tensa tatsütepba tulu ajanga ibaji proktsü memela nung, Danish yimli teyari ajanga Serampore nung mission mapaji amenoker tenzüka ao. Tsüngremer taochi aser temeim ola tulu ammag lima samaba nüburtem jenti alangzüksü meranga inyak. Timtem, takoksa, tasüba, ayatsüra aser rishikangshi jenti ajuru. Saka tanen maka merangjen meranga inyakbayong 1832



küm tashi nungbo Bangali aser Assamese oshi tensema oshi 40 nung Laishiba kaketter meyipzükadoker liasü. Ibaji osangtajung kishi **tasembuba** lapoktsübaji liasü.

British nunger yimsüsüba küpok India lima nung Khrista osangtajung tenokdangba makai sangtonga mapa tulu inyakba angashia nūburtem aikati taküm, rongsen, nūbu Tsüngrem asoshi tenlatsü mulungtet. Item rongnung Adoniram Judson aser Samuel Newoell parnoki anir nisung ishika tzüyim tulu ajanga Khristai dang agütsütetba Tekümtet osangtajung bener India limai 1812 June 17 nü Calcutta tonga aru. Parnoki mapa inyaka aotsü lenmang asadangba mapang osangtajung kaji India nunger asoshi shiri koba tamangba yimsü amangner tenokdangba mali ta Charter Act 1813 ajanga sangdong. Ibaji Tsüngremer osangtajung sangtongtsü lapoktsüba kishi **pezübuba** liasü. Anungji arla tesatempa nung nūbur timba tongteta tenyaba mapa inyaktettsü nukjitong nung Bombay, Amednagar aser Assam tashi alua Mission station tenzük.

Iba mapang yangpong nung America lima arogotem Tsüngremer tesemdangba temoatsü tulu ajanga Arogo, kija aser kibong rangben nung Tanelar asentenshi tulu adok. Parnoki pei taküm bushi aser temenen nangzüka taküm tanaben asoba angatetbapur jentisa adok. Iba mapang amangbapurtemi Tsüngrem den tatemzükba tulu ka azüngashi aser ashi " Onok chirnurtem, onok akaba rongsen, onok taküm aser shisatsü ajak Nü nem agütsüdi. Nai onok nem lushi agüjang. Kechiyong alima rangpenji Nü Mission field lir" ta Tsüngrem den azüngashi. Anungji Tsüngremi alima ajaki oa osangtajung khulisütsü alu lushi agütsü. American Missionarytemi metongtetba alinük ishika dang lir ta tanübo parnoki khuli süteter.

Shitakba American Baptist Mission India aser Burmai aruba nükjitongji, Khamti anasa aliba Shan nung station yanglur, iba nungjagi China limai osangtajung bener aotsü ta tangatetba liasü. Saka tenem nung aliba nūburtem, shirnok rara nung nokinketer kin liasü, parnoki aiben tenokdangba agütsü. Iba den Burma nungertemi par lima nungi China limai aitsü memela. Ibaji Tsüngremer osangtajung sangtongtsü lapoktsüba kishi **pungububa** liasü. Aser iba kishi yabo asen Naga kintem dangi osangtajung aittsü lapoktsüba ta angateter.

1839 küm Khamti nungertemi British sepoy alidak Sadiya campji maktok aser British sepoy 80 den Political Advisor Col. White tena tepset. British sepoytemi Khamti temeküt nung aliba yim aika maktok. Ibayongji yimjung ajak sama aser Mission mapa inyaktsü mesademba dang masü senzü senpongtsü kanga tasak aküm. Tenem lima nung alir dangi osangtajung bener aotsüji kanga tasak kümadok. Ibayongji Missionary aika pei limai meyipa oadok.

Iba ama tatentep tia ka nung, Tsüngremji taküm aliba ta shisang shisanga metettsü mechi American Missionary Rev. Dr. Edward Winter Clark 1869 nung Sibsagar Mission centre tonga aru. Pa Februarti 25, 1830, New York state, North East Town nung aluyimer aser tepetzük kibong ka nung aso. Lanuwa kanga meranga Worcester Academy School nung zünga intet aser 1857 küm Brown University nungi Greek oshi nung Honours ngua First division nung Graduate asü. Maneni Newton Theological College, aser Rochester Seminary nung Theological study renem. 1859 June 30 nung Logansport Arogo nung sannüker mapa inyaka alidang Ordain asü. Pai tammang limai Missionary aotsü tejangraba aser tajaba angatet nung sannüker mapa yutsür 1868 October 20 nü America nungi Assam lima bushia rong nung apuso aser 1869 March 30 nung Sibsagar Mission centre tonga aru. Pa ya Tsüngrem nem bendanga agüja tanaben asoba taküm, aser Tsüngremi kanga temulung achiba tenzüker ka liasü.

Burma aser Assam temeket lima Mission züina aotsü mesademi kümdaktsübaji, Naga kin asoshi Tsüngremer nükjitung liasü ta angatettsüa takoktsü. Yamaji American missionarytem nükjitung Burma lima nung amenoker China limai osangtajung bener aotsü matalokba dang masü, Assam lima nung Tsüngremer osang tajung züina aotsü ano alurutsü mapang matong ta angateta parnok nükjitung melen. Tsüngrem dang kanga bendanga agüja sarasadem. Tsüngremi Pa shitakba sentong parnok nem agütsübaji, tenem nisung shirnok tekolak bushiba kin lir, parnok asoshi Tsüngremer osangtajungji ilonga inyaktsü nüngdak ta angatetdaktsü. Ibaji Tsüngremer tesüngmangtsü temeim osangtajung kishi **terokbuba** lapoktsübaji liasü.



1872 kûm Naga tenem nung mezûngbuba Tsûngremer arogo amenoker kûm 67 (1939) arudang Ao lima limapur jenti liaka yimtsûng ajak nung Arogo amenteter liasû. Khrista osangtajung ajanga konang tetushi asoshi tekolak bushiba, tetsûbutsû, leptep tsûngtep, yim o yim anemtepba aser kin balala nok nû sobaliba ajak anendaktsûbaji Naga nunger tongtibangsa asen Ao Kin asoshi Tsûngremi kangasa meimba mapa ta angatetdi.

1939 tashi nung Pei yimtsûng toktsûr bendanglima balalai oa kaketriju nung shisaliok bushitsûji atsûa-marui liasû. Kangrangi nashi tsûngnep ka nung mener alima ajak pa ket nung lir ama bilemba metem pei yimtsûng sûngkûmshi tangatetbaji kangasa tulu ama bilema litep. Tamanger sûaka iba mapang pei yimtsûng nungi dang masû, Ao lima atena oagi Kohima nung Tsûngremer Ao arogo yangerbaji kangasa shisa taka, tasû tait aser tarutsû nûkla tulu akaba terajem mapa ta angateter. Par tamang mapa tulu angateta Tsûngrem dang pelar aser par nem akûm tulu agûtsûr.

Tsûngremibo asen Arogo aser asenok shia nem Pa tenyaba mapa tulu inyaktsû yimliji agûtsûogo. Asen jakdang ano Tsûngremer tesûngmangtsû temeim osangtajung aitsû makokba shipanger aliba kishi aika lir. Ibai asen nem nungloktsûba tenyaba mapa tuluji masûa ma? Item kishitem lapokba sabiji shirnok ket nung ali? Kohima Ao Baptist Arogoji Missionary Arogo sûra shibai takûm, rongsen, nûktsû tenlatsû? Shiba aotsû?

Kûm 75 tashi Kohima Ao Baptist Arogo Tsûngremer tesûngmangtsû temeim agi anir aruba asadangra shibai asadangtettsû? Ano asenoki tenzûkba maparenji bushidangra tuluka inyak amai, saka Kibur mulung chidar ma? Ano khen bendanga agûja tashi tasen nung wadang tuluba dangi apusodi.



REV. I. BENDANGMEREN

Associate Pastor

*Chairman, KABA 75 Jubilee Planning &
Souvenir Committee*

Masadangtet Temeim/ 6





Photo - Khrualalie

Kohima

Küm noklang aika ogo, British nunger, tobur tajung Naga limai marudang, 'Kewhira' ta sür yim ka liasü. Iba yimji tang Kohima aliba tesem ya lir. Iba yim akümsang tenüngji 'Whinuo' liasü aser pa tenüng nungi agizüka par yim 'Kewhira' ta aja. Ya ajaki agizüktetba Angami nunger nüngtugu otsü ka lir. Ano külen nungi reprangdangra Kohima (Koo'hima) ta agütsüba ya British nungeri iba tesem dang ajaba olong ana nungi agiteta agütsüba, Tenyidie oshi agi iba tesem dang 'Kewhira', koba tetezü Naro ponga aliba tesem. Ano iba tesem dangsa 'Thigoma' tetezü tenem agi mekütpanga aliba lenden. Anungji Kewhira aser Thigoma nungi agiteta Kohima ta jatet, koba tenüng tetezü "Tenemtsüng nung naro ponga aliba tesem". (*Kohima.nic.in webside*)

Kohima ya tzü mopung ajungba dang masü saka, nübur azüoktettsüsa alima teyongtsü. Meta ajakleni karaa awashi-sütettsüsa aser shishilembaba teyongtsü kümdaktsübaji Samaguting nungi Manipuri aoba lenmang Kohima ajanga aor. Anungji Kohima ya headquarter asütsü shimtet ta British nunger

Her Majesty's Secretary of State for India dangi züluba shiti No. 109, dated 18th June 1877 nung shia lir. Iba ya Viceroy aser Governor Generaltem tematiba senden nung lemtet ta ashir.

1947 küm India nujiso mangu tashi, Naga Hills nung Kohima dak alaka tanga town maliasü. Kohima ya Naga hills Headquarter kümer küm 70 shi oaka, British nungeri terenlok mapa aikabo meinyak. Anungji, sorkar Office aser ki kar dak alaka terenlok mali asü. December 1. 1963 nung Nagaland ya India Union nung state ka ta sangdonger külenang terenlok mapatem inyaktsü tenzük aser tuluba küma ao.

April 1944, alima tanabuba rara mapang, kodang Japan nungeri Kohima amak, iba mapang nung alima ajungai iba town meteta aküm. Iba tesem nung Japan nunger aser Allied Forces tsüngda tesashitiba rara. Anungji Japan nunger aser Allied forces tsüngda tongbang chitepdak



Kohima, 1959



tongdi tesem ka aküm. Iba tongbang anogo 64 tashi maneni rarajen rara. Iba rara indang O ratet ka yamai shisemer "Alima tanabuba rara nung azü teyimtiba tokshiba, tsükchirtem tejak O tejak na chitep, saka tesüleni matsüngi maneni raraba tongbangji ibai liasü". Tongbang nung asürtem tenüng Kohima War Cemetery nung kanga mera keta zülua angutsü. Alima ajaklen nungi shirnoki Kohima semdanger iba nüngtogo Kohima War cemetery arua repranger. Iba ya Common Wealth War Grave Commissioni yanglu aser tang tashi parnoki aja-ayanger.

Kohima ya tzüym nungi metre 1,444.12 ajungketa aliba yimti ka. Iba ya tenem lima asünung raliwali ajak gari dak alaka tanga lenmang mali. Saka tekaratiba nung nüngdak ajak chilajidongtettsü super highway amenoka lir. Idaki National Informatics Centre, computer institutes aser internet iafes teperi lapoka lir. Ibai ajanga Kohima yimti ya information and technology nung tejaklen lir ta angateter. Tangar lima cellular phone (mobile phone) amshiba angashidang pungmang ama bilem, tangbo asenok asoshi asangsang kümogo. Naga lanurtem nem computer science aser information technology angazükdaktsütsü nükjidong nung India Sorkari Kohima nung Regional Institute of e-Learning and Information Technology lapoka lir. Ano alima shisaliok tanü putu den peta otettsü educational institutes tajung aika lapoka lanurtem shisatsü nung terenlok agütsür.

Nüburtem tanü libaliro nung tejakleni aodang, pei sobaliba mamatoktsü aser tera yanga wazüka ayutsü nükjidong nung Hornbill Festival koba kin ajak sobaliba wazüka ayutsü, benjongmong aser pei sobaliba sayudak, kin ajak meyokteper yim ka yanglua lir koba dang Kisama ta ajar. Ano State Museum 1970 küm yanglua idaki Naga nunger sobaliba taküm aser otsüla obula nungeri inyaktetba teka mapa balala metetdaktsütsü rizünga yuja aliba angur.

Iba ama yimti ka nung Kohima Ao Baptist Arogo amenoka Tsüngremer tenyaba mapa tulu inyaktsü moatsü. Tanü küm 75 abensadang bushidangra Tsüngremi tatem maka temeimi agi asenok meimogo ta angateter. Tsüngrem tenüng tali moajangma.

TSÜNGREM TEMEIM-I YA TASHI ANIR ARUOGO

Rev. M. Asangba Longkümer, Pastor, KABA



Temeim Platinum Jubilee mongertem, Tsüngremi iba ama mapang tajung moatsüba atema pa nem tenünsang tetushi agütsür. 1939 February ita nungi tenzüka Kohima yimti nung Aor kibong ter den kaket riju nung azünger kar tensema, Ao Khristan Telongjem ta jaa Mission Chapel nung sentep agia tenzük. Tekülemdak ki ka makai tesem balala nung telongjem sentep agia aruba otsü azüngdang menungraa bilemteter: Mission Chapel, Play Ground anasa army store ka, Naga Club ki, Assam Rifle ki ka, aser iba sülen 1956-57 mezüng KABA tenla ki Rs.5000 indoka yanglu. 1963-65 tanabuba tenla ki Rs.30,593 indoka yanglu. Iba kesa kiji 1970 küm tasembenbuba ulushia yanglushi. 1980-83 pezübenbuba tenla ki Rs. 25 lakhs indoka yanglu.

Yamaji küm neter pungu tsüngda, tenla ki aiben yanglushia aotsüsa akümba jagi asen arogo ya kanga karaa ainer ta angateter. Tanü asen arogoi inyakba indang tongmelang agi kar shisemner. Küm neter pungu ajungba den fellowship ajak nung tenla ki aser Pastor ki tajung lir. Main church pongubenbuba tang crore ter pungu estimate nung südaki, Merhulietsa fellowship crore



Tasembuba tenla ki, Assam Rifles ki ka nung



KABA KÜM 75 JUBILEE

asem dak tema estimate yanglua südaki, ano iba den Ministers' Hill nung sunday school cum staff quarter sen crore asem tema ki tesüdak lir. Fellowship kar dak alaka, tanüngba ajak nung tenla kidang masemba ajanga special Sunday nungbo anabenben tekülem sentep agia nüburtemi Tsüngrem külemer. Item ajak ya angudang Tsüngremi asen arogo kanga meimer aser anepalur ta angateta Tsüngrem tenüng asanger.

Mezüng arogo tenzükdang, membership sarutepa Pastor ita sen senpak pongu agüja tenzükba, neter pongu Jubilee kümba nüburtemi angateta Khristar arogo nung Tsüngrem meyong ter shilem pa terizügdaki bener arua agütsüba agi, küm shia sen crore teko dak tali moaja arur. Tang tashi nung toklang tenzüker metsür pezü, part time tenzüker ter pezü den arogo nung tenzüker tenzükla tem ajak agi noklang ti dak temai tenzükba nung shilem agia arudaki. Kibong ter-i arogo tenzükba, küm neter pungu tsüngda nung joko kibong meyrirjang asem noklang asem dak tema kümogo, aser baptiba züngsem meyrirjang ti noklang asem shi lir. Item ajak ya reprangdangra Tsüngrem temeimi aniba lir.

KABA ya missionary arogo ka asütsü Tsüngrem dang nangzükbama, tang tashi mission nung temulung agüja inyakdaki. Arogo nung general ministry den külemi department balala ajaki mission mapa nung rangloker pei akokba tashi meranga inyaka aor. Arogo küpok department itemi lir, aser item department ajak ya kesasa tongtimbang ta angateter. Mission, Women ministry, Youth ministry,



Mezüngbuba KABAI yangluba tenla ki (1956-57)

Christian Education ministry aser Music ministry. Home Mission nung ajemdaker women ministry küpok Learner's Cell lapoka, joko küm aika tetsürtem jenti nem pei akaba nungi shisa kaa koda kibong anepalua junga yaritettsü ibaji angazükdaktsür. Asen arogo nung tang masü tanga arogotem nunga kesaji sayua lemsateptettsü maongka ngua arudaki.

Youth ministry ajanga anepalua, küm aika shiranger balala den Tsüngrem O lemsateba den rongsen teyari ajanga Khrista temeim dangi anir aruba aika lir. Lanurtem aikati tenyaba mapa angateta, alima tesem palala nung shilem tajung agia tang tashi inyaka aruba angudang Tsüngrem tenung asanger.

Christian Education ministry ajanga, tila asü dang yongi tanur ka Khrista tejangja kadakja taküm tepiyong Tsüngrem tenzükbä nung alitsü telemtetba agidaktsür, aser yamaji mission mapa nung shilem tajung agitsü sayur. Music ministry ajanga arogo nung telok balala: tain, lanur, aser tila tanur ajak dang kentenba yimya tesayuba mapang shia agütsür. Iba den Music Makers' Club aser instruments balala amshia Tsüngrem külemtsü sayur. Tongtibangsa fellowship ajak nung choir tenteta kanga junga inyaka odaki. Kiyong choir dak alaka, Eirene Choir ajanga asen arogo nung dang masü saka Kohima town nung aser Nagaland aser India lima balala nung Tsüngrem khuli süa senzür.

Mission and Evangelism ministryi anepalua Project Ergon ajanga tongtibangsa lanur mapa mongui alirtem asoshi takok tashi lenmang balala sayua yaria arur. Iba den ano kija aser kibong nung pei sasa inyakteta litettsü lenmangtem sayur. Free Health Clinic ajanga kiyong shia nung asen züngsem dang masü, saka tanga kin tena iba yagi shiranger aika shi temang nung aser tanela nung taneptsü agüja arur. Dynamic Leadership Training küm shia Nagaland nung aliba kin kar shimteter association balala nungi pastortem aser mungdang tenzükertem anitena tesayuba agütsüba den teyaria agüja inyaka arudaki.



Mission kübok Tajung Samaria ministry takok ngua inyaka arur, iba ya ajanga shirangertem, aser timtemer kibongtem dangi awaa oa lenmang balala nung akok tashi yarir. Ano Father School tenzüka kibong aser arogo nung tebu kaji kanga tongtibang ta tesayuba agüja arur.

South Bank Baptist Mission field (SBBM) Assam nung küm metsürpongu tashi nübu aser rongsen agi yaria arur. Joko inyakyim tera melenshir, parnoki nübu agütsür aser arogoi sen teyari agüja maneni iba field yaria arudaki. Tang teinyakdak wadang den, ano arogoi lushi tasen ka bendenloka Jubilee sulen tenzüka inyaktsü sarasademdaki. Arogopur ajaki iba alu tasenba asoshi mangdang meshia sarasademtsü ayongzüker.

Tang tashi nung national aser international missionary ajak agi tertuku yoka lir. Iba den short term missionary lanurtem aser taintem asoshi tent making missionary ama inyaktsü lenmang lapoka, Naga lima nung, Arunachal nung, India tesem balala aser India atena or alima balala nung inyakdaki. Takok tashi arogoi tanga arogotem aser mission agencies balala den teka amteper inyaka odagi.

Hon Jubilee mongeri, Tsüngrem dang sarasadema nangzüka aser meshizüka ayuba ama, Jubilee Memorial Centre (JMC) ya mission yinsem ka ama yanglua küm tenet tashi Nagaland aser India tesem balala aser India atena oa alirtema arua shilem agia temoatsü ngua arudar.

Tsüngremi asen arogo meima aruba ya reprangdangra tesüngmangtsü! Yohan 3:16-17 nung ashiba ama Tsüngrem temeim ya 'odang meimba' lir. Asenok Tsüngrem den tesendaktep raksar, nisung tsüngda yimjung aser temeim mekai tsükchitep agi sünger lia, osang tajung bener alima dangi Khrista aru. Yisu Khrista alimai arubaji, temeim sobur pa taküm rangpen tenla agüja meimchir temenen nungi kümzüktsü aru. Oda kangki nungia "Oba parnok dang tai tokang, kechiaser parnoki kechi inyaker aji parnoki memetet" ta shitetba Yisu temeimji meimchiri asadangtsü makok. Ken nung

ashiba ama,'Tsüngrem temeimji tulu, kecha dena matishitet, petinu danga talangba. Molumi danga tarokba. Menen khureti nenetyong, pai pa chir agütsü; Menen nisung putepdaksü. Menen tatok angu.'

Temeimbatem, asen arogo asoshi taküm küm ya neter pongu Jubilee küm lir. Tsüngremer tesüngmangtsü temeim nung ajemdaker, züngsem ajaki Jubilee tetezü angateta kija taküm Tsüngrem den tesendaktep raksar, tepela ajema kümer, sarasadem aser lai azüngba ajema kümer lira, itemji yanglushia Tsüngrem den akang tembar yimtettsü mapang tajungtibaji na asoshi iba küm ya lir. Kibong shia nung tesentaktep tajungba yanglushia, Tsüngrem den teimla tasen nung longjema, adianu tsüngda, kiyonger tsüngda meimtepa, tatok agütsütepa, temeim mapa inyakdi. Na koba office nung, business nung, lokti nung alir idakji ochishia nü nem nungloktsüba mapa meranga inyaka, na meketa aliba timtemer aser sentsütsüa alir dang taochi aser yimlibilem sayuba küm südaktsüdi.

Jubileeji tepelatsü mapang lir. Iba Jubilee tepela aser temoatsü arogopur shia dak anogo shia lidakjang ta sarasadema ayimoktsür. Tsüngremi moajangma

"Ya tashi Kibubai asenok yariogo"





Salem Osangtem



KABA KÜM 75 JUBILEE



NAGALAND BAPTIST CHURCH COUNCIL

Central Organization of the Baptist Churches and Associations in Nagaland

Bayavu Hill, Post Box – 71, Kohima – 797001 : Nagaland
Phone : (+91) 0370-2260080/2260159
Email: <nbcc.corres@gmail.com > <nagabap@yahoo.com>
Govt. Regd. No. Rs 362 of 1969

Message

I bring joyous greetings to all the members of Kohima Ao Baptist Church on this happy occasion of celebrating the Church's Platinum Jubilee. And I am also glad to hear that a magazine to mark the occasion is being publishes. I wish the Editorial success.

Jubilees are special moments for God's people to make joyous proclamation of His sovereignty in our world today – in the backdrop of our times when evil seemingly appears to be pervading globally, God's Word for us today encourages and provides the basic for His Church to persevere in the face of the severest of test and remain true to Him as the beacon of light to the world . it is my prayer that the preparation for the Jubilee will also be accompanied by the resurgence of spiritual fervor stirring up every member to a new level of commitment to the cause of Christ. And may this experience help the Church to stand in making a strong statement of the Lordship of Christ and His rule both in the individual and corporate life of the Church.

May God bless the Platinum Jubilee Celebration to be a grand success.

(REV. DR. L. ANJO KEIKUNG)
General Secretary

October 15. 2014



KABA KÜM 75 JUBILEE



AO BAPTIST AROGO MUNG DANG (ABAM)

IMPUR-798 615, MOKOKCHUNG, NAGALAND: INDIA

E-mail : abamimpur7@yahoo.co.in

Website: www.abamimpur.com

: 0369-2262202 (O)

Tépela Salem Osang

Naga kin dangi Khrista Osang tajung arur yimtsüng aika nung iba osang tajung agizüka, Khrista arogo tenzük aser item yimtsüngtem ajak nungji, 'limapur' tia nungi 'tamanger' kuma, Khrista tekumtet meteta tanela jenjang nung aienba angur. Iba yimsü den, loktiliba aika nung melenshia, yimsoshiba tasen ka asenok dangi bener aru.

Town kumteta kodang alima aien, item tesem ajak nung tamangertem sentepa, Arogo ka yangertsü nungdak ta ajiteta tanübo town aser city aika nung Ao Arogo tentetogo. Kohima yimtiba nung 1939 nung iba arogo tenzüka aruba otsü jagi sayur, mezüng anogo nungi tanü neter-pungu tashi kenüa metoktsüi Khristai anir aruogo, ta khuli ngua Tsüngrem tenüng asanger, aser Kohima nung aliba tamanger dang masü saka ABAM, Impur nung aliba tamanger ajak pelaba osang lemsateper.

Platinum Jubilee koba December 28, 2014 nung amongtsü lir, iba asoshi omen; *Tsüngremer Tesüngmangtsü Temeim* nung amongtsüji koda tapet, iba Jubilee nung amonger ajak Tsüngremer temoatsü nung mongdakjangma.

Khrista nung tenzüker,

(REV. DR. MAR ATSONGCHANGER)

Executive Secretary, ABAM

Dated Impur the 16th Sept. 2014

Masadangtet Temeim/ 20



KABA KÜM 75 JUBILEE



ANGAMI BAPTIST CHURCH COUNCIL

Baptist Centre
Mission compound
P.O. Box No. 157
Kohima 797 001, Nagaland

Tele : 0370 - 2222514 (O)
- 2242222
E-mail : angamibaptist@yahoo.com

Greetings

Kohima Ao Baptist Church has contributed significantly in the making of Nagaland's capital, and also represents its religious flavor by being strategically located in the heart of Kohima. The Aos are the elder brother to all the other Naga tribes in Christian faith, and accordingly display stability in growth and maturity in faith. I trust that you will dearly uphold the "pure" biblical faith and remain a God-honoring church in the years to come. As you celebrate the Platinum Jubilee, I convey the warmest greetings and best wishes of the Angami Baptist Church Council.

May this Jubilee, an important milestone for the church, be noteworthy by restoring broken relationship, showing kindness to one another, and by experiencing the richness of God's shalom in every possible way.

Dated: Kohima
20th September 2014

(V. ATSI DOLIE)
Executive Secretary



KABA KÜM 75 JUBILEE



KOHIMA BAPTIST PASTOR FELLOWSHIP

NAGALAND: INDIA

Message

It gives me great joy to know that the Kohima Ao Baptist Church is celebrating its Platinum Jubilee. This is the time to celebrate the past with gratitude for what God has done and to look ahead with new hope and strength to fulfill what God has called us to do. To this direction, may you all dedicate your lives afresh to live worthy of the celebration.

On behalf of the Kohima Baptist Pastors' Fellowship, I convey our best wishes and pray that the celebration will significantly impact all of us.

With warm regards,

REV. DR. VEVO PHESAO

*President,
Kohima Pastors' Fellowship*



KABA KÜM 75 JUBILEE



MOKOKCHUNG TOWN BAPTIST AROGO

Salem Osang

Kohima Ao Baptist Arogo tenzüker küm neter pungu ajungba benjungmong nung Mokokchung Town Baptist Arogo amangbapur ajaki nenok den pelateper aser Tsüngrem tenung asanger.

Aoer amangbapur ishikati longjemer tekulem tila ka tenzukba joko tanu küm neter pungu Tsüngremi tashi tait arogo ka küma anir aruogo. Ibai Tsüngremer temoatsü.

Kohima Ao Baptist Arogo asoshi Küm neter pungoji kanga tongtipang long azungba (milestone) ka lir. Jaja aruba kümtem meyipa reprangdangra koda temenungratsü aser jangratemtsü ka lir. Ano iba sulen küm noklang ka ji penzü dang aikati komaka aser kechiang ajurutsü ta bilema alitsü. Saka taküm Tsüngrem shibai küm neter pungu tashi ani, Pai sa ano maneni anir aotsü anungji tepela tulu nung Tsüngrem dak metaloker jajadi.

Jubilee ajanga Kohima nung aliba Ao-ertem tamang lemang nung tejakleni aoba den Tsüngrem O nung ainba sayur. Iba ya Khrista nung takok anguba benjongmong ka lir, anungji Tanela lemang nung tali tashi ita, Pa yimli ulushia zuintsü aser mera tasen agia masadangtetba Tsüngremer Osang tajung sangdongtsü azüngashiba mapang sudi.

Iba jubilee amongdang Tsüngremi na alangzuka Nuji kümdaktsüba indang meketa aliba Tsüngrem memetetba pur dang sangokjang. Iba jubilee ajanga kija, kibong, arogo aser yimden ajak asüngsashiba mapang sudaktsüdi. Yamaji inyakra jubilee amongba tajanzukji na aser tarutsü putui asoshi temoatsü alitsü.

Iba benjongmong Tsüngremi tali moajang aser amangbapur ajak Pa mapa asoshi tali tashi itshidakjang.

Sd/-

REV. PONEN LONGCHAR

Pastor

Mokokchung Town Baptist Arogo

Masadangtet Temeim/ 26



KABA KÜM 75 JUBILEE



OFFICE OF THE
DIMA PUR AO BAPTIST AROGO
DIMA PUR - 797112, NAGALAND

Jubilee Salem Osang

Kohima Ao Baptist Arogo Platinum Jubilee tepela salem amangbapur ajak dangi abener. Kohima nung Ao Arogo amenoker küm 75 tonga taochi aser temoatsü nung aniba ya koda tesüngmangtsü aser jangratemtsü lir. Tesüiba kümtem nung KABA ajanga tongpang tajung aika raraa takok nguogo. Tsüngrem tenüng as anger aser takok asoshi Arogo dang pelar. Iba maongka nung Platinum Jubilee monger asüngsashia tejakleni aotsü akangshiba mong ka asütsü kanga tsüratema bilemer. Tsüngrem sentsüwangshidakja tali tejakleni awa oa inyaktsü moajang ta sarasademer.

Tsüngremi ya tashi anidang asen nükjidadong ajungaji Tsüngrem peladaktsütsü, Pai ajaba tarokba nung angatetta temerük aser ochi taküm alitsü ,aser Tsüngremi nuingloktsüba wadang takokba nung inyaka aotsü asüngsashitsü mapang ka asütsü nungdaker.

Tsüngremi ya tashi asen Arogo temoatsü aser takok nung anir arunung, Pa nem tenüngsang agütsü dang asüng asoshi taochi meshia, Khrista dak rangloker Centenary Mong penzüa, nükla tasen nung tejakleni aotsü ayongzüker. Tsüngremer taochi nung alizüng tongtetba Arogo asütsü moajangma ta sarasadema tepela Jubilee salem osang bener nenok den atener. Tsüngremi asen Arong tali moajangma. Amen

Kibuba taoshi nung

26th November 2014

Rev. N. Tzüdir
Pastor

Masadangtet Temeim/ 28

MENUNGRA BILEMTETER

- *Rev. T. Subong, Mezüngbuba toklang tenzüker Pastor*



Tsüngrem aser nisung tsüngdang kecha tabensa aser temsüa meliaka, Tsüngremer taochi sentong ka ajanga, Kohima Ao Baptist Arogo nung Sannüker mapa inyaktsü asoshi tajaba arua, 1972 March nung asür Tsüngremlar Rev. Longri Ao, NBCC General Secretary, ajanga mapa nungloktsü. Asür R.I Wati sorkar mapa inyaka, Arogo nung deacon den repa Sannükba mapa inyaka liasü. Pa ket nungi iba mapa agizüka inyaktsü tenzük. Iba khuretji ni asoshi kanga taret ta tsübuseta aser shisabulua agizük. Saka Arogo nung Tsüngrem metetertem tashi temeteter aser tulur aika, parnok ajanga tajungshiba, tsüngi o tajung aser sarasadem agi yariba ajanga, küm 32 tashi mesenseni kümtem süitema aoba memeteti lia arur mapang tetemsü nung ni mapa nungi anisüngzük agitsü asüngdangba ama Arogoi mulunga tepila sentong tajung agir 2004 March nung senshi. Tsüngremi Kohima Ao Baptist Arogo Platinum Jubilee küm tongteta arishi toktsü nung pelaseta ajangshia aruba tongtibang kar menungraa lemsateper.

1. KABA Dak Aketba Jenjang (Kü tangatetba)

Kohima Ao Baptist Arogo ya local arogo ka amadangbo masü, saka Mungdang ka mesüka lir. Kechiba süra Ao lima yimtsüng aser town balala tesem ajaklen nungi atenshia "SENTI RONGSEN POKTETDAK MONGCHEN" ka kümogo. Joko pei yimtsüng aser Aolimai meyipba moi, teret indoka alitsü ki o jen yanglur pei yimtsüng küma liteper. Ano kelen nungi reprangdangra jangratemtsü temoatsü kaji, Ao yimkong sobaliba aküm ka küpok, Khrista temang Arogo ka nung züngsem küma Tsüngrem külema litetba ya koda tajung aser jangratemtsü. Kiyong shiaji Arogo kaka ama kümtepa liaka, Kohima Ao Baptist Arogo akhüm ka küpok longjema alibaji tatishitsü tajung aser Tsüngrem temulung achiba lir ta asenoki metetdi.



Ali yabo asen Aor li masü, saka ali kibur dang alizüker asen meyong asen kibur küma alir. Anungji tali ajemalua longjema Khristar Arogoji nüburtem asoshi tajizüktsü (model) Arogo ka küma alitsü ajaki bilemdaktsüner. Ni dang masü, saka kwika Kohima nung lidanger tesem balala nung pilaa oa alirtem lir, ajaki iba teronemji menema arudang mapang shia Kohima Ao Baptist Arogo ya menungra-a bilemteta alitsü ta ni amanger.

Kü temeimba adianutem, nenok nungi pilaba mapang Tsüngrem dang nangzükba ama anogo shia KABA nung tenzükertem aser department ajak asoshi kü sarasadem nung nenok bilemtetdang, tepela tesünep aser temulungjang nung anisüngzük angur. Ibaji nenok menungra-a bilemtetba kuliji lir.

2. Mission ya Arogo Temulungjang ta ajatsü akok

KABA küm 50 abensaba Hon Jubilee nüngo, Jubilee Memorial Centre ka tenzüka ibaji Missionary yinsem ka asütsü ta mangdang yur tenzükba tanübo ibaji asangsang ataloka angudang kanga pelar. Tanü tashi inyaktetba nung temulung süa mebilemi ano tuluba renloka oa mapa tuluba meranga inyaktsü ajungshir.

3. Telok balalai inyakba teti menungra bilemteter

(A) AROGO CHOIR: Lanurtem aikati Arogo choir nung shilem tajung agia tekülem senteptem nung ken anishia atenba aser mapang shia temeja ken atenba ajanga tekülemertem jangratema lia aruba nüklai aru. Saka kodang parnok sodi senshidir aser tangaleni tazüangi oadokdir azüngmeyaka akümer aser tekülem nung parnok matenbaji tapok apar ama bilema, temulungjang nung tejembiba ka arua Music committee den lemsatep aser ashi, "nenoki timtem kar agia lanurtem aser kijung lanutem rongnungi ken atentsü jangrabapurtem kibok tonga oa nübu ayimtsü aser parnok sasa dang tenangzükba agia küm 3 metitemi choir nung atentsü ta mulungtetbapurtem tenüng bendenang." Parnoki mapang tatsüka tsüngda nung temulungertem nisung 60 tenüng bener arutet. Kanga pelaa Arogoi sarasadema bendanga agütsü aser iba mapang nungjagi metitemi choir mena aruba angur. Küm 3 atema dang committee yuaka iba mapang nung ateneritemji tang tashi karbo choir nung mena aliba meteta tenüngsang den pelaba lemsateper. Music committee aser choir mastertem asa

lendong ajanga tanü tashi yamaji kuli süa arogo nung shilem agirtem ajak dang pelaba den mapang shia choirtemi atenba ken aongmetang ola angashidang menungraa bilemteter.

- (B) **KABA** nung mezüngbuba Music Director ajanga Music Makers' Club ya tenteta tila tanurtem ishika jatena staff notation aser kongki atemba agi tekülemer tanela nung temoatsü ngudaktsüba aser tekülem tobur jungdaktsüba den mera ketdaktsübaji kanga jangra-atemer. Maneni ibai takok ngua inyaka aotsü ajungshir.
- (C) **MAPANG** ka nung Director, Christian Education, ajanga Children Workshop ka agia tanurtem shia nem season card kaka pei mulungba noksa aser design yanglua inyakdaktsü. Parnoki yanglubaji yoka senzüdaktsü aser yokzükbaji mission mapa nung tenla agütsüba bilemteter. Iba jagi tila tanurtemi mission nung shilem tulu agitsü aser iba nung yindaktsütsü ajungshiba liasü.
- (D) **SANCTUARY FLOWER CLUB:-** Associate Pastor (Women) sentong ajanga iba Club ya tentetba lir. Arogotsür rongnungi sempet tajung aketertem kar shimteta tekülem sentep nung naro metentsü mapa nungloktsü. Parnokji kar officer kinüngtsürtem aser officertem liasü. Mapang aben kinungburtem tensema Tsüngrem tsübua bendanga agüja inyaka arudang, talisa Deobar anepdang shia ni sarasadema alidang, kinungburtemi gari anir kidang aliba narotem bener arua tekülem kidang ki naro mapang aser sentong den apet, bendang lima nungia alia bener arua tobur junga mapang ajak nung tekülem mera ketdakja liasü. Parnok mapa tajung angudang kü mulungjang nung tasüngdangba aika aruasa liasü. Parnok kidang kilir tabensa yua lir. Saka tenla kidang tulutsürtemi ajemalua KibubaYisu kilir ka küma teküpoki lua mapa tajung inyaktetba ya Tsüngrem metetba aser Khrista Tanela akartemi akoker ta mapang shia parnok asoshi sarasademjasa aruogo. Ni naro indang kecha memetet, saka pulpit koda meraketdakja asüngteta ayutsü tetuyuba agütsüdang pelaseta agizükba, mapang kar nungbo parnok mapa renemer, aritepa kidangi aita Pastorba, na adoka reprangdangang, temelenshitsütem kar lira melenshidi ta ashidang parnoki amalitepa inyakba aser awashi meteta tenzükbaji koda tobur tajung ta temulung chia aru. Sanctuary ta asüba ya Temeshi Tenla ki Temeshidak, Temeshitetba wazüka ayuba tesem shirnoki iba mapa nung bendanga agüja tenzükteter parnok temoatsüba sang.



4. KABA Arogotsür Telok

Ao Arogotem nung Arogotsür ya Arogo ka amai dang inyakyim inyaka aruba yimya liasü ta asenoki metet. Kohima Ao Baptist Arogo nung kodang tetsür tesayula tensema Deacon Board meeting nung aten, Arogo ta asüba nung tetsür shilem balaka kecha mali ta angajema inyaka arudang mapa aika nung arogotsüri Arogo khuret angateta yaritepbaji teti bilemteta alitsü, kanga tongtimbang ta angateter. Tatalokba mapa aika lir. Ajakji idaki mezulumatsü. Saka tongtimbang ana ni teti pelaa bilemteter.

- (a). Arogotsüri parnok sasa dang achaayanga Associate Pastor (Women) alitsü ki tajung ka tenlaki anasa yanglu. Saka Arogoi iba kiji ainer anentsü amshitsü asüngdang. Parnoki Arogojiang tongtimbangba ta angateta odang agütsütsü telemtetba agia ibaji Guest House aser meeting hall dena amshitsü agütsü. Arogo aser Arogotsürji kibong nung apuanina ama ta parnoki tali tajungba angateta inyaka aruba bilemteter.
- (b). Mapang ka nung tenlaki asütsü asoshi kimong aliloktsüsa aküm. Tayoker jagi Rs. 17 lakhs meshi Deacon Board nung iba indang kanga shisadanga jembiteper, tarutsü nungbo ya malirabangla tenlaki koda masütsü, anungji alitettsü lenmang asadanga bilemer sentepdi ta sür senshi. Anogo ishika kechi koda asütsü ta shisabulua ni office nung mena alidang, Associate Pastor (Women) kü dangi aru. Arogotsür sen bank nung küm 5 fixed deposit ayuba matured sür Rs.17 lakhs tanaben inoka ayutsü agizüka lir. Iba sen jagi kimongji alizüka atang aser Arogoi kodang agütsütetdir agüjang ta ashi. Ni tepela agi 'Praise the Lord' ta shia pelabaji ni mamateter. Tasüngjisa Deacon Board jatepber kimongji alizüka ayu. Iba ajanga tangbo tenlaki tuluba ka sütettsüsa lenmang bener arutsü. Kechiba ni ya teti bilemteter ta süra Associate Pastor (Women) Deacon Board nung tensemba ajanga Arogo nüngdak aser khuretji metetba agi department den lemsatepa item ajak inyaktet. Ibala mesükba maparen aika arogotsüri arogo khuret tongzüktepa inyaka ajanga arogo lirumedema ainba lir. Tesüiba anogotem bilemteta arudang, KABA Tsüngremi tesüngmangtsü meimba aser aniba bilemtetdang Tsüngrem tenüng asangba agi temulungjang nung mesemi lir.

5. Ni asoshi Kecha tena medemdangtsü makokba Tsüngrem Taochi

Alima nung kü takümji medemdangdi süra, lisem jang ka dang nungia tilaba, shiruru rongnung meja tilatiba ka tena medemdangtsü metemsüba taküm ka. Saka nisung nungi masü, Tsüngrem tenüki ngua angadi taochi agi atsüteta bener arua Nagaland Capital, Kohima nung, KABA Khrista zü agi alangzükba Arogo nung Sannüker asütsü toktsü. 1972 mapang nungjia Aor rongnung Theology azünger jendi adoka aliba mapang, ni bushibaa masü; saka Tsüngremer sentong ka ataloka iba maongkaji agiba liasü. Arogo nung tenzüka arur küm 17 buba nung KABA Golden Jubilee among. Tatembangba aonung Jubilee Record ajak süngden tila ka nung enoker küm 25 lir külen Platinum Jubilee mapang lapoktsü ta shir dala agi shibanga, Kibuba tenüng nung bendanga sarasademdang, iba Platinum Jubileeji nia taküm lia ajurudima ta menungraa atem. Kohima nungsa melisemaka iba Jubilee küm tonga kü taküm arishi küm 81 buba tashi Tsüngremi wazüka anir arudang, Kohima Ao Baptist Arogoi taküm küm 2014 nungi tenzüka taküm ali tashi ita shia Rs. 5000 agütsütsü ta lemteta agütsüba pelaseta agia arudagi. Kü dak langka tajung aliba agi masü, saka Arogoi Tsüngrem tenüng nung Mission mapa ka awaa oa inyaker ta angateta Tsüngrem nem dang tenüngsang agütsür. Iba pelaba olen kar zülutsü maongka agütsüba asoshia pelar. Tenyartem Mapa 20:35 Nenoki tashi maiter dang yaritsü tim ta aser Kibuba Yisui tagizükba dang nungibo tagütsübaji tali temoatsüba lir ta ashiba ama, Kohima Ao Baptist Arogo mapa tajung asoshi rena moajangma. Ibai ajanga Tsüngrem temeim tali jangjaa aser Arogo asoshi khuret bena sarasademtsüji kü taküm nung tongtiband mapa ka asütsü merangtsü. Asen Kümtetdakba Kibuba Yisu Khrista taochi aser Tanela Temeshi tatenba Kohima Ao Baptist Arogo aser Platinum Jubilee monger ajak madak lidakjangma ta menungraa kü O atemer.

"Yisui ashi, Nenok alima tesangwa. Tenem nung aliba Yimti memiimtet. Yamaji nenok mapa tajung ngua, Kotak nung aliba nenok Tebu sentsüwangshidaktsütsü asoshi, Nisungtem madang nenok tesangwa jungkai adokdakjang" Mathi 5:14,16





Tápu

KOHIMA AO BAPTIST AROGO OTSÜ

Mezüng Küm 25 tain Arogo (1939-1964)

1. Kohima Arogo kimong mesemtetba:

Merataket Ao mongcheni Tsüngremer tesüngmangtsü temeim osangtajung bener arua sangoktsür küm 67 buba mapang, aser British Sokari Kohima Head Quarter mesemteter küm 69 buba toudak nung, 1939 küm Kohima yimtiba nung Aor asoshi Tsüngremer sentong tulutiba ka jungkai adok.

Aor rongnung mezünpur tekapu ka masüng, parnok rongnung teimba ka British Sokar küpok mapa inyaka alitsü Kohimai aru. Iba mapang Naga kin ajak nungi Kohima nung arua alir ishika dang liasü aser parnok ishikaji longjemer Daklane Arogo 1938 küm tenzük. Parnok ajak oshi balala asünung, tekülem sentep Assamese oshi nung dang agi.

Tekümna nungibo Aor kibong 10 den student kar aruagi alitsüsa akümba temoatsü ajanga, Aor kisüng sentep aka nung bener otettsü motettsü ta asadanga jembitep. Iba den ano pei oshi nung Tsüngrem külema Lai O tesayuba angazüktsüjisa tajungba ta lemtepa shisadanger, Aor temeja sentep akatsü mulungtet. Lemtetba ama Rev. Sapplee dang Mission Chapel nung sentep akatsü temelaba asüngdang. Pai kanga mulungbena temelaba agütsü nung Aor temeja sentep 12 February 1939 Deobar anogo nung tenzük (Iba ya mezüngbuba Pastor asür Chubameren Kupza taküm alidang ashiba agi Kohima Ao Baptist Arogoji 1939 February tanabuba Deobar nü tenzük).

Ao sentep balaka tenzükaka, iba sentep dang Ao Khristan Telongjem ta aja aser temulunger tangar kin shirnoki Ao junga angateter parnoka arua aten. Sentep ajak parnok rongnung melentepba dang mapang tatsüka agia aru. Ano tenla saruba bendena ayutsü nüngdaka aküm nungji, mission kibur ka





CHAKNUNGTEMISHI
Longkhum



ALEMKABA
Waromung



IMTISOSANG
Changki



IMTINUNGSANG
Waromung



SÜBONGNÜKLU
Mongsenyimti



IMTIMERANG
Changki



KATIKABA
Mangmetong



MEYATOSHI
Longkhum



SENASÜNGBA
Mopungchuket



IMNAMEREN
Changki

nüngdak ta ajiteta tsürabur Imtinüngsang (Waromung) 1939 April ita nungi shimteta inyakdaksü. Yamaji Arogo nung tenzüker tenzüklatem ajak tabensa meliaka, iba ya Kohima Ao Baptist Arogo tenzükba tamendakdak kimongji lir. Iba mapang kibong 10 ji itemi liasü.

Naga nunger, tongtibangsa Aor dak Tsüngrem meimba shisatsü aser yimya tajung kaji kong kibong ishika longjemdir, Arogo ka tenzüka Tsüngrem külemtsü aser Tsüngrem mapa inyaktsü ta angatetbaji lir. Iba mapang tashi nung nüburtemi pei yimtsüng dak alaka, tangaleni oa alitsüji pei senso tajung wazüka meyteter ta shisatsü tarok aliba mapang ka liasü. Aji saka bendanglima Ao Arogo tenteta yutsütettsüsa samanirtem dak tarutsü mangdang tulu, tamang takang aser tanela tejangraba liasü ta angateta parnok mapa tajung asoshi tenüngsang agütsür. Tanü parnoki tenteta yutsüba Arogo küm 75 abensaba Jubilee amongdang parnoki Longdi yim nungi koma tzüratema penzüdar na? ta asen nükladangi arur.

Yirusalem nung mezüng Arogoji reprangdangra“Tamanger ajak külemi ali, aser kenüamati temulung ka sür parnoki tenla kidang sentep, tepela aser tagütsünü mulungsentsü agi parnoki chiyungtsü lemsatepa achi aser Tsüngrem tenüng asangba maneni ali, anungji nisung ajaki parnok dang junga bilem”(T Mapa 2:43-47). Ibaji mesüka bendanglima ano Naga nungertem kaket shisatsü metetba nung kanga tajemzük tia den, alima tasen süaka parnok temeimtep, telongjem aser Tsüngrem temeim tangatetba tulu liasü ta angateter.

2. Kinü Arogo, alima yipru nung

Kodang alima ajak tanabuba rara adok (1939-1945) iba mapang 1942 nungbo Japan nungertemi Kohima tonga rarayonga aru. Kodang Kohima amaktsü osang agütsü, nübur ajak town toktsür aotsü Sorkari ozüng agütsü. Anungji sorkar mapa inyakertem dak alaka nüburtem ajak senshi.Yamaji raraji tesashiba aküm aser yimti nung alitsü mesatemi kümadok nung sorkari 1944 April 3 nü mapa inyaker aser meinyaker ajak Kohima toktsür aotsü ozüng tesashi agütsü nung ajak pei limai senshi.



Pei limai meyipa arur mapang kar nungbo yimtung nung ajurutepdang Kohima nung aliba kanga menungra jembitep, aser khen khenbo ana asem ajurutepdang sarasadem agir senshi aser ano mapang kar nungbo parnok ajak mesüaka Mokokchung jila nung sentepa telongjem agiba den Kohima atema sarasadem ta 1988 küm parnok mezüngbur taküm alir ajurua jembidang parnoki ashi.

3. Tabensa kimong yangerba

Baptist Arogo ka Khrista dak amendaker kümküm kümküma aintsü asoshi tongshi pezü lir.

Itemji:

Tsüngrem Külemba, Lai azüngba, Telongjem, aser Khulisüba. Yamaji iba arogo ajaklen sütepsütepa yindaktsütsü mezüngburtem dak mangdang tejangja liasü.

Tsüngrem külemba:

Kodang tanabuba alima ajunga rara tesüngjemba aküm, tanaben Kohima bushia aru. Aser Tsüngrem külemtsü tesem ka nüngdak ta jembiteper Local Play Ground anasa Army store ki ka nung sentepa, iba tekülem tali tejangraba nung maneni ao. Nüburtem tejangraba tulu adokba ngua, joko sentep anitsü parnok rongnungi nisung ka part time Pastor asütsü shimtet. Tekülem nung Tsüngrem Tanela temoatsü atenba parnok ajaki ajangshi, yamaji mapang kar nungbo anepdang nungi nekongdang tashi Tsüngrem külemba metitemi liasü ta mezüng amangertemi lemsatep.

Lai azüngba:

Parnok ajak melentepa Tsüngrem O jembiba aser tekülem aniba nung shilem agi. Ajaki meranga Lai O azüngba nung temulung agütsü. Yamaji tekülem sentep agiba aser Tsüngrem O jembiba ajanga nebur ajak temoatsü angu. Parnok rongnung balaka laishir maliasü. Ibayongji ajaki meranga Tsüngrem O azüngtsü tali bendanga agütsü. Iba mapang tashi nung Ao Laishiba kaket kar dak alaka ajakbo memeyipzükteti liasü. Parnok ket nung kechi aka iba nungjagi meranga azüng

aser English Laishiba a ajak ket nungbo maliasü. Anarongtena kar ket nung alibaji aputepa azüng ta parnok taküm alidang ashi. Tesülen kodang 1964 küm Laishiba ajak Ao oshi nung meyipzük, nüburtem asoshi teyari tulu ngutetba mapa tajungtiba rongnung ka liasü ta parnok nungi angazük.

Telongjem:

Pei lima nungi pilaa or bendang lima parnok ishikaji, kati ka dang taoba ta bilem, mapang ajak nung kibok semtepa, aser deobar tekülem telongjem akatsü kanga yongyatep. Anungji amangbapur ajak tetsü-tebu ka chirtem ama meimtep. Parnok ajaki Khrista nung ka küma longjemba, tanela tesendaktep nung aren, kati ka dang junga bilemba ajanga tangar ajaki parnok telongjem temoatsüji kanga junga bilem.

Khulisüba:

Tekülem sentep, lemsatepba aser telongjem mapa ajanga aikati junga bilem. Ano tangar kin shirnoki asen oshi junga metet, parnok dang tesayuba balala den temeim mapa sayuba ajanga khuli asü. Aser parnok aika arua iba telongjem nung tena shilem agi. Parnok aika Kohima Ao Baptist Arogo nung Baptia züngsem aküm aser tesülen parnok pei pie kintem jurila sentep tenzüka ao. Idangji ang parnok züngsem belena bener yok.

Kodang arogo nung nüburtem tenük lapoka aküm, parnok mulungjang nung yarinüba, jungnüba, khulisünüba tejangraba tali adokdaksü. Anungji 1963 May 3 nungi Sayutsüngiba Committee tenteta, shiranger, timtemer, yariba aser samaba tanela anir aruba nung shilem tajung agia ao. Parnoki inyakba mapa ngua aikati mulungsoa tenla. Iba küm parnoki Rs. 39. 50 P indoka khulisüba mapa inyak. Iba mapang nungi tenzüka Arogoi tenyaba mapa meranga inyaka aru. Iba kulisüba mapa tulu putu ka nungi putu ka, pelenzüka aruba tanü tashi iba Arogo nung tenyaba mapa teyongtsü süa inyaka arur.





Tápu 2

TANABUBA KÜM 25 TAIN AROGO

(1965-1989)

1. Nütsüng renlokba:

Alima Yimten aser Arogoji balala saka pilatsü makok. Tongtibangsa pei lima nungi pilar Sorkar mapa inyaker kin ka oshi ka dang süaka, yimtsüng balala nungi atenshia longjemer arogo aküm. Yamaji kodang 1963 December 1 nung Nagaland ya India nung state ka asütsü sangtong, terenlok aika den teinyaktsü maparen jenti adok. Anungji Naga kin nüburtem aser India lima tesem balala nungi nüburtem jenti Kohimai arua Sorkar mapa inyaktsü tenzük. Iba mapang Ao kin nungi aika arua Sorkar tenzüker, shishilembar aser mapa balala inyaker jenti Kohimai arutsüsa aküm. Anungji arogo nütsüng züinba nung tanen maka injen ain. Kohima Ao Baptist Arogo ya kibong 10 agi tenzüker mezüngbuba küm 25 ajungdang kibong 105 liasü. Ajisür tanabuba küm 25 tsüngda nungbo iba arogo nung kibong 1500 dak tema kümadoker liasü. Arogo ulua akumba ajanga toklang tenzüker Pastor ayutsü lemtet. Anungji 1972 March nungi mezüngbuba Pastor Subongsenba, Molungyimsen (Rev. T. Subong) shima pa lenisüba küpok arogo tashi ita ao.

2. Arogo nung tenyaba mapa:

“Ne mapatem putu kati putu ka dang asangtsü, aser ne mapa tulu metetdaksütsü” T. Ken 145:4

Arogo nung tenyaba mapa kanga tongtiban ta tangatetba nung, mezüng samanirtemi inyaka aru. Yamaji putu ka nungi ka iba tenyaba mapa nütsüng nüburtem ajaki meranga inyaka aruba mapang Nagalima dangi asentenshi tulu aru. Tsüngremer Tesüngmangtsü Temeim ajanga Kohima Ao Baptist Arogo nunga 1977 küm asentenshi adok. Ibaji ajanga nüburtem jenti temoatsü angu aserTsüngrem mapa inyaktsü temulungtetba tulu agi taküm bendanga agütsü. Iba mapang kibong aikati tamang tulu nung, chirnur Tsüngrem nem Pa tenzüksü agütsü aser pei akaba rongsen Tsüngrem mapa asoshi pelatepa tenla. Iba tejangraba jateta adokba den Arogoi kanga sarasadem, aser Pa tetuyuba nung 1978 küm Kohima Ao Baptist Arogo ya “Missionary Arogo” asütsü Tsüngrem dang azüngashi.



3. Fellowship razükba:

Kohima yimti ulua akümba den nütsüng teimba renloka aodang, sentep ki ka nungdang nisung ajak septeper külemtsü mesatemi aküm. Iba den lenmang talang nungi aonung sentepi arutsüji tasak ta ajiteta, 1976 Arogo küm tatem meeting nung 1977 küm nungi sector kar nungbo aonung sentep katettsü lenmang bushitsü lemtet. Lemtetba ama tenzükertemi tatsü talang ajak shisadanger A.G colonyji lenmang talang aser arem ajanga sentepi arutsüji amangyasü nung timtem lir ta ajiteta, special sentong dak alaka aonung sentep 1977 June 5 nungi agitsü lemtet. Iba mapang fellowship incharge meshimi dang Arogo office nungi sentong ajak yanglua tenzüker, tenzüklatem melentepba agi. Melungi town tuluba den nütsüng renloka aoba agi, tanga sector nunga aonung senteptem lapoka ao. Ibai ajanga sentepi arur renlok, Tsüngrem O agi nübur timba tongtet, aser tekülem nung aikati shilem tajung agitet. Tesülenbo fellowship 6 tashi lapoka neburtem nungi incharge kaka shima parnok lenisüba nung takok tajung ngua aru.

4. Arogo kaket ken o ministry:

Jungkai adok "...Aser pai kü dang ashi, züluang, kechiyong item O tamangtsü aser ochi lir"

Alima nung kaket yanglua amshiba tenzüker tanü tashi nung nüngtokotiba aser timtiba ayokba, aser azüngba kaketji "Temeshi Laishiba" ya lir. Iba ya kaket küma menunger alima meimchir dang mayok asünungbo alima ya koma lila? Taküm quika samar alitsü? Iba kaket tesüngmangtsü kaji,



Church Bulletin Editorial Board

“Tsüngrem O temeja aser Taküm lir”. Koba nung Tanela aser shi taküm asoshi ajak tabensa lir.

Tsüngrem O koba agi meimchir nem taküm agütsür, iba O ya alima ajak dangi abentsü asoshi jembiba aser kaket zülü ajanga inyaksü Tsüngremi taochi agütsü. Alima nung alir ayir, asangur aser mapa inyaker 90% shii Tsüngrem O kaket (Literature) kanga nungdaka lir. Kar asoshibo Laishiba azüngtsü mapang mali, kar tenokdangba ajurua Lai azüngtsü makoker. Item nübur asoshi Tsüngrem O kar, kaket tila nung zülur ngua azüngba ajanga temulung meyipba osang aika lir.

Tsüngremi arogo nem nungloktsüba tulutibaji alima tatem tonga khulisüba mapa Pa tanaben maru tashi inyaksü nungloktsüba ya lir. Iba nungloktsüba mapa nung tongtipang shilem kaji kaket zülü (Printed Literature) ajanga Tsüngrem khulisüba ya lir. Tanü alima nung sayutsüngiba dang nungi Tsüngrem O kaket ken o agi teimba tongteta nungloktsüba nung shilem agiba angutsü.

Tsüngrem O Kaket ken O ajanga kulisüba ya kanga tongtipang ta tangatetba nung KABAI 1986 küm sarasadema Tsüngrem dang meshizük. Yamaji mezüngbo stencil paper nung typewriter agi ajener, cyclostyle machine ajanga menünger alem. Mezüngbo arogopur atema dang paper ishika nung menünger alem. Alima tejakleni aodang maparen kanga tajungba aser tezübaba bener arutsü. Anungji tanübo printing press nungi teimba, aser temelaba nung adoktang’ arogo nung tatalokba dang masü Tsüngrem O tarok Lai bushiba, sermon aser oset balala agi zülua neburtem teimba tongteta inyaker.

Church Bulletin ya Tsüngremi moatsüba ministry ka ta angateter. Kechiaser iba kaket ajanga nebur aika temoatsü anguba khuli angashir. Tongtipangsa nüburtem azüng meyakba mapang aser Tsüngrem O tzüraba mapang nung iba Kaket ken o ajanga jembir aser temoatsü agütsür.

Iba kaket adokba nung shirnoki shilem tajung pei akaba sempet tajung agi yaritepogo nenok ajak dang Jubilee tenüng nung pelaba metetdaktsür.





Tápu 3

TASEMBUBA KÜM 25 TAIN AROGO

(1990-2014)



(I) GOLDEN JUBILEE MEMORIAL CENTRE

Kohima Ao Baptist Arogo, küm 50 ajungba mong telemtetba (resolution) kaji Kohima nung ali tesadem ka alitsü aser iba nung Missionary Insem maparen inyaktsü. Iba tangatetba nung ali tesadem ka Lerie colony nung ali. 2007 nungbo ki tajung yanglua iba dang Jubilee Memorial Centre (JMC) ta jateta amshir. Iba ki nung nisung 120 asoshi mejangdak taktang den temeja taktang 12, tekülem aser senden atema, sarasademdak, saisapong aser chiyongdak taktang teperi lir. Ano JMC temekut nung gari anentsü tesem tajung aser teperi lir.

Nagalima nung aliba kin balala, India lima tesem aika nungi sentong balala aser international sentong tapu aika iba kidang küm shia mazüangi kaa arur. Küm ka nung telok balalai amshia akaba sentongtemji 85-100 ben tashi iba kidang metangtangi akar. KABA Golden Jubilee nung Mission Insem asütsü nükjidong nung inyakba ama, iba ajanga Mission mapa tulu inyaktsü, küm nungi küm tsüngda training, retreat, workshop, sarasadem, Bible study. Tantsür tambur, ayir asangur, tila tanur ajak pei pie sasep sentong aika akar. Tsüngremi nungloktsüba mapa nung tamanger shiaji khulisür kaka kümdaktsütsü nukjidong tulu nung iba ki amshir.



KABA KÜM 75 JUBILEE



JMC Board

(ii) CLARK MEMORIAL HIGHER SECONDARY SCHOOL(CMHSS)

Golden Jubilee telemtetba nung missionary Arogo ka ama Tsüngremi nunglochtsüba mapa nung meranga inyachtsü ta tangatetba yur Clark memorial Higher secondary school ya KABA Home Mission ka ama agizüka küm 5 reprangba tatsü agi zülusemstsür.

Alima aser putu melentepba den shisaliok nung terenlok kanga kara aoba mapang, kaket riju tajung aika city aser town balala nung lapoka aoba ajanga Clark Memorial High School ya mapang talangka ABAM nukjidong metongteti aruba ajitet . Ano tajungba otettsü lenmang aika bushidanga shisadang saka lenmang sadema mungutet nung 1992 küm nungi kümshi class kaka lepdoktsü aser iba school küm 100 ajungba mapang 1995 nung shibangtsü ta mungdangi telemtetba agi. Saka Arogo kari pei arogo mission project ama agizüka anebalunera melatsü ta renem.

Arogo aser nüburtem ajaki iba school ya shipangtsü temulung agi magizüktet. Tsürabur tajung kari Aori iba school shipangadokra Aor temang nung tenük ka torepba ama asütsü ta sa jembi. KABA nunga kibok aser lokti ajak nung jembitepa sa aru. Iba tensa kesa nung 1992 küm tetenzüklen ABAM Executive Secretary ajanga Kohima Ao Baptist Arogo dang iba school ya anepalutsü asündang. Arogo lenirtem aser nütsüng tajungtemi mapang talangka agia shisalemsatepba den Tsüngrem dang kanga sarasadem. Iba sülen tangatetba tajung kar ajanga iba school meshipangi ken anebaludangtsüla ta angatetba agütsübaji item khulitem ajanga liasü.

1. Impur School ya American Baptist Mission senmang lir. Iba ajanga Naga nunger ajak tamman nungi tesangwa dangi ania tenük lapoktsü. Iba ya samadaktsüra aseni asen kimong raksaba den Tsüngrem aser American Baptist Mission tsündang sentsü tulu asütsü ta angatet.
2. Ibai samadaktsüra, ali mesama tashi senti rongsen ka samar asütsü aser temoatsü malitsü.
3. Iba school tamakoker küma anenba jagi Baptist Arogo tashi maitba aser tamakok tali shisang shisanga jungkai adokdakja tanga tamangba yimsü balala asoshi lenmang lapoktsür asütsü ta angatet.



4. Impur nung school ya shibangra, Impur mission centre ya kanga azüng meyaka akümtsü aser Ao arogotem tali tashi maitba akümtsü ana nung lir ta ajitet.
5. Aor lokti ajunga longjemba tashi tulubaji ABAM ya dang lir. Anungji iba school ya shibangra, Aor telongjemji tashi meiti akümba jungkai adokdaksüba den kesa.

Tanga khulitem aika liaka, item tangatetba ajanga CMHS ya ABAMi asüngdangba ama Kohima Ao Baptist Arogoi Home Mission project ka ama mapang tatsüka anepalutsü nüngdak ta angateta iba khuret agizüktsü lemtet. 1993 nungi 1997 tashi ABAM nem khuret magütsüi anepalua aru. Iba maparen ajak tiptema inyaktettsü asoshi Board of governors nung President Wapong Kiremwati aser Finance committee nung Wapong Alemtemshi Convenor shim aser parnoki anir membertaini pei juri mapa ama kanga meranga inyak. Iba ajanga school küm 5 tsüngda tajungba küma yanglutet. Item ajak ya Tsüngremi Pa temeim tulu sayuba ta meteta Pa tenüng moatsür aser parnok lenirtem dang pelar.

School ka tajungba küma yanglushitsü asoshi Headmaster aser tesayur tajung nungdak ta angateta sarasadema aru. Tsüngremi nüngdak meteta Miss. Arenla Longchar mezüngbuba mapang tatsüka Headmistress khu tongzüka inyak aser la den tesayur tajung aser la sülen Headmaster ka sülen ka ta nguteta tajungtiba nung inyakteta aru.

Residential school ka ama ki-o-jen aser osettsüset jenti kenyongi nüngdaka aküm. Iba den school staff itasen aser tanga nüngdak ajak asoshi sen jenti nüngdaka aküm. Kong nungi angutsü ta sarasademdang, takar Tsüngremi Pa sendong asünungji item ajak mapang shitak nung moatsüba ngua aseni külemba Tsüngremji tesüngmangtsü Tsüngrem ka ta tali jangja angatet. Iba maparen nung Tsüngremi Ao Arogotem, kija, kibong aser lokti balala den jembia tenla jenti, aseni bilemba dang nungi tali moatsü.

Küm 5 tsüngda tebilemtsü aser teinyaktsü jenti adok. Saka item khuret Tsüngrem dangi abendang, Pai pungpadaktsü aser lenmang lapoktsü. Arogotem telok aser kija aikati sarasademba Tsüngremi langzüogo, yamaji nenok ajak dang KABAI pelaba lemsateper. Küm 5 tsüngda Tsüngremi aniba aser moatsüba jentisa jenti zulumatsü makok. William Carey-i ashiba ama "Tsüngrem asoshi tuluka atemzükang aser Pa nungi tuluka imlaang." Adangji Arogopuri iba mapa tulu Tsüngrem nungi yimlaa tamang agi inyakdang, Pai kanga tulu agi moatsüogo ta marendaki shiteter. Tanübo iba school dang Clark Memorial Higher Secondary School (CMHSS) ta ajar. Iba school result ajanga ABAM tejak tentettsüsa angudang KABA sa tzüratatempa aser pelaseta Tsüngrem tenüng ulutsür aser tang staff aser kaket riju nung alir ajak dang pelar.

(iii) SOUTH BANK BAPTIST MISSION (SBBM)

Kohima Ao Baptist Arogo Golden Jubilee Resolution nung Missionary Arogo nükjidong angateta pei arogo temang aser tashi den sütepa tenyaba mapa nung metitemi shilem tulu agia inyaktsü ta tangatetba aliba mapang. Christian Living Fellowship, Kohima ajanga parnoki tereprangdak Mission field ka Assam nung Bhramaputra ayongküm anüolentep Mising, Deure, Assamese aser Nepali neburtem aliba tesem agitsü Arogo dang asüngdangba ama 1991 March 9 nungi agizüka repranga aruba 2012 tashi anebalua Arogo 5 amenteta yutsüba tenüngtem

- 1) Bethel Baptist Church
- 2) Kalbari Baptist Church
- 3) Bahphala Baptist Church
- 4) Neul Baptist Church aser
- 5) Dakhin Kolia Baptist Church

Iba den fellowship ana

- 1) Barchapori Fellowship
- 2) Sankarchuk Fellowship



Tamanger tzüsenba züngsem 914. Aser Bethel Christian English School ka Class X tashi iba temeküt nung tajungtiba High School ka yangluteta parnok nem yutsüogo.

KABA nükjidong rongnung kaji arogotem ajak nung Lai tesayuba tajung agüja tamangertem tanela mesütsü 1992 nungi tenzüka parnok rongnungi temulung lemtetba tamangertem nisung 17 tashi B.Th, B.D, M.Th aser Bible Course ita ishika Assamese oshi nung azüngtsü yoka renemdaktsü. December 28, 2011, Silver Jubilee among. Iba sulen parnok sasa arogotem aser school ajak bener otettsü ta ajitetba den tamang katet nung, KABA-i missionaries ajak meyiba agien, saka ano parnok tanela aser rongsen leman nung küm 5 (2012-2016) tashi teyari agütsütsü terenemba yur, iba field ya Takam Mising Baptist Kebang (TMBK) mungdang nem January 2012 küm tamang katetba tulu den parnok pei nüburtem rongnung telongjem aser tesünep nung külemi Osangtajung sayutsüngiba ajanga Tsüngrem yimli ululoktsü (Corinthians 13:11) teimla tulu nung agütsüogo. Iba mungdang nung Executive Secretaryji SBBM nungi adokba tenzüker Mr. Ranjit Doley pa lenisüba nung tashi ita aotsü tamang tulu lir.

2. Tekülem sentep terenlok

Kohima kanga ulua akümba den nütsüng jenti renloka ao nung Fellowship terok nung tenlaki tajung yanglua sentep ajak yangji dang agitsüsa aküm. Anungji Arogoi kanga junga bilemdanger, nübur ajak tongtettsü, tekülem sentepi teimba arutettsü aser teimbai shilem tajung agitettsü atema Fellowship terok küma lemsar Associate Pastor kakati anir sentong ajak inyaka arur. Yamaji Pastortema tasen kümshia ministry tashi taitba küma inyaktettsü asoshi küm pungu shia fellowship melentepa inyaka arur.


1. Main Church
2. Chandmari Fellowship
3. A.G Fellowship
4. Lerie Fellowship
5. Ministers' Hill Fellowship
6. Merhulietsa Fellowship
7. Bayavü Fellowship



Rev. M. Asangba Longkumer & Family



KABA KÜM 75 JUBILEE



KABA tenla ki tejenba



Tenla ki tasenba noksa (model)



Tenla ki tasenba, teyangludak



Rev. I. Bendangmeren & Family



KABA KÜM 75 JUBILEE





Mr. A. Chuba Jamir & Family



KABA KÜM 75 JUBILEE





Rev. Dr. Toshi Langu & Family



KABA KÜM 75 JUBILEE





Rev. I. Yapang Walling & Family



KABA KÜM 75 JUBILEE





Mr. Sentisashi Aier & Family



KABA KÜM 75 JUBILEE





Rev. T. Chuba Jamir & Family



KABA KÜM 75 JUBILEE



3. Tanela Mesüba

KABA GOLDEN JUBILEE monger külen, mera tasen koba ama meratsü kanga sarasadema Tsüngrem dang asüngdanga aru. Tanü alima kara ainba putu den, Arogo tamangren nunga amangbapur ajak Lai O nung tera yanga, tamang nung kümküma, küm taktsütsü kanga shisadang. Yamaji tamanger shia tamang nung jangyu medema indaktsütsü nukjidong nung küm shia Lai tesayuba aser doctrinal balala sayuba agi santem mesüa aruba Laishiba nungi teshimtet kaket aser omen kar yamai agütsür:

- | | |
|--|--|
| 1990 : Khrista den mera tasen
Lai bushiba kaket: Rom | 2003 : Sarasademba Küm
Lai bushiba kaket: Esther aser Kibubai sayuba sarasadem |
| 1991 : Khrista den Tarokdaki
Lai bushiba kaket: Luke | 2004 : Tsüngrem O Den Arogo
Lai bushiba kaket: Ezra |
| 1992 : Nü Süki ulushiang
Lai bushiba kaket: Isaia | 2005 : Khrista Aser Kibong
Lai bushiba kaket: I & II Peter |
| 1993 : Arogo aser Laishiba
Lai bushiba kaket : Arogo aser Laishiba indang tesayuba aser Lipok | 2006 : Tamanger Shia Khrista Khulisür
Lai bushiba kaket:- Yona & Yakob |
| 1994 : Arogo aser Netsüng Bushiba
Lai bushiba kaket: Tenyartem Mapa | 2007 : Onok Asentenshiang
Lai bushiba kaket: Efesa |
| 1995: Tsüngrem O ajanga Arogo Meshitetba
Lai bushiba kaket: Hosea & Yohan Shititem | 2008 : Lungma Nung Yangerba Arogo
Lai bushiba kaket: I & II Peter |
| 1996 : Arogo aser Rongsen
Lai bushiba kaket. I Korint | 2009 : Tabensaba Arishiang
Lai bushiba kaket: Yisu O entepba aser Mojing indang tesayuba |
| 1997 : Yimjung Küm
Lai bushiba kaket: Filipi, Temenen indang tesayuba aser putepshiba | 2010 : Ochiba nung Jajang
Lai bushiba kaket: Yohan |
| 1998 : Laishiba Nung Tera Yangshiba
Lai bushiba kaket:- Galatia, Tanela Temeshi indang tesayuba | 2011 : Yanglushiba
Lai bushiba kaket: Amos |
| 1999 : Aso Tasen Den Arogo Terenemshiba
Lai bushiba kaket: I & II Tesalonika & Baptist Jangjayak | 2012 : Tamanger Shia Khulisür
Lai bushiba kaket: Tenyartem Mapa |
| 2000 : Ne Yimli Arung
Lai bushiba kaket: Mark | 2013 : Tsüngrem Yimli Nenok Rongnung Lidakjang
Lai bushiba kaket: Mark |
| 2001 : Khrista Den Nükla Tasen
Lai bushiba: Habakuk & Tenem nungi sayuba | 2014 : Jubilee mong: Tesüngmangtsü Tsüngremer Temeim
Lai bushiba kaket: Baptist Jangjayak, Kotak aser Molumi |
| 2002 : Nütsüngsüba
Lai bushiba kaket Yohan aser Nütsüngsüba | |



4. Neighbourhood Fellowship

1999 küm, Tsüngremer sentong ka nung, Ministers' Hill aser A.G Fellowship nung kiyong sasep Neighbourhood Fellowship tenzük (Au, tetsürtem rongnungbo Cell Group sarasadem Friday shia küm aika agiyaa aliba mapang ka liasü). Saka sector fellowship nung aliba kibong ajak zülutena, telok shia nung kibong 8 nungi 10 tashi lemsar ita ka nung khi sarasadem akabaji ibai mezüng liasü. Küm pungu sülen 2005 küm, KABA rangben nung iba fellowship tenteta aotsü arogoi lemtet aser ita nung tasembuba deobar aonungsa agia aru. Neighbourhood Fellowship tenzükba tongtibang nükjidong kar yamai:

- 1) Kidanger-kiyonger metettepa aser meimtepa akümtsü,
- 2) Kibong shia dangi tetsüng ajemoka ia külemi khuret benteptsü,
- 3) Tanela anir aruba mapa inyaksü aser talisa sentepi marur ajungmesotsü,
- 4) Lenisütsü aser Tsüngrem o jembitsü shizüksü.
- 5) Tamanger ajak khulisür kaka kümtettsü nükjidong.

2007 nungi iba neighbourhood fellowship ya, ita nung tatembangba bodhbar akatsü arogoi lemtet. Anungji Bodhbar aonung telok sentep akatsü melena, iba fellowship kibong balala nunga akar. Aiben arogo office nungi sermon outline bener yoker aser ano aiben pei kiyonger sasep nung sentong yanglua agir.

Jubilee küm tashi nung KABA kübok neighborhood cell fellowship 273 lir. Au, item telok ajakbo tashi ita mouteter, saka teimba ka kanga jangraseta aser tashi ita lir. Iba Neighbourhood Fellowship ajanga aikati Lai azünger, khuli süteter, sarasadem takangba sütetter. Aser ajak dak alaka pei takümji Khrista khulisür kaka ta angateta kong lidir, kechi inyakdir ajak nung khuli süa alitsü tangazükba tulu pei sasa angateta inyakdagi.



KABA Father School Tesayurtem

5. FATHER SCHOOL

Alima putu 21 buba nung ajemoker aoba mapang, yimsoshiba, ketzangzüng, shisaliok, karkana aser tanelaren ajak nung kanga kara tejakleni aoba mapang, Arogo ya khenken tashi taitba, aser khenkenbo tashi maitba mapang ajurua aor. Iba tensa ka nung komasür nüburtem tanela nung mongyin küma alima tatsüba ajak kokteta otettsü ta bilemdangba khuret ka agi tonga aru. Arogo nung mangdang tasen ka, yinket mapatong ka nungdak ta mapang tatsüka toklang tenzükertem, tongtipangsa Sannukertem rongnung khuret küma lemsatapa aru. Iba mapang Arogo nung lenmang aisü nung asentenshitsü nüngdak ta angatet. Saka koma asentenshi ka nüngdak, koda yanglushitsü? Ibajibo Tsüngremer tejangja mangdang ka nüngdak ta küm ishika sarasadema aru.

2007 küm Arogo ya teyanglushiba ka nung aintsü asoshi toklang tenzükertem kanga bendanga agüja sarasadema aliba mapang Tsüngremi mangdang ka agütsü. Ibaji "Arogoi Tebur juri dak khen rangloktsüla" ta tetuyuba agütsübaji liasü. Alima rangben nung aliba Arogotemji toktsür, Ao arogotemji reprangdangra tetenzük nungi tang tashi 'Tetsür, Lanur, aser Tila tanur' yanglushitsü, yindaktsütsü asoshi arogo tongpen nungi kongsang sangshia oa item telok balala asoshi tanela jenjang, shisatsü terenlok, taküm awashi sentongtem ka sulen ka küm nungi küm tsüngda sentong tapu balala yangluja agir. Saka tebur kija atema sentong balaka anebalua agija maru. Oda kümsülusü nung khen khen Men's seminar katsüba dak alaka, lenmang aisü nung talisa tamangbaren nung tebur kanga atsüngzüka



akümba takzüteta aru. Ibaji ajanga kibong nung tebu kati pei teinyaktsü, office aser loktiliba nung pa nem nungloktsüba mapa aser ajak dak alaka kibong aser arogo nung paji putir, tamang nung lenir asütsü Tsüngremi ajaba mejangjai kümadoker amai ajiteter.

Tsüngremer tetuyuba mangdang dak rangloker Arogoi teburtem asoshi küm 5 metitemi, küm shia sentong tongtibang anabenben agitsü lemtet. Iba sentong teinyakdak kümnabuba 2009 küm khen agir tanabuba agitsü lia, ABAM Executive Secretary ajanga Korea nungi Father School agitsü asüngdang. Tsüngremer mangdang angateta, 2009 August KABA Father School mezüngbuba Jubilee Memorial Centre nung tesayur Korea nungi parnok 6 arua iba sentong Pastortem, Deacon teinyakdaktem aser temulunger ajak agi tebutem 56 iba sentong nung tena temoatsü aser takok nung katet. Iba sentong nung atener tebur ajaki tebu ka asütsü Tsüngremi ajaba tali tejangjaba angatetdang pei sasa pei taküm bushitsü tenzük aser temoatsü tulu anguba mapang tajung ka liasü. Kibong nung temelenshi tulu adok, iba ajanga kidang alir kinüngtsüi anir chirnurtem den tesentaktep aser temeimtep lua bener aru aser arogo nunga tajangzük tulu bener arutsü.

Tsüngrem temoatsü balala agi neburtem den jembiba aser ajangshiba tulu ngua, ya shitakba Tsüngremer mangdang aser tetuyuba ka ta tali rajem. Adangji Father School nung mezüng atenerkem ajaki, iba sentong ya asen lima asoshi putu den apet tanabuba Revival lir ta lemsatep. Anungji 2010-2012 Fellowship ajak nung Pastortemi anir Father School graduate temi yaritepba küm nung anabenben katsü. Aser tang KABA nung züngsem Father School graduate ajak agi 818 lir. Mangdang nung küm 5 ta ayuba ama 2008-2012 tashi nung temoatsü aser temelenshi tulu nung tempang. Iba nung graduate temji Arogo, loktiliba, office aser tongtibilanga kibong asoshi temoatsü taküm kaka lir. Tebur melenshiba jagi kibong nung temelenshi adok, kibong melenshiba agi Arogo nung asentenshi adok aser Tsüngrem mapa nung teyariteper tajungtiba kaka aküm.

Tsüngremi iba putu tebutem dangi asentenshi sentong ka agütsübaji Father school ya asütsü ta pa tenüng asanger. Kong Tsüngrem sentong lir yangji temoatsü, taneptsü, yimjiyimjung, tesünep aser teinyaktsüa lir. Tebutemi kadang tebu ka asütsü ajaba angatet, idangji pa teinyaktsü angateta Kibong, Arogo, yimten aser loktiliba ajak nung terunem tajung adokdaksür. Adangji Father School ya Kohima Ao Baptist Arogo Mission mapa tongtibilang rongnung ka ta agizüka iba temoatsü ya arogo atena oagi, Ao arogotem aser tanga kin arogotem aika nung katsüdagi. Father School ya temoatsü tulu aliba dang masü, rongsen jenti amshia akatsüsa akümer, saka ya KABA nem nungloktsüba Mission ta tangatetba nung 2013 küm nungi tenzuka arogo atena oa katsüba tang tashi nung 17, ano aika nung katsütsü sentong lir.



KABA KÜM 75 JUBILEE



KABA Father School Reunion Sentong

6. Tajung Samaria

Meimchir ka asoshi Tsüngrem nungi süshia, nisung nungi süshia teyaritep ya kanga nungdaker. Yisu tesayuba nung kati ka meimtsü, yariteptsü aser tenzükteptsü shia lir. Yamaji Pai tenzük aser asenok Pa tsüngsü nung jajatsü nungloktsür ao. Kohima Ao Baptist Arogo tenzükba mapang nungi samanirtemi tejungnüba aser yarinüba jakla yimya ya kanga junga angateta inyaka aruba otsü nungjagi angateter. Iba mapa ya Kohima arogo züngsemtem, külemi aliba kin nüburtem, aser Kohima atena oa alima tesem balala nung tongtibangsa yimya mopung agi bener arutsüba yipru mopung, menoknok, tzümetsüng, kitsük-kirong aser ayawara tatalokba nung teyari agüja aruogo. Item maparen inyaktettsü Tsüngremi nüburtem nem tejangraba adokdaksüba tang masü saka rongsen jenti moaja inyakdaksüba asoshi Tsüngrem tenüng sangdi.

Alima yina aoba den timtem lendong, tashidak, maka-mait tia aika asenok rongnung alinungji, tabensaba, tesademba aser teimba tongtettsü atema 2004 küm nungibo Arogo nung ibai ministry ka ama inyaktsü "Tajung Samaria" ta tenüng jar, item maparen ya tongtibanng sür inyaker.

1. Cancer tashidak agi shiranger
2. Stroke asüba aser kidney majungertem atema
3. Tashidak tapu balala agi shirangertem
4. Kanga dang timtemertem
5. School nung azunger tanur fee magütsütetertem
6. Yimya mopung agi bener arutsüba timtem balala agi adonger
7. Kitsük kirong lendong
8. Tasürtem kibong atema
9. yimya sempet balaka nung asoba nüburtem atema
10. Sensak tia ajururtem atema

Item amala maparen balala teyari agüja aruba iba ministry ajanga kanga meranga, teimba tongteta inyaktsü arur. Item ajak ya Tsüngremi agütsüba ministrytem lir. Anungji Tsüngrem nem tenüngsang aser tetushi agütsür





Tápu

MISSION AND EVANGELISM MINISTRY

KABA MISSION TAMENDAKDAK: *Yisu Khristai Nungloktsüba Tenyaba Mapa Tulutiba tashi angaa, tamanger shia Khrista kuliser kaka kümdakja indaktsütsü aser kin ajak dang osang tajung sangdonga tanela anir aruba mapa Yisu maru tashi inyaktsü.*

Kibuba Yisu Khristai Arogo nem nungloktsüba Tenyaba Mapa angateta, Kohima Ao Baptist Arogoi 1963 May 5, mezung mission tenla saru. Iba anogo nung sarutetba ajak agi sen semer tuku ser paisa tenem liasü (Rs. 39.50p). Iba sülen Sayutsüngi Committee ka tenteta, tenyaba mapa tulu inyaka ao. 1977 küm Arogoi 'Osangtajung ya pei arogo atena or nübur shirnoki Tsüngremer tekümtet osang mangashii ali parnok atongtsüla' ta tangatetba yur Mission Board ka tentet. Mezüngbuba Mission Board züngsem 6 liasü aser Convenorji Mr. N. Bendang (Mepungchuket) shim. Ao arogotem aser Naga lima arogotem ajunga nung kodang Tsüngremer Tanela tesemdangba tulu ajanga asentenshi adok, 1978 küm KABA ji MISSIONARY AROGO asütsü telemtetba agi. Anungji küm shia Mission Sunday ka amongtsü aser iba den Deobar shia nikongdang sentep ka agia yangji mission tenla bendena aru –tangbo iba mission tenla Honibar aonung sentep shia bendener.

February 1979 küm KABA nung Mission Week küm shia February tanabuba hopta nung amongtsü lemtet. Iba mission week sentong ajanga arogo Mission mangdang tejangjaba aser tuluba kümdaktsü, aser arogopurtemi Missionary arogo ka akümtsü asoshi jangraa aliba atalokdaktsü.

1984 küm KABA-i Baregaon Christian Training School (Mission School ta teselenbo melen) ABAM nungi küm 5 asoshi melenzüka agi (March 1, 1986 to 1990). Tsüngrem taochi ajanga schoolji class 8 tashi amenloka tur, iba School ya Wanchu (Arunachal) nunger tesem nung ayu tajungba asütsü ta tangatetba nung Longtingi bener atu aser par kin asoshi iba school ya tajungtiba ka aküm.

1989 Golden Jubilee amongba mapang, KABA mission wadang süki ulushia, tajungba, tajetba aser bendanga tagütsüba inyaktsü telemtetba agi. Iba telemtetba nungi adokba tongtibangtibaji South Bank Baptist Mission (Assam) agizüka inyakaba ya liasü.



Rev. Arenla Longchar
Mission co-ordinator



KABA KÜM 75 JUBILEE



Mission Board Members



SOUTH BANK BAPTIST MISSION (SBBM)

Christian Living Fellowship-i (CLF, Kohima) Jorhat District Assam nung Brahmaputra ayong tükümbang anüolen tip nung Bethel Christian School June 2, 1986 nung lapok. May 28, 1989 küm, Tsüngremer tesungmangtsü sayatenya jungkai adoka nisung 17 Kibuba Yisu Khrista agizüka tzu nung bapti.

1989 küm Christian Living Fellowship-i KABA dangi arua, School Headmaster ita sen agütsütsü asüngdang aser KABAi Rs. 16,800/- agüja South Bank tesem nung Tenyapa mapa tenzük. KABA Golden Jubilee February 1989 küm monger, mission field ka bushiba mapang nung, CLF-i South Bank Mission rangben KABAi agitsü asüngdang. Iba tesemi oa reprangdanger, KABA General meeting nung Arogo mission field asütsü lemtet aser March 9, 1991 küm iba mission field KABA nem bendanga agütsü. Rev. K. Lanumeren, Field-in-charge shim aser iba mission tenüng South Bank Baptist Mission (SBBM) ta melen. Mezüngbuba missionary Rev. Limawati March 7, 1993 nung commission sür Field Director yok.

South Bank Baptist Mission Arogotem :

SBBM nung arogo 5 aser fellowship 2 lapok. Arogotemji:

Bethel Baptist Church: Iba arogo nung mezüngbuba deobar sentep April 30, 1989, küm school room ka nung tetsür 3 aser tepur 10 den pastor Meren Imsong-i anir agia liasü. September 9, 1989 küm iba arogoji tenüng teta Arogo aküm aser ibaji SBBM nung mezüngbuba arogo aküm. 2011 tashi nung iba arogo nung member 177 tashi aküm.



Kalbari Baptist Church: Bethel arogo nung tamanger timbaka Kalbari yimdak nungi aruaki atenba ngua, Kalbari nung arogo tenzüksü langer ta ajitet. Anungji June 28, 1992 küm Kalbari Baptist Church tenzük. Tenla ki aser pastor alitsü ki asütsü asoshi ali ajak late Bakur aser par kibongi tenla agütsü. Cornelius aser par kibong ama (Tenyartem Mapa 10:23-48) late Bakur aser par kibong Tsüngrem dangi temolung meyipba agi SBBM kanga temoatsü angu. 2011 tashi nung iba arogo nung nütsüng 160 aküm.

Bahphala Baptist Church: Field Director Rev. Limawati mapang nung February 19, 1995 küm Bahphala Baptist Arogo lapoktsü. Iba arogo ya 2011 tashi nungbo nütsüng 366 aküm. Mezüng tenlaki Sankarchuk sector nung liasü saka Bahphala yim teyong nung RCC tenla ki yanglua August 26, 2005 nungi idakji külemtsü tenzük.

Nuel Baptist Church: 1997 küm SBBM staff kar Nuel yimdaki oagi Tsüngrem O kuli asü. Tsüngremer tesüngmangtsü O aser Tanela ain ajanga parnok rongnung mapa inyaktsü tenzük. Tebur 12 aser tetsür 5 October 12, 1997 küm Rev. Limawati-i tzüsentsü. Ano kesa küm December ita nung nisung anadi Kibuba Yisuji pei taküm nung Kibur aser Kümtetdakba ta agizüktet nung tzü nung tzüsentsü. Item amanger ajak den fellowship ka yimtsüng school takdang ka nung tenzük. Tesülen March 2008 nung tenlaki azü ki ka yanglua sentep kiji belena oa arogo tentet.

Dakhin Kolia Baptist Church: 2001 küm tetenzüklen SBBM tenzüker temi hopta shia Kolia yimdak ki ka nungi ka dangi oa Tsüngrem O kuli süa, nüngdaker nem sarasademtsü aser Tsüngrem O züluba kaket 'tracts' lema agütsü. Küm ana lir, 2003 May 10, nung tebur 4 aser tetsür 3 Kibuba nangzüka tzüsen. Iba yim nung mamangertemi SBBM tenzükertem pela agizükba aser kecha mashishie külemi lia aoba angu. 2007 January 14, Field Director Mr. Juba Ao-i Dakhin Kolia Fellowship lapoktsü aser kimong tasen mali tashi iba Fellowship ya tamanger Amorjyoti Pegu-er kima nung lia aru. 2007 nung kimong tasen ka alia azü ki tenlaki ka yanglu. January 2010 nung iba fellowship Arogo ka aküm. Parnok züngsem tang 46 tashi kümoko.

Sankarchuk Fellowship: Sankarchuk Fellowship ya Bahphala Baptist Church kübok lir. Sankarchuk tesem nung alir Bahphala tenla kidangi arutsü asoshi lenmang talang asünung parnok asoshi iba fellowship lapoktsü. Iba tesem nung aliba neburtem tejenba tenlaki nung aonung senteptem akar.

Barchapori Fellowship: Iba fellowship ya 2008 nung nisung 15-i tenzük. Parnok den Lalitimukh aser Khakanaguri nungi tamangertem arua atener. Iba fellowship ki yanglutsü asoshi ali, fellowship in-charge Biswajit Pegu tebui khen atema agutsü. Iba fellowship Neul Baptist Arogo kubok alir.

SOUTH BANK BAPTIST MISSION MINISTRIES

Youth Ministry: South Bank tesem nung Tsüngrem O janngar teimba lanurtem aser arogo züngsema parnok teimba lir. Anungji parnok lenitsü aser tesayuba agütsütsü asoshi Youth Ministry Committee ka shim. October 6, 1989 nung Youth Talent Presentation programme ka Kendra, Kalbari nung ayongzük. Iba tesem nung iba amala sentong mezüngbuba liasü. Mezüngbuba Youth Summer Camp July 27-30, 1995 lanur 30 tashi yimdak palala nungi arua aten. Parnok rong nungi nisung 6-i Tsüngrem tenzükba wadang nung toklang alitsü mulongtet. 1990 küm nungi lanur atema youth camp, leaders training, guitar training, music fest aser yamala sentongtem kaaja aru. Item sentongtem nung KABA Youth Department, Eastern Theological College, Jorhat, aser ano arogo palala nungi arua yaritep. Tangbo SBBM arogotem nung youth department lapoka youth service metitemi agir.

Children Ministry: Tila tanurji asüng asoshi lenirtem ta angateta, SBBM nung parnok dak rangloker mapa aika inyaka aru. Children's Ministry Committee ka tenteta SBBM kübok aliba tila tanur sentongtem ajak anepalu. Iba Committee nükjidongji tila tanur Khrista ama indaktsütsü, parnok taküm lenmang shitak leni anitsü aser Tsüngrem O nung anitetsü. CEEFI course 2005 küm Primary aser Junior class asoshi tenzük aser iba jagi Sunday School tajungba lia arur. Sunday School tesayur training mapang shia alir aser iba ya ajanga tila tanur tem dang koda Tsüngrem O, sarasadem aser kenten sayutsü angazüker.

Women Ministry: Tetsürtem ministry 1991 küm women evangelist ka shima tenzük. SBBM kübok tetsürtem ajak tanela aser taküm nung lenmang shitak nung jajatsü tesayuba, Women Ministry Committee ajanga sentong yanglua sayur. KABA Women Department-i Mising kin tetsürtem tejakleni anitsü kanga meranga



tanela ainba den külemi temang anepaluba, chiyungtsü yangluba aser süoshi arba tesayuba sentongtem küm nungi küm tsüngda sentong balala ajanga tesayuba agüja aru.

Kaket Reju Terenlok Aser Tajangzük: English medium Primary School tila ka lapokba nungi Bethel Christian High School tanü Secondary Education Board of Assam (SEBA) kübok nüngtoko High School ka kümoko. Iba school history nung tongtiband anogo bilemtetbaji, yangji azünger nisung 7 1991 July 14, nung Rev. Ezamo Murry-i baptitsü. Missionary Meren Imsong den par nisung tesayur 2 agi tenzükba school tang staff 17 lir. Result tajungtiba anguba kümtem 2006 nungi 2011 tashi nung tazünger 7 tashii 1st division nung pass süa ladder marks angu nung Anundoram Borooah Educational Trust Award (Computer den certificate ka ka) agütsü. School omen "Towards a bright future" (Tarutsü tajungba leni) lir. Tanga iba tesem nungbo school ajak dang nungi BCHS result tajungba angur. Iba school nung zünger Government aser private company nung mapa inyakdaki, karbo Theology, MBBS aser BE azünger adokogo.

Kiojen Terenlok: Kohima Ao Baptist Arogo ajanga kiojen tenüngdaktsütem nung terenlok aser teyari aika agütsüoko. School nung takdang tasen aika, Headmaster room, Teachers' Common Room, toilets, staff quarters, boys hostel aser warden's quarters, chapel hall boundary fencing aser tube wells yanglu. Desoi nung KABAi Field Director cum Guest House den staff aser tesayur asoshi quarter 6 yanglu. RCC sentep ki yim 4 nung yanglu. Mapang shia KABA mapangsertem lua school desks, toilets aser ki repairing tem inyaka liasü.

Ainkar Isaiai yamai shin, "Ammang nung jajar nisungtemi tesangwa tulu ka nguoko, shirnok tammang tarok lima nung alir, parnok dak tesangwa yaloktsüoko."Tanela jenjang nung dang masü saka taküm rangben nunga iba ya South Bank nung alir dak atalok. Jorhat nungi kilometer 18 dang pilaa liaka, South Bank nung alirtem electricity maliasü. Küm 7 tashi nübo aser rongsen aika endoker, July 23, 1994, nung KABA-i iba lima nung alir asoshi electricity connection agütsü. Tanü tenla ki ajak, staff quarters aser school buildings ajak nung electricity lir.

Rongsenketzüng Aser Libaliro Terenlok: Sensakba ajanga ter shilem aser tenla peria marur ta ajiteta, tamangertem rongsen jenjang ajungkettsü asoshi tesayuba agütsü. KABA tetsürtemi iba nung training aser mapa palala ajanga teyari tulu agütsü. 2007 küm nung rongsen aser libaliro ajungkettsü nüjidong nung

project "TIRUTAR HOKTI" küm 6 inyak. Iba project ya women empowerment asoshi inyak. Mezüngbuba mapa sayubaji azüben kümpa tsüngküm shitak nung bendena ayoktsü aser iba nungi ter shilem arogo senpongi bener arutsü ajungshi. Tanabuba nung südaker tajungtem nem ang talang agi agüja süpedi aser gamosa daka ayoktsü tenzükdaktsü. Ak metsüba, ajhar yangluba, süoshi arba, ku mejepba sayu. metsüjang angati alemba den külemi, konger lu koda ayimtsü 2007-2009 tashi Desoi center nung sayu. Tetsür ana Dimapuri sü arba angazüktsü aser sayutsü asoshi yoka liasü.

Loktiliba Aser Anema Aliba Nung Terenlok: Yisu Khrista asenok atema Taneptsür tajungtiba ta angatetdaktsütsü asoshi 'healing ministry' aiben inyaka aru (Shi aser tanela asoshi). Tamang ajanga taneptsü anguba aika liasü. Missionary Meren Imsong-i shiranger nem mozü malidang, mapujang tsüksaer sarasadema agütsüba ajanga taneptsü anguba kuli lir. Tsümetsüng aruba mapang KABA-i chiyongtsü, mozü aser World Vision-i rong ka ta agütsü. Iba rong ajanga teinyakertem yim ajak semdanga mozü aser chiyongtsü agütsüa senzütsü koka liasü. Tsümetsüng süitema oli KABA-i doctor 5 aser nurse 3 parnok yaritsü yok. SBBM nung aiben medical camp, aser eye camp amala, KABA nung aliba doctor aser nurse temi angati nübu teyari agüja inyak. Iba taneptsüba ministry yangertsü asoshi KABA-i 2007 küm Junmoni Patir nursing azüngtsü asoshi full time scholarship agüja yok.

KABA department ajaki mapang shia temeim kulisüba - Chiyungtsü aser süoshi ajanga ministry inyak. Yisui tila tanur meimer ta sangdongtsü asoshi Sunday School tanurtemi temeim sempet tilala yanglur Bethel Christian High School tanurtem nem bener yoka liasü. Iba sempet ajanga tanurtem kanga pelatep. KABA youth-i kilentsü yanglua lenmang merüktettsü aser süngdong aser naro atemtsü, nübur dang alima den putepa aser tebur junga alitsü sayu.

Lanurtem telungjem nung lidaktsütsü nükjidong nung asaya-oset (sports goods) balala agüja yari. Talisa 2003 nungi Late Guwal Patir, shibai ali tenla, pa tenung nung Memorial Volleyball Championship ka ayonga yim ajak nungi tamanger aser mamanger club balala atenshia toktep. Iba nung takokertem nem trophy ka den certificate aser sen ta sempet agütsü.

Arogo Tanela Aser Lenisüba Terenlok: 1 Peter 2:2-3 nung ashiba ama "Tasen asoba kinütem ama nenok tekümtet dangi aintsü asoshi tanela mamatsü temeja asoshi jangraang: Kechiaser nenoki Kibuba temeimji



tendangogo.” KABA asoshi tongtimbang nükjidongji tamanger tasen ajak tanela, taküm aser shisatsü ajak nung terenlok lidaktsütsü meranger. Ibaji atongtsü asoshi Tsüngrem O tezüluba kaketi tila nung adoktsü aser agütsütsü merang. Mr. Juba Ao-i Meren Imsong teyari agia, Mising oshi nungi English/ao nung meyipa (dictionary) kaketi ka adok. 2009 nung English nungi Assamese ashitsü kaketi aser ano Laishiba melentepa azüngba kaketi tila ka ta Juba Ao-i zülü. 2010 nung SBBM Church Guideline kaketi English aser Assamese na prongla nung züluba mezüngpuba kaketi liasü.

Mission ka atema tanela aniraruba (evangelism) ya tongtimbangtiba mapa lir. Anungji SBBM staff ajak, Field Director-i anir mapang shia tamanger aser school tanur kibong süma parnok asoshi sarasademja, sayutsüngia jaja. SBBM-i mekazüka ayuba tesem ajak nung kiboksem, yimdong nung sayutsüngiba, Osangtajung kaketi alemba mapa teti inyak. Ano drama, skit, ken atenba, puppet show aser movies sayuba ajanga Tsüngrem kuli asü. South Bank nung aliri movie kanga reprangner. Anungji movie ministry ya kanga takok anguba ministry ka liasü. India Campus Crusade For Christ, Siliguri nungi jaoka hopta ana film ministry inyaka liasü. Iba mapa tenzükertemi anir yim semdanga film sayua jaja.

Ken atenba ya Tsüngrem kuli asüba nung tongtimbang shilem ka. KABA-i ken kaketi 4 tashi, Dr. Bilash Pegu, Khagen Doley, Meren Imsong aser Rev. Limawati teyari agia yangluogo - Mising Masar Nitom Potin (1992), Mising Revival Nitom Potin (1997), Mising Hymn Book (1998), Khristan Kumnam Nitom (1999). Item kentem 2008 nungi 2009 tashi KABA music department nungi music tesayur oa sayua aru. Harmonium tesayur ka shim aser lanur tajung music janrar arogo shia nungi shimteter sayu. Guitar aser drum training tejangrar asoshi sayua liasü. Tekülem tajungba aser tejangraba akümtsü asoshi, arogo shia nem guitar, tabla, harmonium aser tambourine alia agütsü.

KABA staff, deacons aser lenirtem mapang shia SBBM-i oagi pastoral ministry, church administration, deacon aser arogo lenirtem training, arogo rongsen kedangsüba training, Vacation Bible School, Sunday School tesayur training, Bible Study, discipleship training, evangelism, arogo tasen yangerba aser temang kumzüka anema aliba tesayuba agütsü. Tanela temeshi mapa aser tanela asüngsashi asoshi revival sendong mapang shia ayongzük. KABA Evangelistic committee aser Sarasadem Committee nati revival, taneptsü meshiba sendong aser kiboksem nung yaritepa liasü. Mezüngbuba Revival Hour KABA Evangelistic Committee ajanga 1995 October 27-29 nung agütsü.

KABA tongtimbang nükjidong rongnung kaji arogotem ajak nung tanela lenir adokdaktsütsübaji liasü. Anungji 1992 nungi tenzüka Mising tamanger nungi nisung 17 tashi B.Th, B.D, M.Th aser Bible Course ita ishika Assamese oshi nung azüngtsü asoshi yok. Ano SBBM staff kar India lima tesem balalai evangelism aser church planting training agitsü yoka liasü. KABA-i tesayur aser field staff küm 20 tsüngta nung aika shima maparen balala inyakdaktsü. Parnok 91 shimba nungi 74 Christian liasü. Tanemi parnok sasa nokdaktsü merangba nung asen nisung 2005 nungi küm shia terara agientsü tenzük aser tatem nung Mising nunger full time inyaker 6 dang anüng. Item ajak ya Tsüngrem leniba aser Pa temoatsü ajanga, anungji sentsüwangshi aser tetushi, kunang ajak Pa meyong lir.

Silver Jubilee amongba sülen December 28, 2011, nungi parnok sasa arogotem aser school ajak bener otettsü ta ajitetba den tamang katet nung, KABA-i missionaries ajak meyiba agien saka ano parnok tanela aser rongsen leman nung küm 5 (2012-1016) tashi teyari agütsütsü terenemba lir. SBBM Ministry idaki tatembang akümer masü saka Takam Mising Baptist Kebang (mungdang) nem January 2012 küm tamang katetba tulu den parnok pei neburtem rongnung telongjem aser tesünep nung külemi Osangtajung sayutsüngiba ajanga Tsüngrem yimli ululoktsü (Corinthians 13:11) teyimla tulu nung agütsüoko.

TENYABA MAPA NUNG NATIONAL ASER INTERNATIONAL MINISTRY DEN:

Küm 20 tashi South Bank Baptist Mission nung inyaker, KABA-i tenyaba mapa awaloka aser nükla tasen nung aotsü nüngdak ta ajiteta, toklang missionary aser shortterm missiponary yokba nung temolung agüja arur. 2006 küm mezüngbuba international missionary KABA-i Cambodia-i yok. Iba sülen 2007 nung missionary teacher ka Thailand-i Great Commission, Thailand, den tangatettep nung yoka liasü. Mission Board-i missionary yoktsü tongtimbang ta ajiteta 2007 küm guideline ka renem.

KABA-i Ao Baptist Arogo Mungdang den amalitepa tangatettep nung mission mapa nung yaritepa arur. Iba sendakba nung item nisung nem ita sen agüja aru: Impur Hope Center Counselor, Tirap Missionary, Clark Memorial Higher Secondary School Headmaster, ABAM Mission Fund Mobiliser. ABAM missionji asenok ajak meyong ta tangatetba nung küm shia grant agüja arur. Impur Bible School nung azüngertem Nagaland nungi dang masü saka Myanmar nung alir Naga nungera tena aliba ngua KABA-i girls Hostel yanglutsü asoshi tenla 2014 kum agütsü.



2007 nungi KABA-i, alima nung aliba Mission agencies palala den amalitepa (partnership) missionary yoktsü asoshi lemteta ayu. Anungji Nagaland Missions Movement (NMM) den telongjem nung missionary-tem yokdar. Tongtibangsa India lima yimti tulutem aika nung Naga Christian Fellowship pastortem yoka khulisüba mapa tulu inyaktagi. 2007 nung JMC nung NMM retreat ka ayongzüka ali. Andhra NMM mission field nung kum aika sen aser nübu agi yaria arudaki. NMM Mission week amala nung KABA nung züngsemtemi kanga dang mulungsoa tenla agüja arudagi. KABA-i India Evangelical Mission missionary ka U.P nung yaridar. National Fellowship of India den tesendaktep tajung ajanga West Bengal nung missionary ka yarir. Tzüyim atena alima talangi missionary yoktsü asoshi rongsen aika aoer, saka mission partners teyari ajanga asenoki Cambodia, Thailand, Uzbekistan aser Indonesia nung missionaries yokteta lir. Iba partnership ajanga KABA-i tang national missionaries 16 aser international missionaries 3 tashi yua lir.

Christian telongjem aser teyaritep tanela nung, KABA-i Baptist World Alliance, Asia Pacific Baptist Federation aser Nagaland Baptist Church Council ajak yaritsüsa Tsüngremi maongka agütsüba asoshi Pa tenüng ulutsür.

KULISÜBA MINISTRY: 2012 nung adianu Elea Hereh South Baptist Bank Mission nung Evangelist inyaka aliba, anir arua Dimapur nung non-local den Tsüngrem osang lemsatepba mapa tulu nung yuja lir. Iba ya kanga takok anguba outreach ministry ka kümoko aser asenok ano küsa kulisüba Dodhu colony nung inyaktsü bilema lir.

Iba den külemi Kohima nunga Bengali Outreach Ministry February 9, 2014 nung Evangelist Kamal aser Bharati Chakraborti tokja lir. Tsüngremi Garo Baptist Church, New Market nung ita shia deobar ka agiteta tekülem bendanga agiba ajanga Pa mapa inyaktsü maongka agütsüba atema pelar.

Siliguri nung Leadership Training Centre, den tangatettep nung Arogoi evangelist 5 tashi yoka lir. Assam Valley Baptist Mission aser Kohima Metei Baptist Church nung evangelist ka ka yuja lir. Evangelism nung laishiba alemba ya 2005 nungi tenzüka inyaker. Tsüngrem O tamanger ajak asoshi kanga nüngdak ta angateta, KABA-i 2005 nungi Thailand nung Karen refugees aser outreach ministry Dimapur nung laishiba angati jenti lema arur.

INTERNATIONAL MISSIONARIES



David Walling & Family



Limakümla



Lanuyanger



KABA KÜM 75 JUBILEE

NATIONAL MISSIONARIES



Temjenmongba Sempo & Family



Benjamin Kichu & Family



Arep Tzüdir & Family



Meyi Ozükum & Family



Temjensenla Dzuvichu



Toshi Jamir

AROGOTEM NUNGITBA: Alima ajak asoshi Khristar Arogo ka ta angateta KABA-i arogo tilatem nem mapang shia teyari agüja arur. Arogo kar nung pastor ita sen agüja aruogo. Tang KABA-i Zeme Baptist Church, Nagabazar, pastor aser United Baptist Church, United Adivasi Village, Karbi Anglong, pastor nem ita sen agütsüdar. Dimapur Ao Baptist Arogo den lemsatepa Delhi Ao Baptist Arogo Youth Director indang ita sen 2012 nungi agütsür. 2011 nungi küm shia arogo tila 5 shimer, pastori sermon tajung yanglua tamanger tanela mesütsü aser aintsü aser arogo library renloktsü atema kaket alia agütsür.

TANEPTSÜ ASER TAOCHI MINISTRY: "Avila nunger St. Theresa-i yamai zülu - Khrista temang mali saka kü temang nung alir, Pai ni ajanga sarasademer, ni ajanga mapa inyaker, kü tenük ajanga angur, kü O ajanga jembir, kü teka ajanga mapa inyaker, kü tetsüng ajanga jajar aser kü mulongjang ajanga meimer". Yisu-i loktilibaren tebilemtsütem atema mapa agi sayuba ama, shiranger aser makamaiter yariba ama, item tesayuba KABA nung kanga tongtiband mapa ta agir. Rongsen agi anüngakonger aser shiranger asoshi kanga aria bilema KABA-i March 1990 nungi Free Health Clinic tenzük. KABA züngsem tang masü saka tanga kin aser tsümar-a tena nisung 5000 tang tashi nung yaria aruogo. Yisuji taneptsür tulutiba ta amanga mozü aser temang reprangba ajak angati den Sarasadem Committee temi sarasadem agütsür.

Taneptsüba ministry ya Tsüngremi Arogo nem nungloktsüba mapa tulutiba ka ta angateta 2010 küm nungi Healing & Prayer sentong ya ita shia tanabuba Brehostibar anepdang 6:00 am nungi tenzüka toklang tenzüker aser taneptsüba sempet teshitetba sempet akar counselor temi iba sentong ya anebalua akar. Shi aser tanela nung shirangba neburtem aika taneptsü aser temoatsü anguba khuli lir. Kin balala nüburtem mesüra bendanglen nungi arua iba sentong nung shilem agia temoatsü angur.

KABA-i Mokokchung nung asen nübur ajak ajangzüksü atema mapa karbo inyaktsüla ta tangatetba nung, Dr.Imkongliba Memorial Hospital nung 2012 küm bore-well ka tuja yaritep.



SHISATSÜ RENLOKBA NUNG TEYARI: Nisung shisatsü renlokba nung yaribaji hon dang nungi taoba, kechiaser iba ajanga nübur jenti aluruba aser terenlok angutsü. Iba teyimla nung KABA-i theology azünger aika nem scholarship agüja arur. Ano theological college-tem, Serampore Bible College, Eastern Theological College, Oriental Theological Seminary item nem sen teyari agüja arur. Union Biblical Seminary Principal ita sen küm asem tashi agütsü. Küm aika Clark Theological College yaria arur, 2013 küm KABA Chair on Biblical Studies nüngtem nung endowment fund ka lapoktsü. Iba sen yagi CTC tesayur ka teti ita sen agüja aotsü.

Lanur aser tila tanur tem mission mapa nung jangra indaktsütsü nükjidong nung mezüngbuba youth mission camp 2006 nung ayongzüka liasü, aser 2012 nung mezüngbuba children's mission camp ali. Mapa mangur sensaker yaritsü mechi nung Project Ergon ajanga 2010 nungi lanur mapai meiteteritem computer training agütsür. Timtema aliba tanur ter nem tuition angati agütsür. Teka mapa lanur dang sayur aser chiyongtsü yangluba lanur aser tain tem ajak dang sayur. Mungdang tila tem nungi arogo lenirtem training agüja yaritsü nukjidong nung Dynamic Leadership Training sentong ajanga 2012 küm nungi mungdang terka nungi arogo lenirtem küm asem tashi refreshers course agüja arudar.

MISSION ALU TSÜNGDONG REPRANGI Aoba: Missionary tem otsü angashiba aser parnok asoshi sarasademtsüba aser agütsüba agi teperi masü. Asen arogopurtem oaki tenük agi ngua, mission inyaker den külemi teka amuoka ajangshiba den parnok tepela aser tekangshi ajak angutsüji kanga tongtiband lir. Iba nükla nung mezüngbuba mission trip Thailand-i oa liasü. Nisung 15, telok ana lemsar ministry tesem ana nung inyak. Thailand-i aoertem ajak pei aoba bhara (travel expenses) molungsoa agütsü.

2007 küm nungi lanur mission mapa nung jangradaktsütsü asoshi field trips ya küm shia ayonger. Ibaji ajanga aikati mission nung inyaktsü temolungtetba agiogo. 2007 nung telok ana Indo-Bhutan Frontier Mission aser Bihar-i anir ao. Mission compound parnoki meraktettsüba, prayer walk aoba, tracts alemba, sentep balala nung ken tena khuli asüba aser school tanur den Tsüngrem O lemsatep. Item tsüngdong reprangi aoer rongnungi nisung 3 tashi missionary kümoko. Tsüngdong reprangi aoba shia mission mapa tasen angateter aser ibaji ajanga aikati khulisüba aser pei akokba mission mapa inyaktsü jangrar.

SHORT TERM MISSIONARY: Leo Tolstoy-i ashi, "Kü dak Tsüngrem tenzüksü mesüra metenzüksü tashi lir. Pa tenzükra ni asoshi tajung bendenloker aser alima rangben asoshi tajung. Pa metenzükra ni asoshi tajung tesama aser alima asoshi koba ni tajung yanglua agütsütettsü liasü aji samatsür." Tamanger shia Tsüngrem tenzüksü asoshi pai ajar aser iba mapa atema Tanelai sempet agüja lir. Tetenzük nungi Tsüngremi nisung shia nem sempet agütsübaji amshia Pa tenzüksü aser sentsü wangshidaktsütsü nukjidong nung meimchir yanglu. Iba dak ajemdaker short term missionaries ya mission field balalai yoker.

2013 nungi arogoi KABA züngsem shirnok tajaba aser tejangraba lir, parnok short term missionary ama ita ka mesüra küm ka asoshi inyaksü yoker. Missionary tem 15 tashi Siliguri nung tepetzük tanur dang sayutsü asoshi, Chandigarh nung college students dang sayutsüngitsü asoshi, Thailand nung Karen nunger dang English sayutsü, ABAM Nocte mission school, Arunachal, nung Laishiba sayutsü aser Ao Senden Arogo nung youth ministry asoshi yoka liasü. Mapang tatsü ka dang süaka, item missionary temi tasü ita Tsüngrem O aser temeim sayuba ajanga taküm aika melenshitsüoko. Amanger ano aika Tsüngremi iba ministry asoshi ajatsü.

MYANMAR NAGA PROJECT: KABA asoshi Myanmar Naga nunger den tenyaba mapa inyakba ya tasen ka masü. Myanmar nung alir asen nisung asenoki aiben mesemdangaka, asen sarasadem nung parnok teti tena aroko. Küm aika parnok pastors aser evangelists ita sen agüja arur. Myanmar nungi arur theology azünger aika nem KABA scholarship agütsür. 2012 October nung Mission Board members ishika Myanmar arrtsü nung aliba yim ana tashi semdang. 2013 nungi parnok tanishir tajungba kumdaktsütsü (Leadership development) nukjidong nung arogo tenzüker nem Wakka yim koba Arunachal aser Myanmar arrtsü nung lir, idakji agütsü. Tanabuba training October 2014 nung Thanamir yimdak koba NBCC kübok lir, idakji agütsü. Tang asenoki Kaisan Baptist Churches staff 3 nem ita sen agütsür aser Hungya Mission nungi tazünger 10 tashi yaritsü tebilemba lir.



MISSION TENLA: KABA mission ministry Tsüngremi asenok nem moatsü nung Pa tenüng asanger. KABA-i total income nungi 20% mission asoshi agiteta ayur. Department ajaki mission asoshi rongsen bendenba mapa inyaker. Tila tanur tem mission nung tensemtsü nükjiding nung 1993 February 14 nü parnok nem envelope ka ka lema nisung shia pie akaba nungi kechi tenlateter aji agütsütsü ajungshi; tanu tashi parnoki maneni tenladar. 1996 nung Mission Board-i shirnokisa sen Rs 100/- aser tema tenlar, parnok ajak Mission Partners akümtsü lemtet. Iba Mission Partner sentongji joko mali saka tanü tashi tamanger ajaki kanga molungsoa KABA Mission Week nung aser honibar aonung sentep nung tenladaki. Tenyar Paul-i Rome nunger dang bendanga agüja tenlaba taküm ka ka alitsü ayongzüka lir. Anungji asenoka asenok akaba rongsen moshia ayutsü memerangi Tsüngrem asoshi tenla agütsüba ajanga Pa yimli yangerdak tendi.

Mission department küpok tongtibang committee ana lir. Sarasadem aser Sayutsüngi, item committee ajanga Home aser outreach Mission nung kanga terenlok kaa inyakba indang aika nungi tatsü agi yamai:

SARASADEM COMMITTEE:

Kohima Ao Baptist Arogo nung 1977 küm Revival tulu adoka jentipur Khrista agizükba tejangja meteta aküm. Ibayongji Arogo tanela, tamang aser Tsüngrem mapa inyakba nung kanga bendanga agütsütsü tenzü. Anungji amangbapur Tsüngrem den tesendaktep tajungba nung maneni aotsü, aser arogo sarasadem nung tali akanga alitsü, aser sarasadem nüngdakba purtem ki tonga tsüngtong oa yaritettsü nükjiding nung sarasadem committee ya 1978 küm tenzü. Tangbo iba committee nung züngsem 128 aser fellowship 7 nung Block balala yanglua maparen jenti inyakba rongnung kar yangi shisemer.

- (1). Ita nung Mezüng Bodhbar Aonung Sarasadem:- Tetenzükdang iba sarasadem ya ita nung mezüng Hombar aonung sarasadema arur tangbo ita nung mezüng Bodhbar aonung iba sarasadem ya committee lenisüba nung temoatsü ngua agir. Iba mapang Arogo nung teinyaktsü maparen ajak, shilumanemer, toklang tenzüker, yimsüsür aser lenirtem, Arogo nung netsüng neburtem ajak aser alima nung tatalokbatem, pei taküm bushiba aser Tsüngrem tenüng asangba nung temulung agüja Tsüngrem dang sarasademer.



KABA KÜM 75 JUBILEE



Sarasadem Committee

- (2). Sarasadema Jajaba (Prayer Walk):- Kohima Ao Baptist Arogo nung iba maparen ya 2000 nungi tenzüka iba ya inyaka arur. Tanü alima nung temenen mitsa laodaktsütsü asoshi Lai tesayuba nung ajemdaker sarasadema jajar. Iba sarasadema jajaba mapang, koba tesem nung cari lendong bulua ajurur, kong yi aser meyim mozü achiba aser ayokba lir, rarabangsen teti adokba tesem, office balala, süngyanglu külemba tesem, alima shi jangraba benjong bentsü akadak tesem, lenmang kong ali anenzüka aluba teti alir, tzümetsüng aruba tesemtem ano jenti, item amala tesem ajak nung sarasadema jajar. Kohima atena Assam lenden, Aolima aser tanga tesemtem, kong timtem aser teraksa adokdaktsüba lir yangji temenen aridoka sarasademer. Iba ajanga takokba jenti ajangshiba meteta inyakba ngua arudagi.
- (3). Sarasadem sentong balala ayungzükba: Kohima Ao Baptist Arogo nung sarasademba maparen ya kanga tashi angudak ta angateta sarasadem tapu balala iba committee ajanga ayonga akar. Lumiba, yinzü, sarasadem yinzü, aonung memejangi sarasademba, lokti sarasadem. Iba ajanga taneptsü, takok, temaotsü jenti ngua arur.
- (4). Kimoker Ministry:- Kimoker ministry ya 2011 küm nung tenüng jateta tenzük. Iba kimoker ministry ya shirnok tain kümer tetsüng agi temang makoker, tenük tenarong anüa akümba agi kima yimtung nung sadema mesenzür, mesüra tashidak agi menepbadokba ajanga kimoker kümadokba lir parnok den inyakba mapa lir. Deobar nekongdang parnok kidangi or tanü devotional sentep nung kechi lai azüng, kechi ken, Tsüngrem O koma jembi tatsütiba nung parnok dang ashir.
- (5). Timtem aser shilumanemer teyari den sarasadem:- Iba committee ajanga arogo nung shilumanemer, timtemer kidang aser hospital balala nung sen teyari den sarasadem agi yariba. Sarasadem committee ajanga inyakba mapa tajungtiba rongnung kaji ibai lir. Iba dak alaka kiboksem aser counselling maparen nung shilem tulu agir.



SAYUTSÜNGI COMMITTEE:

Kohima Ao Baptist Arogo ya tenzükdang, mezünpuri anir tenyaba mapa nung kanga temulung agüja tenzük. Liyonga arur 1963 May 5 nungibo sayutsüngiba committee ya tenzük. Iba committee ajanga Kohima nung dang masü atena oa sayutsüngiba, Lai O tesayuba aser tajungshiba agüja jaja. Iba maparen ajanga Kohima aser Dimapur telongtet nung kong asen kin telong junga ali Arogo tenzüksü ajungshi. Iba ajanga Dimapur Ao Baptist Arogo, Diphubar Ao Baptist Arogo, Air Field Ao Arogo, aser Sangtemtila Arogo tenzüksü Tsüngrem O tesayuba den teyari agüja liasü.

Iba committee ya Mission and evangelism ministry küpok convenor ka aser secretary ka den Block balala shia leader kaka den member ajak agi 133 tashi lir. Iba committee yagi tongtibang mapa ana repranger.

- (1). Sayutsüngiba mapa: Iba committee ajanga arogo nung aser arogo atena oa KABA tenüng nung semdangba, Revival sentong katsüba aser tanela maparen balala nung yaritsü nübu meshidang aser nüngdak ta ajitetdang oaki yariteper.
- (2). Kiboksembe: Arogo nung küm shia kibong ajaki tua Tsüngrem O tesayuba tajung aser sarasadem den counseling agüja tanela nung mesüba mapa inyaker.



Sayutsüngi Committee (tetsürtem)



KABA KÜM 75 JUBILEE



Sayutsüingi Committee (teburtem)



Mission Department Kübok Free Tution Class Tanurtem aser Tesayur



KABA KÜM 75 JUBILEE



Tápu

WOMEN MINISTRY



Rev. Yashila Jamir

Associate Pastor, Women Ministry

Kohima Ao Baptist Arogo tenzüka, kanga junga amenteter küm 13 tashi Tsüngremer tesüngmangtsü temeim aser taochi agi anir aruba den, ano tanabuba alima ajak rara anener tensa tesüngjemba kümteta alima tebur tajung süngtonglidong jenti den ki-o-jen jenti raksaka, nüburtembo tesünap mulungsentsü agi kokteta aoba tia; Aor kibong timba renlokba temoatsü nung Arogoji tashi taitba ao. Anungji iba mapang tetsür telongjem sentep tenzüka aotsü Pastor asür Bendangwati (Mongchen) aser Arogopurtem den shisa mulung lemsatep. Parnoki mulungbena temelaba agütsü nung 1952 July 3 (Brehostibar) anogo asür Aiti Mopungchuket (W/o Kümbo Angami) lar kidang mezüng Kohima Ao Baptist Arogo Tetsür telongjem sentep tenzüka. Panüji ojala nunger parnok 12 sentep. Parnok rongnungi Mrs. Aiti Tesayula asütsü shimtet. Parnok tenüngjibo koda züdoka meyutsü nung yamai zülua yutsür.

- | | |
|-------------------------|---------------------|
| 1. Mrs. Aiti | <i>Mopungchuket</i> |
| 2. Mrs. Moamenla | <i>Mopungchuket</i> |
| 3. Mrs. Koramongla | <i>Mopungchuket</i> |
| 4. Mrs. Nüngshitola | <i>Mopungchuket</i> |
| 5. Mrs. Immensangla | <i>Waromong</i> |
| 6. Mrs. Chitensangla | <i>Longpa</i> |
| 7. Mrs. Merenlemla | <i>Aonokpu</i> |
| 8. Dr. Imtisangla | <i>Changki</i> |
| 9. Mrs. Kilemsüngla | <i>Changki</i> |
| 10. Mrs. Sentimongla | <i>Changki</i> |
| 11. Mrs. Debola | <i>Changki</i> |
| 12. Mrs. Nüngsangmongla | <i>Waromong</i> |

Parnok rongnungi Tesayula asütsü Mrs. Aiti shima la KABA Arogotsür mezüng Tesayula aküm. Iba mapang nungji Kohima Ao Baptist Arogo Tenla ki maka asününg kibongtem nung dang melentepa tetsür sentep agia liasü. 1957 nung KABA tenla ki mezügbuba yanglua joko tenla kidang sentep agi. Yamaji mezüng Arogotsür





Tenzüklatem

lenirtemi pei taküm, sempet bendanga agüja tenzüka Arogotsür kimong takang yangerteta yutsüba yong tanü asen KABA Arogotsür ya tashi Tsüngremi ajungketa moatsüogo ni! Tanübo ojala nungertemji teimbaka kotak nung lidar. Parnok tasütait, tamang tulu, shisa taka, tarutsü nükla aser mangdang tulu akaba ojalatem liasü. Tanü Jubilee mongertemi menungra-a parnok bilemteter aser parnok nem akümtsübu, tetushi, tenüngsang tulu agütsür.

Joko küm ishika lia arudang nütsüng aika renloka aküm nung 1971 March ita nungi tenzüka kiyong 4 lemsar ita nung Brehostibar 3 kiyong nung sentep agi aser tatembangba Brehostibar sentepji külemi longjema agi. Yamaji telongjem, temeim, teyaritep nung Tsüngrem Tanela Temeshi tawapangba aser leniba nung KABA Arogotsür ina, süki ulushia aser lenirtem melenteba arur. 2002 küm Hon Jubilee "Asen nükdang ibai tesüngmangtsü" (T. Ken 118:23) omen nung takok aser temoatsü tulu ngua among.

HON JUBILEE SÜLEN KABA AROGOTSÜRI INYAKA ARUBA KAR:-

1. Learners' Cell - KABA Arogotsür Hon Jubilee 2002 July 6 & 7 among dang Resolution renemba tongtipang kaji KABA Arogotsür asoshi Learners' Cell ka akatsü ta lemtetba ama, committee ka shima 2003 October 13, mezüng meeting mena iba mapa tenzük aser iba committee dang "Learners' Cell Management Committee" ta aja.

Learners' Cell Nükjidong "Khristan Taküm libaliro tajungba nung aintsü atema" ta yur 2004 nungi tenzüka taküm 2014 tashi agia arudaki. Iba Learners'cell nung KABA Arogotsür rongnungi nübu tajung aika-di pei mapang, sempet aser shisatsü, rongsen agüja kecha ta-a magi-i dang sayua arur. Learners' Cell nung item subject tem sayur:-

- 1) Christian Education- Kibong nung libaliro, kinungbo-kinungtsü tsüngda tesendaktep, tanur o tsürabur tesendaktep, tamanger ka libaliroyim, kibong nung Tsüngrem noksa ngutetdakja kibong anitetyim, yamala tesayuba agütsür.
- 2) Health Education- Kibong ajunga anema alitsü nung tetsü teinyaktsütem, HIV/AIDS, Hygiene, First Aid yamala tesayuba doctortemi agütsür.
- 3) Cooking/baking- Koda chiyongtsü balala jenjang talangba agi pei kidang renemteta chiyongtsü, temang asoshi tapet chiyongtsü renemba, talubusa süngjanglijang aser aonsotsü balala anguba mapang pickle, juice, jam yamala yanglua ayutsü sayur.



4) House keeping /Home economy- Kima aser kilong koda merüka tobur junga ayutsü, ano senotsü timi amshiba ajanga kibong nung tiptema aser pela-a, anüngakong makai litettsü, taruba aser teindokba medemdanga rongsen/senotsü ketdangsütsü sayur.

5) Mother's craft- Nüngdakba osettsüset tilateri pei sasa yangluteta amshitsü sayuba, naro yangluba, süoshi arüba, card yangluba item sayur.

6) Etiquette- Yimya awashi- tanü ama tashi temetet agi sünger aliba lima aser putu nung, kidang aser kimayimdong, lokti balala nung, aientsüinlen senzusenpong ajak nung tagizüktetsü aser tapet yimya awashi nisung shiai meteta alitsü kanga tongtipang asünung, iba dak sendakba kanga rajema tesayuba agütsür.

Tesayurtem ajak KABA züngsemtem nungi küm 3 atema shima pei dak apet subject sayur. Arogotsür Home Mission nung iba ministry ya kanga dang tejang atangba mapa ka ta angateter.

Iba ya tongtipangsa kiyim lanutsürtem asoshi tenzük, saka aier chanutemia jangra-a parnok asoshi lapokjang ta mepishiba ajanga aiürtem atema temeja class agia aru. 2004 nungi 2014 tashi nung Learners' Cell nung graduate asür 1000 dak tema lir. Teti class metenzükdang devotion minute 10 agia tanela temoatsü agir.



Learners' Cell Managing Committee

2.LITERATURE MINISTRY:

1. Miim Shiti: Teburtem dak alaka tetsür miima dang sayubentsütsü lenmang aisü lir ta ajiteta kaket ken o, zülubanglu ajanga item ministry inyaktsü mechi 1988 nungi tenzüka shiti tila ka KABA Tetsür shiti ta jar adoka aru. Ibai ajanga tanela chiyungtsü aser libaliroyim aika angazüker ta angateta KABA arogotsür saseb asoshi kaket ka adoktsü arogotsür Hon Jubilee nung renem. KABA tetsür ajak tanela chiyongtsü kasa agitsü nükjidong nung "Mi-im Shiti" ta tenüng agütsü aser 2003 nungi Editorial Board ka shimteta küm nung anaben adoker. Iba shiti nung Lai tesayuba, articles balala, taküm khuli, aser Medical Doctortem nungi anema alitsü tesayuba balala, chiyungtsü anübaluba den tamalen KABA Arogotsür tenzüklatem, ajaki shilem tajung agia, tetsür ajungmesoba sempet balala agi nübурtem ajak temoatsü ngudaktsür. Tanü tashi nung shirnokisa iba ministry nung shilem tajung agiogo parnok ajak dang KABA 75 Jubilee tenüng nung pelaba lemsateper.

2. Laishiba leni meyipba (Back to the Bible):

Iba sentong ya 2012 küm nungi tenzüka KABA tetsürtem asoshi küm shia ita tataktet lateta yur agia arur. Iba sentong ya Khristan tetsürtem Laishiba angatetba, bushiba aser



Miim Shiti Editorial Board



iba nung tera yanga, Laishibai sayuba ama Tsüngrem meteta alitsü nükjidong nung akar. Kohima Ao Baptist Arogo nung aliba Laishirtemi tesayuba tejangja aser tarok bushia agütsür. Iba sentong ajanga tetsür aika tajangzük tulu ngua chichiba Khristan taküm ka litettsü aser Laishiba den teti metetpela alitsü angatetdaktsür. Iba sentong asoshi Laishiba nung Tetsür 31 agiteta kaket ka Rev. Yashila Jamir Associate Pastor Womeni zülua tetsür ajak nem agüja lai bushidagi.

3. CHRISTIAN WOMEN LEADERSHIP BUILDING TRAINING: KABA nung lanutsürtem tashi temetet akaba den sempet tajung bener jenti lir. Tarutsü nung Arogo aser lokti balala nung lenir tajung kaka akümtsü ta ajiteta 2011 nungi tenzüka küm shia anabenren lemsar iba leadership building training akar. KABA nung pastortem aser resource persons jaoka tesayuba tajung agütsür. Item subjecttem nung sayur- Personality development, Effective leadership, Communication skills, Baptist traditions, Homiletics , grooming etc.

4. KABA TETSÜR SPECIAL DAY: Tetsür aika sempet tajung jenti bener liaka aiben munguteti yutsür. Anungji küm nung ken sempet balala agi Tsüngrem kulisüba aser pei dak kechi sempet keta ali ibaji tajungba amshiteta Tsüngrem sentsüwangshidaktsütsü nüngtem nung ajungshitepa Tanela benjongmong ta jar monga aru. Iba sentong nung Kentenba, Tsüngrem O sayuba, sempet balala agi kulisüba item amala sentong agia arur. Iba ajanga tetsür aika tejakleni oa tenzükba balala nung pei yari Tsüngrem tenzüktsü angatetdaktsür.

5. KABA AROGOTSÜR SPIRITUAL AWAKENING : Küm shia arogo sentongtem metenzükdang anogo asem atema iba sentong akar. Iba mapang nung Tsüngrem o tarok jembir aser tanela kentener telok jaoker. Iba sentong ajanga tetsürtem tanela nung saksalemdaktsür, taküm renemshidaktsür, küm tsüngda arogotsür teinyaktsütem asoshi tsüngkang medemshir aser tashi tasen meshir. Iba ya tetsür aikati yongyaseta aser menungraa ataba sentong tajung ka lir. Iba ajanga tetsür jentisa jenti temoatsü ngua arudagi.

6. HOLISTIC MINISTRY: Tsüngrem O kisüng sayuba dang masü, saka Khristan kibong ka koda timi achaayangtsü aser ochi shia Tsüngrem aküm tsüba pei keti aruba mapang, sempet, rongsen aser temang anema lia itemji tajungba nung achaayangtsü khristan tetsü aser tetsür kati meteta alitsüla,

ibaji tangatetba nung yur, iba ministry ya Home aser Outreach mission mapa küma inyaka arur. Iba ministry ya kanga dang tajangzük akaba mapa ka, koba ajanga tetsür aika tongteta temoatsü angur ta angateta küm aika inyaka arudagi. Iba ministry nung tongtipangsa item tesayuba agütsür. Khristan awashi, anema alitsü, rongsen timi ochishia ketdangsüba, temang asoshi chiyungtsü shitak sorochiokba, amtsük aser tanur asoshi tiffin yangluba, tendoktsü oset agi tagitsü oset yangluba, Christian education. Yamala khristan tetsür kati meteta alitsü sayur. Iba ya tongtipangsa Learners' Cell ministry ajanga adokba temoatsü ka ta züngshir.

7. SANCTUARY FLOWER CLUB (SFC) : Tekülemi arur ajaki Tsüngrem tebur ajungba meteta külemtsü asoshi tenlakidang tsüngküm mongpu den apet tebur tajung Naro metenba agi Tsüngrem tobur ajung tali shisangdaktsür.

Laishiba nung reprangra Tsüngrem tekülem kidang tebur tajung narotem inoka yangluba angur. Tongtipangsa Solomoni yangluba tenlaki nung naro balala inoka yangluba Laishiba nung zülua lir. Asen Arogo tetenzük nungi tekülem tenlakidang naro metenba bilemteter. Aki mapangbo Arogotsür temulungertemi lemsaa Deobar shia tenlakidang naro metenba nung shilem tajung agiasa aru. Iba ya ministry tongtipang ka ta angateta Church Flower ministry ta jateter inyaka aru. 2001 küm nungi tenzüka Sanctuary Flower Club tenüng jateta iba club mezüng tenzükdang parnok nisung 20 shi Mrs. Narola Mayang convenor sür kanga dang tashi ita inyaka aru. Tang lenir aser club membertain melentepa tanü tashi Arogotsür rongnung Flower ministry tajungtiba rongnung ka küma inyaka arudagi. Ministry rongnung tongtipang ka asünung Annual Budget enoka iba ministry inyaker. Iba ministry yagi asen Arogo atena oa tangar telok balala den yaritepba arur. Arogo tongtipang nungdaktem nung naro balala anebalua metentsü aser bushitsü S.F.C nung Convenor, Co-convenor aser Secretaryi anir Club membertain 20-30 shi küm 5 atema shima arogo nung tangar tenzüker ama parnoki iba ministry achaayanger. Nüngdak nung amshitsü atema Church Flower Garden ka tenzüklatemi JMC kima anepalua iba atsüki nungi agizüka tenlakitem nung naro metener.





Sanctuary Flower Club (SFC)

8. KABA KÜPOK MISSION MAPA NUNG MANENI YAMAI INYAKER:-

1. HOME MISSION:

- a) Timtemer, shiranger, tasü tamar rongsen aser sarasadem agi yarir.
- b) Seminar, Retreat, kiyong training etc. akar.
- c) Tetsür Tenet Telongjem (T.T.T.) akar.
- d) Kiboksem akar
- e) Prayer Cell akar.

2. OUTREACH MINISTRY:

- a) Theological students 7 nem kümshia scholarship agütsür.
- b) Missionary (Urban) salary agütsür.
- c) Holistic Ministry inyaker. Home aser tanga arogotem aser telok nung akar.

3. Golden Jubilee resolution mapa dak alaka KABA Mission field SBBM nung Arogotsüri temulung kanga agüja mapa aika inyaka aru. Tongtipang mapa kar teküpoklen agütsür.

- (a). Arogo Sannüker training
- (b). Arogo Lai bushiba
- (c). Lanurtem aser School tanurtem camps
- (d). Tetsürtem Lai bushiba, teka mapa inyaksü sayuba-chiyungtsü wazüka ayutsü tesayuba, sü atakba aser arrba.
- (e). Tirutar Hokti (Tetsür tashi) tenteta socio-economic development mapa aika nung yaritep. Tetsür tenüng agiaka iba ministry ajanga tebura aika tajangzük angu.

4. TIRUTAR HOKTI NÜKJIDONG:

Khristantsür ajaki Tsüngrem akhüm tsübua, ochishia meranga inyaksü. Taküm sasü anema alitsü aser ochishia Tsüngrem nem tenlatsü. Yamaji iba ministry ajanga parnok aika ajangzükogo ta amanger.



5. SBBM tenzüker küm ka KABA member kibong kati agütsüba dak alaka tetenzük nungi tatem tashi Arogotsüri field Director ita sen agüja aru.
6. Golden Jubilee Resolution nung aliba ama Andhra Pradesh NMM Mission field nung Arogo tenlaki ka sütsü aser anaben tashi luagi revival, women leadership training aser children rally agüja liasü.

Tirutar Hokti Inyakba Tongtipang Mapa Kar Yamai :

Ak alitsü aser ki (ak ki) yanglutsü asoshi loan agütsüba. Material (süngküm, poly sheet) agütsür, pei sasa bathroom aser latrine yanglua amshiba. Khümba (Silk cotton) yimtsüng aser temekut nung aliba bendena yoker sen aa aruba aser parnoka kidang pillow aser mattress yanglua amshitsü sayuba. Ku alentsü tesayuba agütsü. Sü ataksü aser itemji yoka senotsü aatsü. Parnoki sü atak shia liaka kodanga taka mayoker. Anungji iba mapa ya parnok asoshi kanga tajangzük akaba aser mapa tasen liasü. Joko SBBM Silver Jubilee mapangbo parnoki atakba sütem alia nüngdakba sempettem nung amshi. Mushroom cultivation training agütsü.

9. Aotsür rongung mezüng ordained aser mungdangtsür lenir Rev. Dr. Noksangla, la joko mapa nungi sodi agir aser tasoba küm nunga tain kümogo. Lai taküm peyong bendanga agüja aser meranga Tsüngrem tenzüka atema, la dang pelaba aser tetushi sayua 2012 nungi tenzüka ita nung Rs. 3000 agüja arur.
10. KABA nung Thanks giving sentep aser Father's Day sentep Arogotsüri achayanga agir.
11. KABA Arogotsür maparen aika aliba den teimba tongteta inyaktettsü nükjidong nung 2003 september ita nungibo Full time Secretary ka shima tang tashi inyaka arur.
12. 2002 Hon Jubilee sülen tetsür aikati melentepa tenzüka aruogo, parnok tenüng yangi mezülüaka, office record tejangja lir aser KABA Arogotsür tanela taküm jangrua tanü tashi lidaktsübaji parnoki bendanga tenzüka yong lir. Tsüngremi parnok moajangma.

- 13.** 2002 Golden Jubilee Resolution renemba rongnung ano kaji NMM Mission Field Andhra Pradesh nung tenla ki ka Jubilee tenüng nung Rs. 75, 500/- agi yanglutsü ta lemteta aliba ama Rev. Lanutemjen Missionary-i achayanga renemtsü.
- 14.** KABA arogotsür ajaki shilem agia teka mapa inyakba nungi tajangzük rupees six lakhs angu. Iba sen amshia 2008 küm Clark Theological College, Principal ki yanglutsü. Ibai arogotsür mission mapa rongnung ka lir.

1952 nung Tsüngrem Tanela Temeshi-i koma jembia ajungshia ojala nunger ishikati Tsüngrem tatenba aser leniba meshia sarasadema KABA Arogotsür telongjem tentet, yamaji dang Tulusang Tsüngremi Pa taochi tashikang küpok Kohima Arogotsür tanü tashi anir aruogo. Mapang aser tensa den apet tetsürtem nem Tsüngremi sentong balala agüja itemji inyaka arudang mejembimaba temoatsü aser takok jenti KABA-tsür taküm shiai agia arudar. Lenirtem aser tenzüklatem melentepa inyaka arudang tetsürtem rongnung temeimtep, teyaritep aser telongjem nung Tsüngrem Tanela Temeshi-i len aniba tejangja meteta liasü. Kohima yimti telongtet nung dang masü, saka Ao lima aser Naga lima tesem balala aser kenkenbo Naga lima atena or-a kulisüba mapa inyaktsü Tsüngremi aser Arogoi maongka agütsüba ajanga KABA Arogotsür-ang tali temoatsüba süogo. Item ajak asoshi Kibuba Tulusang nem tetushi aser tenüngsang agütsür. Kibuba tenüng sentsüwangshi süang!





6

Tápu



Mr. Tiatoshi Longkumer
*Director,
Youth Ministry*

YOUTH MINISTRY

Kohima Ao Baptist Arogo(KABA) küm 75 ajongdang arogo nung lanur küm 13 nungi 35 tsüngda tenüng teta zülua alirtem ajak agi 2392 lir (tetsür -1202 tebur -1190). Parnok ya asen arogo senmang lir, aser Tsüngremer sentong dang süra KABA küm 100 ajungdangbo parnoki tang dang nungi ano mangdang tuluba nung Tsüngremer mission inyaktsü. Aji oda, Kibuba Tsüngremi asen arogo nem senmang tulu moatsüogo, aser item lanurtem ya lai o tesayuba nung ajemdaker tim lenmang nung anitettsü tamanger shia asoshi nungloktsüba wadang kümdi (A. Shin 22: 6).

KABA Youth Ministry koma tenzük aser shirnoki koma inyaka aru item otsürentemjibo teimba ka Kohima Ao CYE Küm 50 Nüngo kakat nung angutsü. Iba zülu tapak nung ya KABA Youth Golden Jubilee April 27th & 28th 2002 sülen koma inyaka aru item otsürenji teimba angutsü. Ajisüaka, KABA youth ministry 1952 küm tenzüker arudang tongtipang tatalokba otsütem karbo tanü inyakyim den medemdanga zülusema angutsü. Asen arogo nung lanur tenyaba wadang indang zülutsü atema KABA Platinum Jubilee Souvenir committee-i tapak telatet ka dang agütsü nung yangi tongtipangtem dang tongmelang agi zülur. Atangji, office record-tem nung aliba otsütema aikadang iba tapak nung mezülusemi lir. Arogo nung telok ajak abensa kakat tapak kesasa lemsar KABA Platinum Jubilee Souvenir committee-i iba maongka agütsüba asoshi lanurtem ajak tenüng nung pelashishia asen lanur tenzükbawadang osang tatsü agi lemsateper.



KABA YOUTH MINISTRY INDANG TEMETETTSÜ KAR:

KABA nung youth ministry ya 1952 küm Mr. Ngampa Konyak, Mendenbuba aser Mr. I. Teka Longchar (Changki), Tongti Tezuluba ta sür tenzük. KABA küm 75 ajongdang Youth department-a küm 62 tain akümer. Tepelatsüka, 1952 nungi 2014 tsüngda Tsüngremi asen arogo nung lanur lenir tetangshi jenti moatsü nung tanübo item lanur lenir aika sorkar tenzükba mapa nung aser arogo tenyaba mapa nung takok ngua nokdaka lir. Yisu Khrista nem dang tenüngsang aser tetushi konang ajak agütsür.

Youth ministry tenzükba nükjidong tulutibaji lanur shia tanela nung ina arogo nung tamanger tajung kümdaktsütsü nükla nung lir. Iba tangatetba nung ajemdaker, lanur teimba tongtettsü mechi arogoi lanur tenzüker nüngdakba nübu tasen shimoka lanur den tenyaba mapa inyaka arur. Tang (2014) youth department nung Youth Director ka kübok Crusader Chaplain ka aser Youth Evangelist 7 den voluntary youth leaders parnok 205 shi lir. Item tenzüker ajak teka amteper tanü asen arogo nung lanurtemi Tsüngremer wadang tulu yimya balala nung inyaka arudagi.

PUTU TASEN NUNG LANUR TENYABA MAPA NUNG TEMELENSHI:

Lanur teimba tongtettsü aser kibok teimbai ia Tsüngrem o agi atongtsü nükjidong nung 2005 nungi tenzüka kiyong shia nung Youth Evangelist ka-ka part-time post nung shim. Youth evangelist ka teinyaktsü tongtipangtibaji home visitation aser person-to-person ministry, aser pai/lai Youth Director den akokba ajak nung kiyong lanurtem den tanelaren mapa ajak nung yaritepa inyaker.

2012 küm arogo nung youth ministry evaluation ka agi aser iba nungjagi tongtipang temelenshi kar adok. Item rongnung, arogo nung crusaders' ministry (25 years & above) ya kanga tongtipang ta angateta youth department nung Crusader's Chaplain ka Term Post nung shim. Tanabuba nung, 2013 küm nungi tenzüka evangelist-tem mapang tatakzük agütsür inyakba yimya (12 hours per week) melenshi.

YOUTH DEPARTMENT NUNG CRUSADERS' MINISTRY:

Youth department kübok Crusaders' Chaplain küm 5 atema arogoi March 2013 nung shim. Crusaders' Chaplain den volunteer Crusader Secretary ana aser kiyong shia nung crusader representatives shimer crusader ministries ajak takok ngua inyaker. Crusadertem asoshi tongtipangtiba ministry kaji Hospital Ministry, koba dang The Open Door Ministry ta ajar.

Crusader's hospital ministry ya 2004 küm nungi tenzüka Kohima Civil hospital nung inyaka arur. Sector youth fellowship 7 nung aliba crusadertemi anir ita nung anaben civil hospital nung shirangertem teshimtet kar semdanga rongsen den sarasadem agi Tsüngrem temeim lemsateper. Adangji, T. Mapa 20: 35 nung, "Tagizükba dang nungibo tagütsübaji tali temoatsüba" ta ashiba ama The Open Door ministry ya crusadertem asoshi kanga dang temoatsü anguba ministry ka süa arudagi. Ano küm nung khen parnoki timtemer aser maka-maitertem anepaludak tesem (eg. Orphanage, Blind school, Old Age home, Mother's Hope, Mental hospital etc) semdanga temeim mapa inyaka teyari agütsür. Iba dak alaka, youth department-i nungloktsüba wadang ajak nung yaritepa aser ita shia senteptem temoatsü ngua agia arudagi. 2014 nungi tenzüka KABA crusaders aser Dimapur Ao Baptist Arogo crusaders na joint-venture ministry kar inyaker.

YOUTH DEPARTMENT NUNG COMMITTEE BALALA TENYABA WADANGTEM:

Putu tensa den peta arogo kübok aliba lanurtemi tenyaba wadang jenti awa-oa inyaka arudagi. Oda junga shisadanga, tang teinyakdak ministry karbo küm 62 tsüngda tajungba nung asentenshia inyaka arubatema lir. Saka alima renlokba aser meimchir shisatsü ainba den sütepa lanur tenyaba wadanga yimya tasen aika renloka aoer aser yamaji youth department nung tenzüker nübua teimba küma Tsüngrem mapa tulu lanurtemi inyakdagi.

2012 küm nungi tenzüka youth department nung committee tongtipang pezü (4) kümtetshi. Yamaji committee shia nung Convener ka kübok kiyong shia nungi Assistant Sponsor ka-ka tener office-i lemozüksüba ministry takok tulu ngua inyaker. Ano iba den külemi kiyong ajak nung cell-group tesep aika tenteta Cell-Group Committee convener ka kübok Cell-monitors peria shimer tamanger teloki maruba lanurtem aika cell-group ministry ajanga Khrista dangi anir arur.



Youth department nung tang tenüng teta aliba Committee pezüji: Mission & Prayer, Worship & Music, Evangelism & Social Service aser Creative Art & Drama. Mission & Prayer committee ajanga lanurtem rongnung sarasadem sentongtem aser outreach ministry-tem achaayanger. Tongtipangsa, Prayer of Gethsemane, koba Brehostibar anungdang shia ghonda ka parnoki ayonga sarasadem mapang alir. Worship & Music committee-i kiyong aser general nung tekülem sentep sentong anepaluba den külemi praise & worship nung shilem agir. 2001 nung youth department-i sentep nung tetushi & tekülem anitsü asoshi lanur telok ka shimteta Praise Fountain ta tenüng agütsü. 2012 nungi Praise Fountain telokji Worship & Music kübok ait aser convenor ka lenisüba nung tetushi & tekülem sentongtem, arogo aser ano tanga tesemtem nung shilem agir. Youth department nung mesüra NBCC (Nagaland Baptist Church Council) aser KBYF (Kohima Baptist Youth Fellowship) nung volunteer mapa aser sai-sapong (Games & sports) sentong ajak nung iba committee-i anir inyaker. Ano kibong shia nem program agütsüba Evangelism aser Social service committee-purtemi inyaker. Ano iba committee-i evangelism mapa nung Mission & Prayer committee den külemi yariteper. Creative Art & Drama Committee tentetba tongtipangtiba nükjidingji lanurtem dak aliba sempet balala bushiteta arogo nung Tsüngremer khulisüba mapa inyaktsü asoshi lir. Creative Art & Drama committee-i tang inyakya aliba tongtipangtiba ministryji "We Can" ministry lir. We Can ministry ya yimya balaka nung asoba takümtem (Differently Abled People) den evangelism mapa inyakba sendong ka lir. Iba ministry ya 2013 August 2 nung tenzüka lanurtemi inyaka arur, aser küm shia August ita mezüng deobarji "We Can" ministry sentep alir.

YOUTH DEPARTMENT TENTET INYAKYIM:

1978 July nungi tenzüka kiyong lemsar lanur telok tentet dang Youth Meet ta jaa aru. Aser 1995 nungi KABA kübok Youth Meet tenet (7) tenteter, Youth Meet I – VII (Bayavü – I, Town Area – II, Merhülietsa – III, Minister's Hill – IV, Chandmari – V, A.G. – VI, aser Lerie – VII) ta amshia aru. 2013 youth department Küm Tatem Senden nung sector youth telok dang Youth Meet ta tenüng ajaba nükjiding aser tetezü shisadanga jembiteper külen joko arogo inyakym den liromedema sector Youth Fellowship ta melenshia amshir. Ano ABAMYD züngaren inyakym koba 1984 nungi Ao arogo ajak nung amshia arur, iba telemsa tenüngtem nung Cadet club (13-16 years) ta alibaji Tweens Club aser Crossroad (17-20 years) ta alibaji General youth ta melenshia jar 2003 küm nungi amshia arur. Tang youth department general office nung Youth Director ka kübok Office bearers 6, Sponsors 7, Advisors 7, Evangelist 7, Committee Convenors 6, Impact Editors 5, aser Crusader's Chaplain den Secretaries ana ta lir.



KABA KÜM 75 JUBILEE

2014 KABA Youth Leaders



2014 KABA Youth Leaders with Advisors



2014 KABA Youth Advisors



Crusader Chaplain & Secretary



KABA KÜM 75 JUBILEE



Committee Convenors



Youth Evangelists



Impact Editors with YD



KABA KÜM 75 JUBILEE



Office Bearers with YD



Sponsors

KABA YOUTH DEPARTMENT TELOK BALALA DEN TESENDAKTEP:

KABA youth department-i ABAM youth department aser Kohima Baptist Youth Fellowship (KBYF)-i nungloktsüba wadang ajak nung teka amteper inyaka arur. Tongtipangsa, ACYE convention sendongtem nung ABAMYD-i tetushi & tekülem (Praise & worship) sayutsü aser anitsü nungloktsüba nung KABA lanurtemi shilem tajung agia arur. 2004 October 20-22 mapang Tuli Lenden Baptist arogo nung 67 buba ACYE convention alidang KABA youth department-i Praise & Worship indang tesayuba agüjaa liasü. Ano 2012 May 1-3, ABAMYD Triennial Conference Impur nung amongdang Praise & Worship agiba yimya tasen nung kenten ania tesenteper ajak temoatsü ngua liasü. 2009 küm ABAM youth department-isa ayongzükba sentong, "City Ministry" dak sendakba nung KABA youth directori anir Bangalore nung Aor lanur alidak ki-tem sema telongjem sentep agia Khrista temeim nung ajungshitepa liasü. Item dak alaka, ano ABAMYD tenüng nung NBCCYD mungdangtem nung shilem tajung agia yariteper. Yamaji, KBYF sentongtem nunga KABA lanurtemi akokba ajak nung shilem tajung agia arudagi. 2013 KBYF Choral competition nung KABA lanurtemi tanabuba jenjang nguteta YAMAHA piano tajung ka sempet ngua liasü. Ano KBYF sports aser tekülem sentep ajak nung KABA lanurtemi shilem tajung agia arudagi.

YOUTH DEPARTMENT NUNG TANELA ASÜNGSASHI SENTONG:

Youth department-i tanela asüngsashi sentong tajung küm shia ayonga lanurtem jenti Khrista agizüka taküm melenshir. Putu tasen nung KABA youth department ajanga tanela asüngsashi yimya tasen ka nung inyakbaji Praise and Prayer Festival sentong 2013 June 21-23 mapang Heritage complex, Old D.C. Bungalow, Kohima nung agia liasü. Iba sentong nung Rev. Dr. Richard Howell, General Secretary, Evangelical Fellowship of India, New Delhi aser Rev. Bendangtoshi Longkümer, CEEFI tongti o jembirtem liasü. Kohima town nung aliba lanur temolunger ajak jaoka iba sendong agi aser noklang aika sentepa Tsüngremer sentong tulu atalokba mapang ka liasü. Praise and Prayer Festival mesükba yimya ka nung ano Tweens (13-16 years) atema tanela benjongmong ka (Tweens Spiritual Fest) August 15 & 16, 2014, Molu Ki, Merhülietsa colony nung monga liasü. Iba tweens fest nung parnok 295 den tweens guides aser youth leaders ajak meyokteper nisung 350 shi tena asentenshi tulu atoka liasü. Iba fest nung tweens-tem parnok 14 full-time ministry asoshi tenangzükba agi, parnok 76 agi Yisu Khrista agizük, aser 144 agi tenangzükba agishia liasü.



Taoba mapangtemji meypa bilemdangra, Kohima Ao Baptist Arogo otsü nung lanurtem asoshi mezüngbuba tanela asüngsashi sentong (Youth Summer Retreat) akabaji 1969 küm June 25 – 29 nung agia liasü. "Ibai Tsüngremer tesüngmangtsü mapang ka liasü" ta Kohima Ao CYE Küm 50 Nüngo kaket nung zülusema angutsü. Iba retreat nung lanur 41 atenba rongnung parnok 5 tashi Kibubar wadang nung bendanga agütsü aser ano aika temolung meypa arogo nung tamanger tajung aküm. Atangji, 1969 retreat sülen KABA lanurtemi Naga lima tesem balala nung osang tajung sangdongba mapa tenzük ta otsü ajanga angateter.

KABA LANURTEM ASER OUTREACH MINISTRY:

Lanurtemi KABA Mission department den teka amteper India aser Naga lima tesem balala nung mission mapa inyaka arur. Telok ana-asem lemsar mapang-mapang nung lanurtemi Ao arogotem semdanga Khrista indang khulisüba den arogo tesendaktep yanglua arur. Tongtipangsa, 2013 aser 2014 kumbo KABA kübok aliba youth fellowship tenet (7) pronglai Aolima nung arogo ka-ka semdanga khuli süba mapa inyak. Iba ya ajanga tanela nung asüngsashiba den, lanurtem pei sobaliba aser oshi-oben angazüker. Ano Ao arogotem tia tali tejangjaba meteta akümer. 2014 nung Ao Baptist Arogo Mungdang (ABAM)-i Ao lima nung yimtsüng arogotem den yaritepa tenyaba mapa inyaktsü ayongzükba ("Back to the Village") ama ABAM youth department den angatettepa KABA lanurtemi Aosenden Baptist arogo nung aliba lanurtem aser kibongtem den tanela wadang nung yaritepa arur. Aser iba ama ministry ajanga Aosenden arogopurtem dang masü saka KABA lanurtema jenti Tsüngrem tanelai jembia temoatsü tulu ngua arudagi.

Mapang-mapang shia arogoi Naga lima atena or lanurtem mission exposure yoka tajangzük tulu ngua arur. KABA-i South Bank Baptist Mission field (Jorhat, Assam) achayangba mapang lanurtemi iba mission field nung sayutsüngiba, leadership training agütsüba aser teka mapa inyakba sendongtem nung yaritepa liasü. 2012 September nung lanur lenir teshimtet 25 shi Youth Director-i anir Shillong-i Prayer & Mission journey ka ao aser iba journey ajanga taoertemi issue-based paper pongu (5) tashi renemer lemsatep aser itemji Impact Magazine nung adok. Ano 2014 küm October ita nung kiyong ajak nungi teshimtet lanur 22 shi Aizawl, Mizoram-i Church study tour ka ao. Iba study tour aoertemi Nagaland Christian Fellowship (NCF), Mizoram youth camp nung yaritepba ajanga tanela temoatsü angu.

Putu metsür ka buba (21st century) nung KABA Youth department-i Kohima town nung aliba tangar kin arogotem den tongtepa inyakba tongtipang ministry ana-ji Youth Golden Jubilee Memorial Bible Quiz (GJMBQ) aser Impact Magazine lir. 2002, April 27 & 28 nung Youth Department Golden Jubilee (50 years) amongba nüngdem nung inyaktsü lemtetba tongtipang rongnung kaji Bible quiz competition liasü. Aser iba resolution nung ajemdaker Golden jubilee planning committee-i Bible Quiz sendong atema account ka lapoker Rs. 75, 000/- (Rupees seventy five thousand only) toktsü. Iba fund-ji amshia 2003 küm nungi tenzüka bible quiz tetoktepba agia arur. 2006 tashibo iba quiz competition ya KABA kübok sector –wise dang liasü. Saka 2007 nungi tenzüka GJMBQ competition ya Inter-sector competition dang masü saka Inter-church competition aküm aser küm ana nung khen iba sendong ya alir. Taküm September 21 nung 5th GJMBQ competition ya tangar kin arogo ter (10) den KABA tener sendong tajung liogo. Aser iba ministry ya tajungba nung inyaka aotsü atema 2013 nungi tenzüka küm shia arogo-i Rs. 50,000/- (Rupees fifty thousand only) GJMBQ account nung inoktsür.

Impact magazine ya ajanga KABA youth department-i tanga arogo aika den ministry indang tongtepratepa arur. Iba magazine ya 1998 küm bi-monthly youth magazine ka ama tenzük aser mezügbuba adokji April-May issue liasü. Oda tensa mapang apir 2013 küm nungi tenzüka Impact magazine ya quarterly issue adoka arur. Tangbo Impact magazine ya Kohima town nung dang masü saka Aoli aser Naga lima tesem balala nung, aser aji oda alima kinük balala nung internet ajanga lemshir.

Adangji, tanü KABA youth ministry ya Ao lima/Naga lima nung dang masü alima tatem tonga (Global context) oa tenyaba mapa inyaktettsüsa Tsüngremi KABA lanurtem nem maongka agüjaa lir. Item mangdangtem aser maongkatem mesendoki tanü arogo lanurtemi inyaktsü sarasadema sendong tulu renemtsüla. Tanü putu nung aliba lanurtem yabo joko arogo nung tanubuti telok akümbanga ayubattem to masü. Tanü lanurtem yabo arogo nung tesayurtem lir, kechiasür alima ajonga nung tongtepratepa osang belenteperji parnok lir. Item lanurtem ya arogoi temolung agüja Khrista nung indaktsüra idangji Kohima, Naga lima, India lima, aser alima ajonga nung mission wadang tulu inyaktsü maongka lir. Tanü Tsüngremi KABA nem moaja aliba lanurtem ya tang aser tarutsü asoshi arogo senmang tulu lir, aser item yagi Tsüngremer arogo tali ajungketa inyaktsü renema lir. Anungji, KABA küm 75 ajungdang Tsüngremer senmang tulu asoshi arogopur ajak tepela aser teimla nung longjemer.





Tápu 7

CHRISTIAN EDUCATION MINISTRY



Mrs. Alice Walling
Director,
Christian Education Ministry

Khristan shisaliok tetezü "Khristan yimya ochi O otsü ajanga angazükba aser sayua nisung ka, telok ka aser lokti ka melenshitsü ajungshia yariba, aser Tanela Temeshi tashi ajanga kenyongi balaka küma Yisu Khrista ajanga tebu Tsüngremi yimsü asüba" (Robert W. Pazmino, Principles and Practices of Christian Education). Tetezü tesayuba yimya balala ajanga osangtajung lemsatepba mesüra angazükba. Khristan shisalioki taküm jaklaliro melenshia alitsü sayur.

Tazüngkunem kaket nung tanurtem Khrista metetba nung anitettsü tsürabur nem nonglokja lir (6:5-8). **Mezüngbuba** nung, tsürabur ka taküm nung Tsüngrem tama südaktsütsüla (tk 5); **Tanabuba** nung, kechi tanurtem dang sayutsü ali ibaji tsürabur mulungjang nung tama akatsüla (tk 6); **Tasembuba** nung, ibaji tanurtem mulungjang nung ajenoktsütsüla. Iba yabo tesayuba dang temaba; **Pezübuba** nung, ya mapang shia inyaktsüla (tk 7). **Pongububa** nung, asen taküm yimya ajak nung ibaji lia sayutsüla. Kidang inyaksangshi, jembishinü, gari nung senzüdang mesüra mashi mapang ka nung tanuri langka asüngdangra parnok dang timi angateta langzütsüla (tk 8).

Tanurtem atema tanela tesayur mezüngbubaji tsürabur. Saka parnok kisüngi sayutsü temela masü ta metet nung arogo nung Sunday school aser Tanurtem sentepji tsürabur nungita yaritsü yutsü. Laishiba nung tesayuba mapa ka aiben lepshia shia lir: "Ibaji kuli ana mesüra asem agi aitsütsü akok" (Tazüng. 19:15; Mathi 18:16; ii Kor 13:1). Ibai yamai angatettsü akok. Tsüraburi tamasa tanur dang Tsüngrem indang kuli asütsü aser tanabuba aser tasembuba nung arogo aser Sunday schooli kesa ochi Oji kuli asür. Yamaji tanurtem kolenisa odir taintemi kesa Oji ashir aser taküm nung benshia angur. Idangji parnoki Tsüngrem Oji angateter aser parnok mulungjang nung telemtetba ka agir. Ya atalokteta inyaktetba kibong aser lokti kaji temoatsüba.





Christian Education Board



Mezüng Sunday School tanurtem 1950

KABA NUNG KHRISTAN SHISALIOK MAPA

1. Sunday school:

Tanurtem Tsüngrem o nung indaktsütsü nungdak ta apiteta R.C. Chiten Jamir-i (Akhoia) Sunday School 1950 küm tenzük. Ajisür tenzüker balalai pa den yaritepa class teimba teimba renloka akum. 1971 küm nungi asür Mrs. Moala (Mopungchuket) Sunday School Superintendent shim. Aser 1974 küm nungi kiyong terok nung Sunday school agitsü tenzük. Sunday school Superintendent balala den tenendak tesayurtemi melentepa tanurtem dang Tsüngrem O sayua arur. Rongsen, shisatsü den Tsüngrem meimba nung tanurtem khuret angateta parnok shisa tajung agi kanga dang temulung chia sayua arudar. KABA nung Sunday school tenzüker küm 64 buba lir. Tesayur ka den tanur ter shi-i tenzükba tanübo Sunday school class kiyong 8 tashi nung tanur 2376 shi den tenendak tesayur 90 lir.

2. Child Evangelism Fellowship:

Tila tanurtem tanela nung animesotsü nükjidong nung Mr. T. Alemyanger (Changki) National Child Evangelism Institute, Nasik nung ita asem training agitsü yok. Training temer arur 1972 July nungi tetsürtem breshostibar sentepi arudang pei tanur aser kiyonger tanur anir arua tila tanur sentep ya akatsü tenzük. Tanur aika aru nung honibar anogo agi melen. Jangyu medemtsü aser tanur teimba arutettsü asoshi tenzükertem jembiteper tenlaki downstairs (main church) nung deobar shia tsüraburtem den tanurtema külemi sentepi arua CEF sentep agia aru. CEF tenzüker arogo Platinum Jubilee mong amongdang la küm 42 tain kümogo!





Sunday School tesayurtem

CEF nung tanur küm 4-12 tashi atener. CEF nung Tsüngrem o yimya balala nung angazükba dak alaka tanurtemi shilem tajung agia kulisüba mapa inyaker. Asen arogo nung tanurtem sentep ya mapang balala nung melenshia agidanga arur. Tang kiyong ti (8) nung tanur 1050 den takutet tesayur 32 ajanga yimya balala agi tanurtem Tsüngrem metetba nung aintsü sayur.

3. Küm nungi küm item schooltem ajanga Khrista akaba aser Pa lenmang nung jajaba taküm jenti adokdaksüogo. 1998 küm nungi CEF Supervisor ka kübok kiyong ajak nung tesayur shima tanurtem tekülem sentep agia arur.

4. Director, Christian Education inyakertem:

Arogo nung Sunday School aser Child Evangelism maparenji kanga tongtiband ta angateta tali tajungba inyaktsü nükjidong nung 1987 December 1 nungi full time Director Christian Education Ms. Arenla Longchar (Waromong) shima inyaka aru. Iba sülen ano kesa mapa asoshi tenzüker balala shima inyaka arur. KABA nung Director Christian Education aliba ajanga Christian education maparen tali tajungba kümdaktsüba den tanga arogo aser mungdang balala nung teyari tulu agüja arur.

5. CHRISTIAN EDUCATIONI INYAKBA TONGTIBANG MAPA KAR:

(i) Tesayur Training:

Tsüngremer tajaba tejangja meteta tesayur inyakba tenzüker jenti dang lir. Tajaba tejangja liaka mapang shia parnok renemtsütsü nungdak . Küm tetenzük nung aser küm tsüngta tesayur temeja sarasadem sentong akar aser küm shia tesayurtem training yimya balala/onük balala nung agir. Tatishitsü agi CEF nung Life Changers kaket amshitsü tenzükdang iba kaket zülur New Zealand nungi arua sayu. 2014 nungi Sunday school nung syllabus tasen Splash agitsü tenzükdang iba kaket zülur Hyderabad nungi atua sayu.

(ii) Tanurtem atema temeja sentong akaba:

Sunday school aser CEF sentep akaba dak alaka küm shia tanurtem asoshi sentong balala agiba ajanga tanela tangatetba nung aintsü yarir.

- Tasoba küm abir Summer/Winter camp akar.
- Vacation Bible school akar.





Child tesayurtem

Masadangtet Temeim / 128

- mapang shia meyi benjong, talent search amala sentong yanglua tesayuba den tetoktepba akar.
- Kidsgames akar.
- Tanurtemi Doordarshan/ AIR ajanga kuli asür.
- Career counselling/Survival sentong amala Intermediate aser Senior atema akar
- Tanurtem Ao lima semdangar.

(iii) Oshi:

Sozükli tetsü tepima nungi angazükba oshiji tetsü oshi lir. Koba ajanga tanur ka lokti nung pa shisangren (identity) meteter. Temeyoktep sobaliba ka nung alir asünung tanurtem rongnung pei oshi junga mejembitetba tebilemtsü ajiteta akokba tashi agi oshiji koda tongtimbang metettsü aser angazüktsü asoshi sentong balala inyaka arur.

1. 2003 Ao oshi nung music audio cassette album ka "Yisui Meimer" adok
2. 2014 nung tanaben music video album (DVD) ka "Yisui Meimer II" adok
3. "Ao oshi tera kar" ta sür kakat ka zülü. Iba kakat amshia Ao oshi temeja sayu aser tangbo Sunday School lesson den tensema küm nung deobar ka/ana sayur.

(iv) Mission:

Tanurtemi mission mapa asoshi agütsütsü aser sarasademtsü khuret angazüktsü nükjitong nung küm shia kenü Mission anogo monga tesayuba den tenla bendentsü 2003 küm nungi tenzük. Iba tenla nungi arogo mission ajanga theological student ka nem scholarship agütsü. Aser 2005 küm NBCC (Underprivileged Scholarship Fund) nem teyari Rs. 10,000/- agütsü. Ano iba tenla ajanga Tsüngrem mapa tuluba inyaktettsüsa lenmang angu. Pochury mungdang nung tanurtem atema Sunday school Syllabus mali ta meteta parnok atema tenla bendentsü tamang agi ayongzük. Iba nungdak peria tanurtemi tenla benden aser CEEFI Hyderabad nungi Splash kakat Rs. 92,150.00 agi alia agütsü. Joko Pochury mungdang nung Sunday school tanurtemi item kakat amshidagi.

(v) Children's Library

Technology tasen aika renloka aodang kakat azüngtsü mejangraba küma aoba ngua tanurtem asoshi library 2006 küm "Reading your way to a whole new world" omen nung lapok. Sunday school aser CEF tanurtem atema honibar shia 10:00 am – 2:00 pm iba library nungi kakat bener



aotsüsa kaket aika lir. Tang tashi nung iba library nung registered süa alir tanurtem 443 lir aser kaket 1200 shi lir.

Lanuwa nungi kaket azüngba ajanga tangazükba tenzüker. Kaket azüngba ajanga tekolok renlokdahtsür, kaket teimba azüngtsü jangradakhtsür, angazüktsü tejangraba adokdahtsür, süngjema talangba alitsü yarir, oshi tajungba jembitsü akoker, tebilemba tuluba kümdakhtsür, apitetba tashi tajungba kümtsür, ojang teimba angazüker aser zülutsü yimya balala angazüker aser tajungba zülutsü yarir. Shin o ka nung yamai shia lir: 'tanur kati kaket azüng tenzüksü kodanga karara masü'.

(vi) Temeja mapa inyakba kar:

- Tesayuba mapa nung takok ngua inyaktetbaji kinungtsü aser kinungbo teyaritep ajanga ta angateta tesayur apuani telongjem mapang mapang shia akar.
- SBBM, Kalbari, Assam nung tesayurtem aser tanurtemi kaket bendena Library ka lapoktsü atema agütsü.
- Arogo Brochure yanglu
- Laishiba ajunga küm ka nung azüngtsü adok
- Tanurtem atema Laishiba kaket 66 Ao oshi nung menunga züngdakhtsü.
- Kibongtem tekülem nung yaritsü asoshi Anogoshia Chiyungtsü 2013 küm nungi küm shia adokba nung yaritepa arur.

Khrista metettsü aser pa den jajatsü ya taküm nung tongtibangtiba alizüngji lir. Aser ibaji tangar danga sayutsü aser taküm nung shitak ta metettsü atema Khristan shisaliok (Education) tesayur kaji aja. Iba tangatetba aser nükjitong tongteta inyaktetba taküm kaji aser arogo kaji koda jangratemtsü aser tapayutsü.



KABA Golden Jubilee Choir, 1989



KABA KÜM 75 JUBILEE



Tápu

8

MUSIC MINISTRY

KABA Music ministry tejangja tenteta inyaka arubaji 1963 küm asür R. Temjen Longchar, (Waromung) mezüngbuba choir master den teintet choir züngsem metsürti-i (28) tenzük. Pa sulen music meteta alir aser tenzüker tajungtemi melentepa choir anishia aru. Arogoi moa Mrs. Ainla Bendang (Mopungchuket), 1964 küm nungi mezüngbuba arogo organist, pump organ tema devotional senteptem nung yaria aru. Ajaki kenten meimer aser jangrar saka tajungtiba akümtsü asoshi mapang agir. Pianists ishikati küm aika temulunglemteta Tsüngrem sentsüwangshi atema Kibubar arogo tenzükogo, saka parnoki inyaka aruba wadang belenzüka inyaksü mapang talangka agiakang iba jenjang tongtetogo. Tangbo lanurtem rongnung pianists adoka fellowship ajak nung shilem agiba angudang arogoi parnok dang kanga pelar aser Tsüngrem tenüng asanger.

Arogo nung lanur choir maliasü, saka 1970 küm nungi "Youth Music Club", Mr. Wati Aier-i anir Kohima nung aser anasa aliba arogotem dang masü saka Mokochung district aser Assam lenden nung aliba arogotem dangi Tsüngrem osangtajung ken tena, taküm kuli aser Tsüngrem O agi nüburtem tanela nung ajongmeso. Iba mapang Tsüngremi ken ajanga lanurtem rongnung Pa sentsüwangshi jungkai adokdaksü. Ken atenba ajanga lanur jenti mulungjang akaasodaksü, anungji Youth Music Club nung choir züngsem asütsü adianu kintem Lotha, Sumi aser Rengma nungi tejangraba tulu nung arua aten.

Kentenba nung acoustic aser electric guitar, percussions, harmonica, accordion aser trumpet amshia Tsüngrem asoshi kuli asüba ajanga lanurtem molungjang nung mi ama tejangraba adoktaksü. Tekülem nung kentenba ya kanga dang tongtibang ta tangatetba nung 1980 tetenzüklen arogoi mezüngbuba adianu Mr. N. Apok (Aonokpu) short term Music training Patkai Christian College-i yoka tangazükba tulu nung meyipa arur pai choir master inyakba den ano tekülem nung Pianist mapang talangka tenzüka aru. Küm talangka renteter kelen, Music Club melena arogo nung Music Committee ka Youth Director leniba nung music ministry anebalutsü shimtet. Iba sülenang arogoi music ministryji kanga tongtipang ta angateta 2005 küm "Music Department" lapoka full time Music Director shim. Tanü KABA Music Director -i anir Music Board züngsem tuko (9) den yaritepa music ministry inyaka arudagi.



Miss Amongbi Jamir
*Director,
Music Ministry*





KABA Music Board

KABA Hon Jubilee 1989 küm sülen, Music Committee-i kanga meranga music ministry ajanga Tsüngrem mapa aser Pa sentsüwangshi asoshi inyaktsü tenzük. Anungji, Music theory kaket menünga adokba den choir aser nütsüng nüburtem asoshi vocal training sentong tajung yanglua agiyonga aru. Lanurtem timba kaket shisatsü bushirtem Kohima doktsür tazüngi aotsüsa akümbayong "Adult Sanctuary Choir" 1999 March 7 nung tentet. Choir Master balala lenisüba nung iba "Adult Sanctuary Choir" kanga dang tashi ita anir aru. Iba Choir ajanga Arogo tekülem nung Tsüngrem sentsüwangshidaktsüba aser temoatsü ngudaktsüba tajungtiba mapang ka liasü. Mapang apir Music Committee-i anebalua choir züngsem nem music theory aser vocal training agutsüba ajanga kenten yimya tali tebur tajungba nung tenteta Tsüngrem sentsüwangshidaktsür. Music Committee züngsem shiai bendanga agüja KABA Music Ministry tajungba inyaka aotsü atema yaritepa asoshi kanga pelar. Talisa, Mr. Temjen Aier-i (Mopungchuket) ken mejema aser music sound track yanglutsüba ajanga choirtem asoshi teyari tulu angur.

KABA choiri anasa aliba Ao arogotem semdanga kenten sentong agi. Tongtipang mamatetba shilem tajung agiba kar- Aoli Pastor's Silver Jubilee 4th – 6th March 2005, 2005 küm Dimapur Ao Baptist Arogo tenla ki meshitetba sendong, Ao Theological Association Hon Jubilee 2008 küm Impur nung amongdang aser Angami Baptist Churches Council Centenary 2008 küm amongdang KABA Choiri Tenyidie oshi nung ken aten. Küm teriana (12) tsüngda nung KABA Adult Sanctuary Choiri tena aruba kentem Aoli arogotemia amshitetsü nükjitong nung music departmenti achaayanga 2010-2011 küm tsüngda "Osangtajungji Sangdongdi" ta sür ken kaket adok. Iba album ya video demo, audio track aser ken kaket staff notation nung adokogo. Iba mapa asoshi choir züngsem aser teyariteper ajak bilemteter. Adult Sanctuary Choiri Kibubar wadang asoshi bendanga agüja tenzüka aru saka March 2011 küm tenlaki tasen küma yanglushitsü sentong ajanga iba choir anentsüsa aküm. Choir züngsem ajaki Tsüngrem asoshi pei taküm aser sempet bendanga agüja ken agi kuli asüba KABAi kanga pela-a Tsüngrem tenüng asanger aser arogo otsü nung kodanga mamadoktsüsa zülua ayur.

Maneni April 2011 nungi sector fellowship shia choir director aser assistant choir director-i anir "Adult Fellowship Choir" shimteter tekülem sentep nung ken atenba ajanga shilem tajung agia arudagi. Atangji, Tsungremi moaja KABA züngsem rongnung music meteter tajung jenti alibayong arogo kanga temoatsü ngua arur. Yamaji tanü tekülem sentep nung lokti ken anitsü asoshi bendanga aguja aliba tenzükertemi Tsüngrem sentsüwangshi asoshi pei mapang aser sempet tenla-a tenzüka arudaki.



KABA Music Ministryji tarutsü asoshi tamendakdak jenjang (fundamental stage) tashi ita alitsü nüngdak ta nükla nung, KABA Music Committee-i Rev. Arenla Longchar (Waromong) asa-lentong (Brain child) nung tanurtem asoshi "Music Makers Club" 1990 küm tenzük. Music staff notation sayuba den musical instruments balala i.e guitar, percussion, recorder, violin aser vocal training aguja arur. Music tesayur agi anünga aliba ajanga tetenzük nungbo tebilemtsütem ajuru, saka tanübo music tesayur peria lir. Tanurtem 60 nungi 70 tashi, 2007 küm nungi "Associated Board of the Royal Schools of Music", UK, certificate tatitang agütsür. Iba dak alaka Tsüngrem sentsüwangshi asoshi music den sempet sala (talent presentation) tsüngsangba (choreography) sendongtem akar. MMC tanurtem aika music grade 5 tashi nung takok nguogo aser ano kar music degree tezüngdak lir.

KABA lanurtemi music ministry nung ken atenba ajanga shilem agitsü asoshi youth choir ka April 2010 tenzüksü sarasadema ataba ama Tsüngremi nübu moaja "Eirene Choir" tenzük. Greek oshi nung 'Eirene' tetezü 'Yimjung' Anungji kentenertemji Yimjung Chuba Chir asoshi osang abenertem. Iba choir len anitsü asoshi Ms. Ajeen Longchari,(Changki) Choir Director shimtet. Tanü Eirene Choir asen lima dak alaka tanga linük balala nung Kibubai tenyaba wadang Pa sentsüwangshi ken tena kuli asür. NEICC Hon Jubilee Meghalaya May 2-3, 2012 nung amongdang Eirene Choiri ABAM tenüng nung ken atenba ajanga shilem agi. Maneni Minister's fellowship, Nagaland Governor Raj Bhavan, Mokokchung Town Ao Baptist Arogo, Patkai Christian College aser Ao Theological Conference nung kentenba ajanga shilem agiba bilemteter.Yamaji 2013 küm, Kohima Baptist Youth Fellowship chorale music tetoktepba nung tanabuba jenjang angu.

Ao Baptist Arogo Mungdang telongtet nunga music departmenti tongtipang shilem tajung agia aru. ABAM-i Aoli choir mastertem asoshi music training ayongzükdang, KABA nungi music meteter tesayur ana oa yaritep. 2002 küm 'Osangtajung Ken' koba ABAM-i adok item ken computer nung typeset asü. Tanü-asüng technology amshia ken kaket staff notation nung adokba ya ABAM otsü nunga mera tasenka aser iba nung KABA züngsemi shilem tajung agiba asoshi pela-a bilemer.

Music ajanga tamanger aika Khristar Arogo nung shilem agiteter aser iba jagi tanela nung tali akasotaktsür. Pei sempet amshia Tsüngrem tenzüksüla aser Pa tenung sentsüwangshidaktsütsüla ta angateta, Talent Presentation, Musical Sunday, Music Fest aser yamala sentong ajanga music meimer aser sempet akar tamanger jentii shilem agia aru.



Eirene Choir



KABA KÜM 75 JUBILEE

Lanur shirnok music nung jangrar, parnok temulung ulua KABA music ministry aser lokti balala nung shilem agitsü asoshi arogoi 2010 küm nungi parnok asoshi sentong tajung yanglua lenmang lapoktsü. Item lanurtemi pei sempet meranga tajungtiba agi amshitsü asoshi tekülem sentep nung Music ajanga Tsüngrem kuli asütsü mapang agütsür. Anungji, tanü lanurtemi musical instruments balala amshia Teyanglur Tsüngrem külemtsü aser kuli asütsü kanga nentaka, temulung agüja pei sempet tali jangjatsü meranger.

Arogo otsü nung music tsütsü mezüngbuba music kaket adokbaji "Kohima Ao CYE Sings" 1970 küm ken kaket ka adok. Mapang talanga süir külen 1995 küm "A practical text book of Music" aser 1998 küm "Practical lesson in Music reading" adok. Music kanga tongtipang aser tali renloka aotsü nüngdak ta ajiteta KABA Music Committee-i Associated Board of the Royal Schools of Music, syllabus nung ajemdaker 2004 küm "My Music Book I" aser 2008 küm "My Music Book II" renema adok. Music Makers club nung music score zülutsü asoshi "Notebook" yanglua amshir.

Arogo nung sound systemji kanga tongtibang. anungji Sound system amshitsü asoshi lanurtem aser tenla ki chowkidartem mapang shia training balala sound engineer ajanga agütsür.

Arogo Music department tarutsü nüklaji KABA züngsem dang masü saka Aoli Arogotem nungi music jangrartem tali ajongmesotsü aser parnok dak aliba sempetji jangja-a anebalua indaktsütsü nükjidong nung Music Scholarship küm shia agütsütsü lenmang lapokja lir. Iba scholarship agia KABA züngsem nungi lanur ka New Orleans Baptist Theological Seminary, USA nung BA Music züngdagi.

Arogo küm neter pongu (75) junga arudang, KABA Music Ministry nung nübur aikati pei tajungtiba sempet tenla-a Tsüngrem sentsüwangshi asoshi inyakogo. Iba kaket nung ajak tenüng teta mezülusemaka nenok mapa tajungtem KABA-i kodanga mamatsü. Tatem nung Yisu Khrista jongkai adok dang rema maoba sentsüwangshi taküm korangji nenok asoshi yuja kar.

Kohima Ao Baptist Arogo Music department nükjidong aser tamendakdakji 1 Korint 14: 15 "*Ni tanela agi ken tendi saka ano ni tangatetba agi ken tendi.*" Iba nung ajemdaker Tanela Temeshi tashi nung ken agi kuli asüba ajanga Teyanglur Tsüngrem tali sentsüwangshir aser Pa temeshi tenüng tematiba jenjang nung ajungketer.



Town & Chandmari Fellowship Choir



KABA KÜM 75 JUBILEE



Ministers' Hill Fellowship Choir



Lerie Fellowship Choir



KABA KÜM 75 JUBILEE



AG Fellowship Choir



Merhülietsa Fellowship Choir



KABA KÜM 75 JUBILEE



Bayavü Fellowship Choir



KABA KÜM 75 JUBILEE



Platinum Jubilee Choir



Song Leaders



KABA KÜM 75 JUBILEE



Pianists

BAPTIST TAMANG TENZÜKBA ASER NAGA LIMA ATONGBA OTSÜ TATSÜ AGI - Rev. Dr. Toshi Langu



"Akhi anogotem bilemtetang, pututem aika küm indang shisadangang, nebu dang asündangang pai ne dang ashitsü..." Tazüngkunem 32:7

Khristan tamangba yimsüji (Christianity) Rom yimli merenba aser Rom chubatiba Tiberius Caesar mapang 25-30 A.D. shi nung tenzük. Iba putu nung Rom yimli nung tamangba yimsüji tsüngrem tapu balala aika meyoktepa amangba aser Rom yimli-i ramokba aser par ozüng agi amangdaktsüba yimsü ka liasü. (Mosheim Vol.1, Chap.1)

Iba putu nung Yihuda nungerji alima kin ka ama masü saka Rom yimli sünga prokshia or aliba mapang ka liasü aji saka parnoki par yimsüjibo kanga metsünga-reta benshi. Iba dakji alaka par tenlakibo Yirusalem nungsa liasü. Anungji parnoki Yirusalem bushia Tekülemi aru saka iba mapang tashi nungbo Yihuda nunger yimsüji yimya ka aser sobaliba tentet ama ka kümadoker liasü. (Mosheim Vol.1, Chap.2)

Iba ama mapang ka nung asen Kümtetakba Yisu Khrista alimai aru aser Pa nungi Khristan yimsüji tenzük. Yisu Khristai tenteta yutsüba Khristan yimsüji milung-milungi pututem süia aodang lenir balalai anir khristan lokti tentet aika lemsaa nüngja balala jateta oadok. Item rongnung tongtipang karji Lutherans, Presbyterians, Methodists, Reformed, Anglicans aser Congregationalists etc. temji lir.



Alima nung Yisu Khrista den sentaktepa aliba tamangba yimsü dak amangba nüburtem ajakji telok asem küma lemsar amshir. Iba telemsa nungji nisung kaji "Judaism" amanger ka asutsu. Aji mesüra "Roman Catholic" ka asütsü aser ana rongnungji metenra paji "Protestant" ka asütsü. Iba lemsabayim nungji Baptist tamangertemji "Protestant" telok rongnung züngsema benshir, saka Baptist telokji kodanga Protestant telok nung tena maliasü, kechiyong Protestant telokji Roman Catholic yimsü anema nokdakba agi "Protestant" ta jatet. Baptist telokji tanga Protestant teloktem amaji kodanga Roman Catholic telok nung tensema maliasü mesüra Roman Catholic nungi pakzüka or akümba-ah masü ta Baptist pastor aser otsü zülur Dr. J.M. Carrol-i züluba "The Trail of Blood" nung shia angutsü.

Tamangertem aikati Baptist telokji kodang tenzük mesüra Baptist Arogoji kong tenzük mesüra shibai Baptist telokji tenzük ta asüngdang aser metetner. Asenok ajaki asen tamangba tenzükdak teraji metetner aser aji tim, kechiyong aji angateta alitsü kanga tongtiband lir. Aji saka Baptist tamangba tenzüksang aser tetenzükdak bushitetsü temela masü kechiaser iba indang nung obang mapu lir. Baptist lipok otsü indangji telok ana aser tangatetba balala ana lir. Anungji asenoki Baptist otsüjibo telok anaprongla aser tangatetba balala anasülen nungi tsüngsü pua reprangtsü nungdaker.

1. MEZÜNGBUBA TELOK TANGATETBA NUNGI REPRANGDANGBA:

Mezüngbuba telok tangatetbalen nungjagi reprangdangra Baptist otsüji akidang Tasen Lai arogo nung amendaker kenyonji tezü balaka arua aliba asenoki angutsü. Iba tangatetba nung Baptist telokji Protestant telok rongnung maten. Protestant telok rongnung, tatishitsü agi Lutherantemi par telok tenzüksangji Martin Luther liasü aser aji Germany lima nung tenzük ta ashir. Reformed ta asüba telok jagi par telokji John Calvini Switzerland aser Netherlands nung tenzük ta ashir. Ano Presbyterian teloki par yimsü tenzüksangji John Knox aser aji Scotland lima nung tenzük ta ashir. Methodist-temi par yimsüji John Wesley-i tenzük ta ashir. Item khristan telok balala ajakji Reformation sülen nungi tenzüka aru saka Baptist telokji Reformation marudang küm noklang aika tejaklen tenzükadoker liasü ta temalen agüja aliba Baptist otsü ajanga asenoki angur.

Iba tangatetba nungjagi teraji bushiyonga Baptist ta ajaba tamangba telokji shibai tenzük ta asü nung nisung ka tenüng tuteta asenoki mangutsü kechiyong aji mali. Saka asenoki tera tashiji toyonga luagi tenüng kar agütsüdi ta süra Dr. Vernon C. Lyons-i ashiba agi asenoki tenyartem tenüng kar tatishitsü agi Yohan ama, Peter ama, James aser Paul ama agütsütsü akok, kechiyong Paul dak alaka parnok ajaki Yisu Khrista den jajaa pa nungi angazük aser parnoki Yisui kechi sayu aser Laishibai kechi ashir aji dang shitak ta amang aser iba Tsüngrem oji taküm O aser tematiba tashi ta agizük aser aji sayu. (Mesüra Yohan Baptitsüsang nungi Baptist telokji tenzük ta asü nung koda? "John the Baptist", kechiyong Yohan Baptitsüsang temang ajunga rema baptitsüba dak ajemdaker asenok Baptist teloki yamaji baptibaji dang shitak ta agizüker. Iba o yabo kü mulung nung bilemdangba o ka dang lir).

Temalen agüja aliba tenyartemi sayuba amaji tanüa Baptist tamangertemi kasa tamang temzüng aser tesayubaji dang shitak ta agizüker aser amanger. Item Tenyartemji Baptist tamangba yimsü tenzükertem aser parnokji Baptist liasü ta asenoki mashir, saka parnoki sayubaji dang shitak aser Laishibaji taküm Tsüngrem O aser tematiba tashi ta amangba yong Khristan masüba tamangba yimsü amanger teloktemi aser khristan ta tenüng agiba Roman Catholic yimsü aser iba nungi razüka aoba tongtipang khristan telok balala aikati Khrista aser Tenyartemi sayuba yimsüji dang shitak ta amanger teküpoklen agüja aliba khristan teloktemji rishikangshi aser mezüngdangtetba temeshipurtem jenti tepseta samatsüogo.

Alima nung arogo otsüji iba mezüngbuba tangatetbalen nungi reprangdangra baptist telok dangji putu balala nung item tenüngtem agi jaa liasü. Item rongnung tongtipang telok kar zülusemer. Montanists (150 A.D.), Novatians (240 A.D.), Donatists (305 A.D.), Paulicians (700A.D.), Albigenses (1022 A.D.), Waldensians (1170 A.D.) aser Ana-baptists telokji Martin Luther-i anir Reformation tenzüktsü anasa lia parnokji alimai meteta aküm. Ana-baptist tetezüji tanaben baptiba telok kechiyong parnoki temang ajak tzü nung rema baptibaji dang laishibai melaba aser yamaji mebaptirtem shirnoki parnok rongnung züngsem kümnü parnok ajak



tanaben tzü nung temang ajunga rema baptirang agizük. Item telok balala indang tali tarokba nung angatetnera J.M. Carroll-i züluba kaket "The Trail of Blood" nungji kanga jangja jangjaa shia angutsü.

Baptist telokji Tasen Lai mapang nung tenzükadok ta asüba tangatetba tali tashi itshia kümdaktsübaji Dr. Vernon C. Lyons-i "Why Baptists are not Protestants" ta züluba kaket nung pai Cardinal Hosius-i ashiba indang zülusemba (Letters Apud Opera, pp.112,113) nungjibo Baptist telokji Protestant Reformation tenzüksü küm 1,200 lia tenzükadokba indang shia lir. Cardinal Hosius-i yamai ashi ta zülua lir. " Tesüiba küm 1,200 (Merijang ka sür noklang ana tsüngda nung Baptist-temji kanga tashi agi reshikangshia nok agi melepdok asü asübo, Roman Catholic anema apusortem (Reformers) ajunga dang nungi parnok kanga teimba nungzütepya lila"

Protestant Reformationji 1517 October 31 nungi tenzük ta alimai agizüker, kechiyong iba anogo nung Martin Luther-i Roman Catholic yimsü anema züluba "Thesis" (mesüra asenoki "Khuli" ta ajatsü akok) 95ji Wittenburg nung Castle Church kishi nung angenloka yutsü. Iba Reformation tenzükba denji asenoki Cardinal Hosius-i züluba arogo otsüji medemdangdangra 310 A.D. tashi nungbo Baptist tamangba yimsüji tenzuka aser jatetatoker liasü ta angatetsü akok.

Aji oda temalen putu balala nung tenüng balala agi jaa aruaka, Tenyartem tamang temzüng agizüka amangba aser parnoki sayuba ama laishibaji melenshitsü makokba taküm Tsüngrem O aser ibaji dang ochi aser shitak aser nisungi yangluba tanga ozüngtem ajak dakji laishiba dak aketba tashi mali ta amangertem temalen zülusema aliba telok balala nungi, temenungratsü ka aser temulung shirangtsü ka, temeshipurtem aser ochi-pukumertem million jentii parnok zü tokshia taküm tenla agütsü aser Baptist tamangba yimsü wazüka yutsü. Iba yongji, ashitsü agi yashiang ama, asenok dangi Khrista osang Tajung aser Baptist tamangba yimsü aru aser tammang aser tesama nungi tekümtet aser tesangwa dangi asenok anitet.

2. TANABUBA TELOK TANGATETBALEN NUNGI REPRANGDANGBA

England limai khristan yimsüji shibai aser kodang bener aru aji shingaia memetet ta arogo otsü nungjagi bushiteter. Saka tar nunger arogo otsü (Christian Traditions) kari ashiba agi tenyar Paul mesüra pa nütsüng kari mezüngbuba England lima nung arua sayutsüngi asü südi ta ashir. England lima nung putu 7 buba tashi nungbo English nunger ajakji tema tereprangtsü agibo Roman Catholic yimsü amangertem kümer liasü ta ashir.

Putu 16 buba (Sixteenth Century) tashi nungbo English nunger khristanem jentipuri par arogo nung temelenshi aser yanglushitsü akangba (demand) aika liasü, kechiyong arogoji teraksa aser pei agitsü indang bilemba (Corruption and Selfishness) agi sünga akümba agi tongmelang Lai tesayubaji sentokatokba mapang ka liasü. Iba tensa nung Germany lima nung Martin Luther-i Roman Catholic yimsü anema sayuba aser Geneva nung John Calvin-i sayuba aser iba den semloka English oshi nung Laishiba tasen meyipzüka neburtem ajaki Tsüngrem Oji züngteta aküm. Metensür iba mapang nungji alima yimten-yimli nung temelenshi (political changes) aika adokba mapang ka liasü anungji item khulitem ajakji ajanga neburtem ajaki pei-pea arogo nungji shilem aginüa aküm. Yamaji putu 16 buba nungji chubatem ishikati arogo nung temelenshi adokdaksütsü merang saka junga takok mongutet.

John Calvin-i sayuba nung ajemdaker Church of England kübok tenüng agi “Puritans” ta sür telok kati Laishibai sayubaji dang shitak aser iba tesayuba amaji dang inyaksüla ta kanga sashia nokdak. Iba sülen ano “Separatists” ta sür telok kati joko Church of England nung matentsü ta nokdak aser 1600 tashi nungbo Church of England nungi sadanga parnok telok ishika aküm aser 1625 tashi nungbo parnok telok aika küma or liasü.

Item Separatists rongnungji tamang tangatetba balala akaba teloktem aika liasü. Item teloktem ajanga nüngja balala jateta, tatishitsü agi Quakers, Presbyterians, Congregationalists, Independents aser Nonconformists ta telok balala kümteta ao ta arogo otsü jagi ashir. Item telok



rongnungji kari Laishiba bushiba ajanga Tamangertem Baptiba (Believer's Baptism) ji benshia aoba ajanga parnokji Baptist ta jateta aküm ta ashir. Baptist telokjia ana kuma lemdanger telok ka dang General Baptist aser ka dang Particular Baptist ta ajar, saka item indangji iba ocet nung mezülusemer.

Baptist telok tamang tamentakdak aser tamangba inyakyimji tanga khristan telok tamang tamentakdak aser inyakyim den tepila tulu lir. Anungji Baptist tamangba yimsü jangjayakji kechi aji Baptist khristanem ajaki metetsü kanga tongtipang ta tangatetba nung iba indang zülusemer.

BAPTIST JANGJAYAK

Baptist Distinctivesji Ao oshi agi Jangjayak ta meyipzüksü akok. Iba jangjayak indang aika rasaa zülutsü akok saka idaki amangbapurtem nem temelatiba jenjang nung tangatetba kar agütsütsü asoshi tongmelang agi asen Baptist Jangjayak indang zülur.

Alima nung khristan ka taküm asoshi tamang aser tanela chiyungtsü agia tamang aser tanela aintsü asoshi arogo ka nung züngsem kümer laishibai melaba ama iba arogo tazüokba kübok shilem agia alitsü nüngdaker. Iba amaji arogo bushidang aikati tenlaki tereprangtsü mesüra arogopurtemi junga jembishinüba mesüra sendong tapu balala aika aliba arogo shima züngsem akümer. Itemjia kanga tongtibandang lir, saka item dang nungi tongtibandangba tanga nüngdakba kar yamai shisemer.

Nai shimba arogo nungji khristan tamang tamentakdakji Laishiba asü masü? Laishibaji dang Tsüngrem O aser tematiba tashi lir. Yisuji tanela temeshii mashisa kümdaktsüba tasüngtet aieri aso, Pa tatem makaba Tsüngrem, meimchir ajak menen yong Pa kangki nung asü, tasüba aser temenen mojing madak takok ngur shia aru, kotaki atu aser tanaben meyipa arutsü. Shirnokisa Pa dak amangdir mesamatsü saka tekümtet angutsü. Itemji Khristar arogo

tongtipang tamendaktak tesayuba tem lir. Aji saka tamangertem telok balalaji tejangja tesayuba balala kar ajanga ka nungi ka lemsaa aser piladakja lir.

Baptist telokji danga khristan telok tang nungi tongtimbang aser tejangja Lai tesayuba kar ajanga jangjayak kümtet kümteta lir. "Baptist" ta asüba jagi iba jangjayakji tali jangjashitsür. Iba Baptist jangjayakji tanü putu nung kanga tongtimbang lir. Tatishitsü agi, tashishitsü maketba aser aitsütsü makokba ochiji lir asü mali mesüra tamangba yimsü ajak nungji ochiji densema ali?

Arogo nungji shiba kibur mesüra shibai ketdang asütsüla? Taochiji kechi ajanga angutsü akok mesüra temeshibaji ozüng amai yanglutsü akok asü masü? Arogo aser alima yimten na komala tesendaktep lir? Yamala mesükba tasüngdangbatem aika lir asünung asen Baptist jangjayakji tanü putu nung balaka kanga tongtimbang lir aser aji arogo nung züngsem ajaki angateta alitsü tongtimbang aser nüngdak lir.

BAPTIST JANGJAYAK METETTSÜJI KECHIBA TONGTIBANG?

1. Baptist jangjayak metetba jagi tejangja Laishiba dak dang amendakba arogo kaji bushitetsü akoker.
2. Kodang arogo kaji "Christian Church", mesüra "Christ Church", mesüra "Community Church" mesüra 'Interdenominational Church", mesüra "Non-denominational Church" ta dang jar lidir idangji iba arogo nungji tamang aser tanela tesayuba nungji langka nungbosa Lai tesayubaji jangja jangjaa mesüi mesüra shitak mesüi tesayuba agütsüba aika alitsü. Item dakji jangjayak maket. Saka kodang Baptist ta jadiri idangji jangja jangjaa Baptist jangjayak nung amendaker tamang aser tanela tesayuba tejangja Laishiba nungi agütsür ta angatetsü.

Baptist teloki iba ama tejangja jangjayak ka koda sür ngutet ta süra, ibai kanga meranga aser kümdanga Lai bushiba ajanga bushitet. Anungji item Baptist tesayuba dangji Laishibai Sayuba Baptist Jangjayak ta ajar. Item tesayubatemji Baptist lokti tentet kati mesüra lenir kari yamai inyakang ta temelaba agütsüba agi masü saka kija Baptist arogotem ajaki item tesayuba nungji



akang akanga azüiter seplasepshi mesüi aser matsüngshii aru, anungji item Lai tesayubatemji Baptist jangjayak aküm.

Baptist telok dak alaka tanga khristan telok karia Baptist jangjayaktemji kar benschir mesüra karibo ajakjia agizüker saka parnok sasa Baptist ta masü saka tanga tenüng agi ajar. Parnok dangji "Baptistic" mesüra "Baptist mesük" ta ajar. Ajisaka ano khristan telok karbo tenüngbo Baptist ta ajar saka parnoki Baptist jangjayak süshia mesüra tongtimbang khristan tamang tamendakdakji mebenshiba teloktema lir. Anungji asenok asoshi Baptist jangjayakji metetsü aser angateta alitsü kanga tongtipang lir.

BAPTIST JANGJAYAK 8

1. Laishiba Tashi or Laishiba Bangdak

Laishibaji Tsüngrem O aser tamangbaren mapa ajak nung aji tematiba aser tatembangba tashi lir, kechiyong Laishibaji tematiba Tsüngrem tashi. Laishibai kechisa shitak ta khuli agütsür aji Baptist teloki shitak ta agizüker. Nisungi süaka mesüra arogo telok kati süaka Laishiba nung kechi shia lir ibaji alema kecha inyaktsü makok. Tamang temzüng süshia mesüra tamang tenangzükba süshia item ajak dakji Laishiba tashibo mali. (*Tim. 3:15-17; 1 Thes. 2: 13; 2 Pet. 1:20,21*)

2. Kija arogo shiaji juri arogo

Kija arogo shiaji juri aser arogo nung tekolak Yisu Khrista kübok dang lir. Meimchir lenisüba tashi ajakji kija arogo shia nungji dang tensema lir. Tetezü kija arogo tema mesüra ajanga or aliba lokti tentet süshia mesüra kija shingaia arogo tamangbaren inyaksangshi kecha nunga tashi amshitsü mesüra teka aitsü makok. Aji oda arogoji juri aser iba nungji pei sasa yimsü asür.

Arogoji juri ta asüba tetezüji asetkong ka ama arogoji tangar den arla yoker shinga dena tesentaktep mali ta mangatetsüla. Baptist arogo ka jagi tamang aser tekülemba inyakyim nung putepa lira telongjem akatsü akok aser tesentaktep akatsü akok. (Associational ties), saka Baptist arogo kaji danga lokti tentet nung züngsem akümtsü makok. (*Kolosi 1:18; 2 Kor.8: 1,5, 19,23*)

3. Tamanger Shia Putir Jenjang

Putir kaji Tsüngrem o nisung na tsüngda nung o tongdar mesüra putepdaktsür ka ta ratetsü akok, shiba nem tamangba yimsü nung sentakba külemküjaba mapatem inyaktsü tashi agüja lir. Tamanger shiaji Tsüngremer putir ka aser temaba putir Yisu Khrista ajanga sarasadem nung asenoki Tsüngrem dangi indang indanga aitsü akok. Tsüngrem o nisung na tsüngda nung tangar o tongdar shinga menügdak. Putir ka ama asenoki Tsüngrem Oji azüngtsü akok, tangar asoshi sarasademtsütsü akok aser Tsüngrem külemtsü akok. Tamanger ajaki sako Tsüngrem dangi aotsü akok. (1 Peter 2: 5,9; J. Adok 5:9,10)

4. Khristai Melaba Mapa Ana

Kija arogo ka jagi temelaba ana inyaktsü akok: (1) Khrista asüba, aremba aser shia aruba nung Pa den ka küma tamangertem tzü nung rema baptiba, aser (2) asen menen asoshi Pa asüba bilemteta Kibuba benjong achiba. (Mat.28:19,20; 1 Kor. 11: 23-32)

5. Khrista dak amangbapur shia pei mulungba yimsü amangtsü temeten (Individual Soul Liberty) Khristan tamangba yimsüren nung kija taküm shiaji pai koba tamangba yimsü shitak ta agizüker iba yimsüji agizüka amangtsü temeten kar. Kija taküm kati molungba anema tashiyim agi tanga yimsü ka amangdaktsütsü makok. Aji saka iba temeten jagi nisung shinga Tsüngrem O nung melaba aser Tsüngrem tsüngdang o bendangba nungi temetenbo magütsür.

6. Tekümtet ngua Baptiba Arogo Züngsem (Saved, Baptized Church Membership)

Kija arogo shia nungji Khrista dak amanga taküm khuli tajung akaba tamanger aser Pa den ka akümba temaitsü tamangertem baptiba agirtem dang züngsem kümdaktsür. Kodang arogo ka nung züngsemtemji tamangertem südir, idangji Khrista den ka küma longjemmer aser züngsem ajungai meranga tanela nung tesünep aser telongjem adokdaktsür. (T. Mapa 2: 41; 1 Kor. 12: 12; II Kor. 6: 14; Efe. 4:3)



7. Arogo nung Menden Ana

- (a) Pastor Menden
- (b) Deacon Menden

Laishiba ajanga arogo nung menden ana dang melaa lir- Pastor menden aser Deacon menden. "Pastor", "elder", "bishop", mesüra "overseer" item tenüngtemji pastor menden nem tenüng balala agütsüba dang lir. Iba menden anaji arogo telong nung dang lir aser ibai tashi tuluba mesüra tilaba ta tangatetbaren nung masü. Pastor mendenji arogo nung tanela lenisüba mapa asoshi aser Deacon mendenji arogo nung ketdangsütsü asoshi lir. (*1 Tim. 3:1-13; T.Mapa 20: 17-38; Filipi 1:1*)

8. Arogo aser Alima Yimten sadanga aliba

Arogo aser alima yimsüsüba bangdak Tsüngremi yanglu, aser Pai anaprong nemji pei pie wadang lemozütsü. Alima yimsüsüba bangdak teinyaktsüji Rom 13: 1-7 tashi nungji shia angutsü aser Arogo teinyaktsüji Matti 28:19 aser 20 nung shia angütsü. Anaji kati ka ramoktsü makok mesüra ana tsüngda nungji tesendaktep (Alliance) akatsü makok. Reshikangshi makaba khristan lima ka nung khristantemi par yimsüsüba bangdakji temeshiba leni mesür aotsü akok (Influence), saka khristan lokti tentet (Denomination) kati mesüra arogo telok kati yimsüsüba bangdakji ramoka mayutsüla.

Kechi agi arogo ka jangjayakji tanga arogotem dang nungi balaka bentet benteta ayur? Baptist arogoji tamangba nung jangjayak bentet benteta aliba agi tangar arogo balala ajak dang nungi ayak balaka ta asenoki nguogo. Baptist arogotemi item jangjayak mesüra shisangren dakji akang akanga sota ayur, kechiyong item jangjayaktem ajakji Laishiba nung jangja jangjaa amendaka lir aser aji putu ajak nung marakzüi aliba ochi aser jangjayak lir.

NAGA LIMAI KHRISTA OSANG TAJUNG ARUBA

Naga limai Khrista Osangtajung arur joko kum 142 junga arudang iba otsü memeteter aika mali. Aji saka iba ocet abensadaksütsü asoshi tongmelang agi tatsüka zülusemer.

Naga limai Khrista Osangtajung arubaji North East Frontier nung Governor General kübok O Tongtar (Agent) aser yimsüsür Major Frances Jenkins-i American Baptist Mission Foreign Society Naga limai jaokba nungi tenzük, (Ao Baptist Arogo Centennial Album 1872-1972, Tapak 3) Naga nungerji tekolak bushia leptept-süngteptba kin aser Khrista Osangtajung aser Kaketshiba (Education) ajanga mesüra parnokji iba teküpok jenjang nungi tanga lima nüburttem mesüka akümtsü makoktsü ta Major Frances Jenkins-i jungjunga angateta liasü. Anungji pai American Baptist Mission Foreign Societyji akokba tashi pai teyari agütsütsü ta nangzüka Naga limai jaok. Iba tajabaji American Baptist Mission Foreign Society-i agizük aser mezüngbuba 1837 nung Rev. Nathan Brown, O.C. Cutter aser Miles Brownson Assam-i arua Sadiya nung mission mapa amenok aser ibaji tesülen Sibsagar-i belener ao.

Miles Brownsoni pa aruli nungi Naga nunger dak temulung agütsü aser Naga nunger yimtem semdanga parnok den metetepa akümtsü merang aser 1840 nung Konyak lima nung Namsang yimtak skol ka tenzüka yangji ali. Ajisaka tia maka pa tashitak kaoa shirangatok aser iba den pa tenu Miss Rhoda Brownson asüba aser kibong nung tanga timtemtem ajanga pa tanaben lenden limai meyipa luadok. Iba sülen 1871 nung Sibsagar-i Rev. E.W. Clark maru tashi Naga nunger rongnung Osangtajung prokba mapa kecha meinyaki liasü.

Pa Sibsagar nung alidang Aortem lenden limai shishilembatsü alur rongnung Dekka Haimong (Molungkimong) yimer Wb. Sübongmeren ajurua pa nungi Aor indang aika angazük. Iba mapang nung Aorji ano British yimli nung maten liasü. Rev. Clark-i Assamese nunger khristan ka tenüng agi Godhula ajungshia Wb. Sübongmeren nungi Ao oshi angazükdaktsü aser talangka melii tenaji Osangtajung sayutsüngitsü asoshi Dekka Haimongi yok. 1872 nungbo tenati Aor telok ka Sibsagari anir alu aser parnok 9 Rev. Clark-i baptitsü. Yimdaki meyipa tur kelen parnoki tenlaki ka asü. Rev. Clark-ia Dekka Haimongji semdanga liasü aser ano Aor 15 tashi baptitsü.



Clark-i Aor rongnung missionary mapa maneni inyaknü, anungji pai mission mapa amenoka inyaktsü asoshi Assam nung Commissioner Colonel Hepinson ajanga India sorkar dang nungi temelaba meshi. Missionaritem Aor-i junga agizükba ngua pa nem iba temelaba agütsü aser Rev. Clark Ao limai 1876 atua mission mapaji tenzüka ao aser talangka meli-i pai khristantem denji longjemer Deka Haimong anasa Molungyimsen ta jar yim tasen ka aküm aser mission mapaji idak nungjagi inyaka tenzük.

1878 nungbo Rev. Clark kinungtsüa arua pa den yariteptsü tenzük aser iba kümjisa nisung 24 baptia arogo züngsem aküm. Iba mapang nungi tenzüka Rev. Clark-i Aor yim dang masü saka temeket kin yimtema semdanga liasü aser ita shia züngsem tasentem baptia liasü. Iba amaji arogoji kanga karaa ain aser 1885-86 tashi nungbo arogo züngsem 79 tashi kümer liasü ta asenoki Ao arogo otsü nungjagi angur.

Iba amaji Rev. E. W. Clark aser pa kinungtsü tenati kanga meranga bendanga agütsür missionary mapaji inyaka aru aser 1894 küm missionary kibong tasen ana arusemba ajanga Mission Station tasen ka Impur nung tenzük aser ibaji Mr. Haggard aser pa kinungtsü tena lenisüba nung yutsü. Iba sülen talangka meli-i Naga lima nung American Baptist Mission Foreign Society mapaji Impur nungi inyaka ao. Iba amaji mulu lima nungi parnok taküm, mapang, rongsen, sempet aser kibong bendanga agütsür tasütsüa metsübui Tsüngrem dak dang yimlar missionarytemi arua asen lima tammang, tetsübu aser mojinger talenba nungi aniteta yutsü. ibayongji Khrista Osangtajung Ao limai arur küm 142 nung asen arogo nung pelatepa aser Tsüngrem tenüng sanga iba küm 75 Jubilee mong amonger. Atangji ibai "Tsüngremer Tesüngmangtsü Temeim" -ji lir. Kibuba tenüng sentsüwangshi süang. Amen.

TSÜNGREMER TESÜNGMANGTSÜ TEMEIM

- P. Talitemjen, IAS (Rtd.)



Tsüngrem temeimji kodanga masatangtetba temeim. Nisung mulungjang sasep tatakzük asadangba dang nungi, ibai tesatempa lir. Ibai tatem makaba temeim. "Ni teti tatem maka temeim agi na meim" Yerimia 31:3

Meimchir asoshi Tsüngrem temeimji sadangsari mali, asenok dak malangba taochi, aria bilem aser putepdaktsüba agi sünga aliba temeim lir. Nisungi temenen tesama nungi alangzükba Tsüngrem temeimji metet, saka ibai rasatsü mesüra nükla agi atongtsü makok- iba temeim ya tesüngmangtsü.

Tsüngremi nisung Pa mesükba nung tebur aser tetsür yanglu, aser Pai parnok moatsü. Pai meimchir shinga mesamadaktsüner. Saka nisungi Teyanglur anema aiben nokdak aser temenen menabayong, nisung aser pa teyanglur yungtsü nung tetsüngda tulu adok. Meimchir aibelenba aser temenen talenba nungi anitettsü Tsüngremi nisung bushia aru. Pa Chir Yisu Khrista ajanga temenen nisung alangzük aser Pa den yimjung yanglua putepdaktsü. " Asenoki Tsüngrem dang meim masü, saka Paiang asenok dang meim aser asen temenen atema tekümtet tenla Pai pei Chir yok; idaki temeim lir" I Yohan 4:10.

Tsüngremi temenen aser temerenshi dang agien masü, saka Pa aser alangzükba purtem tsüngda temeim talentep samar aliba tanaben bener arua yanglushi.

Alemli mapang Tsüngremi nisung den ainkartem ajanga jembi. Mosa ajanga ozüngtemji agütsü. Pai shimtetba kin, Israel nunger sobaliba len aintsü asoshi tetuyubatem agütsü. Bendangertem (Gentiles) asoshi kecha jenjang mali asü. Yihuda nunger tamangba yimsü lenirtemi (Religious Leaders) ozüng kanga metsünga reta benshi.



Saka ozüng nung aketba tongtimbang mapatem tim o bendangba, yimlibilem sayuba aser tamang (Faith) itemi parnoki meinyaki yutsü. Ozüng benshiba nung parnoki yimlibilem taochi aser tai atoktsü asoshi kecha leman melapoktsü. Ozüng nung Yihuda nunger tamangba, sobaliba aser loktiliba taküm ajakji amenloka liasü. Aiben parnok tamangba yimsü, lenirtemi tamangba yimsüji mesü-mesüa tenokdangba agi sünga aliba ka kümdaktsü. Khrista ozüngji sadema kümdaktsü masü, mesüa (narrow) tenokdangba agi sünga aliba nungi ozüngji alangzük "Ni ozüng süshia ainkar o süshia, samatsütsü aru ta tebilem; ni samatsütsü masü, atalokdaktsütsü aru" Mathi 5:17

Ozüng 10 nung nai itemi teinyak ta ashiba (Anitet 20:3-16) nung Yisui shirnoki itemi inyaker parnok temoatsü (Mathi 5:3-11) ta bendenloktsü. Tejenba ozüng nung tembartem dang temeim sayuang ta ashibaji Yisui ozüng tasenba nung tsükchirtem dang temeim sayuang ta ashir.

Yisui aria bilema bendanger (Gentiles) lima nung tesangwa mungui prokshia alirtem asoshi bushir. Parnoki Pa ola angashidang, Pa temeim küboki aitsü. Tsüngremi shimba kin dang sayuba temeimji meimchir ajak dang sayutsü ozüng agütsü. "Ozüng tasen ka ni nenok nem agütsür. Oda nenoki medemer o medemer na meimte pang, ni nenok dang komama meim, yamaji nenoka medemer o medemer na meimte pang. Nenoki medemer o medemer na meimtepra, ajangla iba jagi nenok kü netsüng ta ajaki metettsü" Yohan 13:34-35.

Asenok Khristantemi nisung ajak pei kiyonger ama meimtsü Yisui akanger. Asenoki khristanpurtem ajak alimai reprangtettsüsa meimtsüla. Opang mapu, mangatetep (differences) ajanga asenok nem tesama agüjaka- temeim sayutsüla. Temeimji Yisui khristantem nem agütsüba TEMAITSÜ lir. (Mark of the Christian). Iba temeim agi dang alimai khristan temji shidak, ochi tamangertem ta metettsü aser Tebui Khrista alimai yokba jungkai adoktsü.

"Saka ni nenok dang ashir, nenok tsükchirtem dang meimang, aser shiri nenok rishikangshir, parnok asoshi sarasademjang" Mathi 5:45.

Yisui temeshi temeim nungi adokba koba ariabilem agi Pa taküm bendanga agütsü, shingaia Pa takümji magi, Pa sasa agütsü. Nisungi tembar asoshi pei taküm agütsüba tang tuluba shinga temeim mali. Kangki nung angenloker alimai atalaa, sempaa kangshitang, Yisui Pa tepsetertem atema tatok meshia sarasademtsü. Pa den külemi kangki nung metar nisung tamajung katia Yisu nungi tatok angu. Iba ama tatok agütsüba temeim dang tuluba mali. Nisungi tarongba tenla Tsüngrem nem agütsütsü melen, Yisu kangki nung Pa temeshi zü tenla agütsü. Ya tesüngmangtsü temeim.

Pauli Korint arogo dangi Tsüngremi Yisu ajanga parnok Pa dak putepdaktsü aser teputeptsüba oji sayutsüngitsü parnok nem agütsü ta zülu. Asenok shirnoki iba teputep Tsüngrem nungi nguogo, kangki nung angenlokba Khristaji meimchir nüktang sayua "Tsüngremi yamai meimer" ta metetdaktsütsüla. Asenok ya putepdaktsüba Tsüngrem temeim osangbenertem asütsüla.

Iba Kangki nungji teti takok lir, kecha agia Tsüngrem temeim nungi asenok mepiladaktsütsü. Pa temeim ajanga asenok takoker dang nungia tuluba. Kibubai pa temeim, pai alangzükba aser putepdaktsüba sangdongtsü aser kuli asütsü asenok dang nungi aginer. Pai temeim agi sünga aser mulungsoa aliba temulungjang nungi pa mapa inyaktsü aginür. Tsüngremer temeim aser temeshi wadang nung, alima tenokdangba aser timtem tulu jakdang, tasü tait, bendanga agütsü temeimji temai jungkai adoker. Nisung tanela aser Tsüngremi agütsüba temeim jagi tenokdangtsü ajak madak temabai tutetter.

Nisungi aiben Tsüngremer temeimji pei sendong kübok yuner. Tejen Lai nung Yona otsü ya pei tebilemba aser nükjitong ataloktsü asoshi inyakba otsü tamajungtiba rongnung ka lir. Tsüngremi Yona dang tamajung aser temenen yimti Ninevi nung oa sayutsüngitsü ashi. Yonai mashileni jena ao, pa taküm lendongi ai, saka taochisang Kibubai pa kümzüker tanaben Ninevi jagi yok. Atsüayongba sayutsünger i ao aser Ninevi samatsütsü anogo lirnü dang ta ayimtena ashi, aser pai sangoktsüba ama Ninevi raksatsü repranga ata. Pai sayutsüngiba nung yimlibilem aser teimla mali



asü. Tsüngremi pa dang taochi sayua kümzükba jagi pa mulungjang nung tangar asoshi yimlibilem mi mejangrudaktsü. Pai aginüa atalokdaktsünüba aser Tsüngremi atalokdaktsünübaji kenyongi balala liasü. Yona aser Tsüngrem na tsüngda temulung nung raraba liasü (conflict of wills and purposes). Yonai Ninevi aser neburtem par tsükchirtem samadaktsünü, aser Tsüngrem temulung melenshia taochi sayutsü pai tsübu. Yamaji Ninevi nunger temulung meyipa Tsüngrem nungi yimlibilem meshi nung Tsüngremi mesamatsü. Koba agi Yona kanga jashidaktsü. Tsüngrem osang abener ka shibai yimti ka Tsüngrem dangi meyipdaktsü, Pai sayutsüngiba agi tejang atang nung pa ain adok! Pai par nebur kin meimbaji nisungtem tanela kümzükba aser Tsüngremi mulungba dang nungi temaba ta züngshi. Yonai Tsüngrem dang kechiba pai tamasayongi Ninevi moi Tarshisi jena ao iba atema yamai ashi "Kechiyong na taochi taka aser aria bilemba agi asüngba, ain adoktsü melungi aser yimlibilem nung talubosa aser tamajung nungi nai temulung meyiper ta ni metet" Yona 4:2. Ibai Tesüngrem temeim aser taochi indang kuli tulutiba ka lir.

Nisungi aiben Tsüngrem tesüngmangtsü temeim indang kuli asütsüji jenjang tasak kümdaktsür, tebilemba tenokdangtsü aika aitdaktsür. Iba yagi kü tia, rongsen, menden aser tarutsü tia nung koma kongshitsü ta asüngdanger. Iba yagi meimchir tajangzük aser tajungba kumdaktsütsü asü ta masüngdanger.

Tanü Tsüngremi nisung den obang mapu lira - ibaji nisungi pei asoshi dang bilemer, pei ajangzüktsü dang bilemba, tangar jungdaktsütsü meinyaknüba aser metenlanüba ajanga lir. Tamajung nung alir kar temulung meyipa Tsüngrem den yimjung yanglua putepra, aikati mepelar. Asenoki Tsüngrem temeim lemsateptsü asoshi tangari asen dangi mepishia arudaktsüner. Kibuba dangi temulung meyiptsü asenok mulung nung temeim aser yimlibilem makai dang sangdonger.

Tsüngremer tesüngmangtsü temeimji ajak nung kasa alir, memelenshir, tensa ajak nung asen dak dena alir. *"Alima nung nenok timtem tekangshi kar, saka tasü itang, ni alima kokogo"* Yohan 16:33.

Nisungi temeten magütsüetba tamakok asoshi takok agütsüba Yisui bener aru. Pai asenok tamakoker ama mesentoker, aser pa sentoker dang pai temulung lemtetba temeim agi soter. Nisungi pa sentokaka, Tebu Pa dak lir. Osang tajung Yohan Kaket 17:24-26 nung Yisui sarasadembaji meimchir putu ajak asoshi. Pa asenok den talentepbaji asangsang, aser tatem maka "...anungji kechi temeim agi nai meim, aji parnok dak alitsü, aser ni parnok dak alitsü". Iba tatem maka temeim ya asenok dak teti alir.

Tamanger telok tila kati 1939 küm telungjem tenzükba, Kohima Ao Baptist Arogo ya tanübo Ao Arogo tulutiba rongnung ka küma yinogo. Netsüng aser rongsen küm 75 tashi arudang renlokba ya kanga tulu. Taochisang Kibubai ya tashi asen anir arur, asenok dak malangba temoatsü meküplikja tajung aika asenok dak inyakogo, Pa sentsüwangshi asoshi amshir. Asenok tashi mait aser tamakok aika liaka, Tsüngrem temeim ya agi Pa tesüngmangtsü temeim aser putepdaktsüba osang sangdonga kuli asütsü asenok dang akanger. Asenok dak bendanga agütsüba tanela aser tenla tenlatsü tejangraba akatsüla. Sarasademi mapa meküptoker, saka mapaji sarasadem mesüi meinyaker.

*"Ali ajak agüjaka
Aji sempet tila ka dang
Pa temeim tulu agi
Kü taküm ajak akanger"*





75 JUBILEE SÜLEN KOHIMA AO BAPTIST AROGO

- *Sentisashi*



'Asüng arogo nungbo, tenla ki kima Cari anentsü jaka sadema mekara, tekülemi aruner malitsü.' Iba oren ya tamamangtsü ama, saka ataloklanglang. Alima melenshiba ya mepaidoktettsü. Saka Yisu Khrista kodanga memelenshir. Süra memelenshiba Khristaji melenshia aliba putu den sütepa saka putu yimya ama mesüi koda sayutettsü?

KABA küm 75 Jubilee tenüng nung nüngo kaket azünger ajak dangi Shalom. KABA ya Naga nunger ajak nükrangdong arogo ka lir. Maongka tulu, tajaba tulu, aser teinyaktsü tulu aliba Khristar arogo. Küm 75 tashi Tsüngremer yimlibilem tulu nung alizüng ka tongteter. Tsüngrem dang sentsüwangshi süangma. Süra ano 75 Jubilee sülen KABA mangdang, tengujemtsü, tayongzükba, aser tenungloktsüba kechi asütsü?

Nangri kangshir maneni inyaka aotsü tongtibangtem:

1. KABA nung Tanela Temeshi ain moushia jateta adokba sülen, 1978 küm KABAji 'missionary arogo' asütsü Tsüngrem den nüktzü yima azüngashi. Iba tenangzükba nung tsüngchirsa maneni nokdaktsüla. Mission mapaji arogo nem Yisui nungloktsüba mapa rongnung teyongtsütiba. Jubilee sülen KABA mission item tesem asem nung tali lirumedemshia aotsüla: Pei arogo telung **mission**; Alu tasen chipoka, Khrista dak mamangertem bushia anir aruba **mission**; Lokti yangluba aser ajungketba **mission**. Item mapa asem ya tajetba, tabensaba, aser tuluba nung inyaktettsü atema arogo züngsem shia mission mapa nung, pei sempet yari, shilem agitettsüsa arogoi sabang yutsütsü merangtsüla.

- **Mission**



KABA KÜM 75 JUBILEE

2. KABA-i tematiba jenjang nung anebalubaji 'tanur aser lanur' ya lir. Tila asüdang nungi tamang kimong mesema, tera yanga, sayuteta, indaktsüba mapa yagi kheni malaktsüla. Arogoi item dak Tsüngrem yimli rizünga yutsübaji tesasatsü mali. Kechiyong asüng putu asoshi senti tamang senmangertemji parnok. – **Christian Education & Youth**
3. KABAI 'tebutem' den kanga süoki ia ministry inyaka arur. Ano nangri kangshir khangtepa inyaktsüla. Tebutem tang masü saka 'teburtem' ajak den, talisa lanur tebur aser tebur chanu den, mejetmejeta ministry tasen inoksema inyaktsüla. Shir arogoi tebur dak rangloker ministry inyakdir iba arogoji tashi taitba akümtsü. – **Men's Ministry**

Jubilee sülen KABA teinyaktsü tenet:

1. KABA Jubilee sülen, kodang tenla ki tuluba renemdir, deobar tekülem sentep ya Ao o dak alaka, süki ulushir Nagamese, English, aser meyilungibo Tenyidie nunga tenzüka akatsü mangdang ayutsüla. Deobar tekülemji kesa mapang nung kesa tenla kidang saka takdang balala nung oshi balala agi jembia akatsü takoktsü. Iba tebilembaji nungittsü asoshi kuli ana: Mezüngbuba nung, kin balala den kiba lembua soyapokyaa aoba renloker. Parnokji KABAI anebalua mesütsü lenmang kaji parnok ajaki angatettsüsa tekülem tenzüksübaji alitsü. Tanabuba nung, Kohima ya Naga lima yimtiba. Yangi Naga kin balala dak alaka tanga State aser Country balala nungi arua alir. Parnokji tekülemi onüra, KABAI maongka lapoktsütsüla. Iba yagi memeteti KABA ministry atsüyatsü. – **Worship & Urban Ministry**
2. Khristan kibong nungi asoba agi Khristan akümba. Zünga zükzüker tzü nung tzüsena arogo züngsem akümba. Pei nisung longjemer tenzükbba arogo nung, sobaliba mapa ka ama, khangtepa atenba. Ibalatangatetba aser amangba jenjang nungi, Khrista agizüka tanaben asoba tamanger dangi atsükettsüla. Arogoa, yimya arogo nungi tetsüraba arogo dangi tejak meyiptsüla. Jubilee sülenbo KABA atep nung samaba tanela anir aruba, sentepi marur bushiba, junga amanga alirtem teintet tamanger, meyazütetba tamanger, memesüzüktetba tamanger, ochi phukümer, pei sasa azüoktetba tamanger küma mesüba nung ano khen asentenshitsüla. San anükba jangratsüla saka san 'bushiba aser tua-rua mesüba' nung tuluba jangratsüla. – **Evangelism & Discipleship**

3. Tamanger shiaji tenzüker kaka (every believer is a minister) kümdaktsütsü Jubilee sülen ano kanga merangtsüla. Tenla kidang tekülem nung mamatsü tang jema aliba nungi, yimtong nung, mapa inyakdak, aser lokti balala nung sangwatsüba tamanger. Arogoi taa agütsür ayuba toklang tenzükertemi inyakba repranga alir kisüing masü saka metzü metemer amuoka inyakba tamanger. Mission asoshi tenla agüja sarasademtsüba kisüing masü saka tamanger shiaji missionary kaka ta tangatetba nung pei alidak aser akokertemibo alui oa tenzükdangba tamanger. Arogo nung tenzüker kwi lir ta asüba kisüing masü saka pei kiyonger aser lokti nung temelenshi adokdaktsüba tenzüker kwi lir ta asüba tamanger. Tamanger shiai pei nem agütsüba sempet junga amshia arogo aser lokti tenzüktetba küma yanglutetba arogo asütsü merangtsüla. – **Missional Church**
4. Tsüngrem o kodanga memelenshir saka putubo melenshir. Putu den peta ratetyim aser inyakyim nüngdaker. Au, tebang o agi sayuba mekai arogo melitettsü saka ya kisüingbo masü. Iba jubilee sülen meyilungibo, arogoi television broadcast ministry, internet aser phone ajanga ministry. Iba den technology tasen balala ngutetyonga aobatem amshia ministry inyaktsü pungmang pungmangtsüla. Ano kaketkeno züluba aser adokba agi inyakba ministry nung litsü tuluba mekazüka amangba pur tongtettsü aser indaktsütsüla. Putu den apet, par mapang par oshi aser par chiyongtsü agi mesütsü mangdangtsüla. – **Mass Media Ministry**
5. Arogoji Khrista meyong saka alima nung alinungji alima khuret den pilaa melitet. Jubilee sülen asen lima nung aliba asangsang tebilemtsütem anema arogoi tasü itshir yamai inyaktsüla: Lokti temenen anema, mangu ama metoktsüi, ola tulu adoktsüla; Talenba nung alir aser ajemrepba pur salaa nüji küma yokba mapa nung phukemer tajung asütsüla; Ochi mashi, tashiyim mapa, süpokrem agiba, tiyazü kuli agütsüba, ibala anema arogoi mokorai malitsüla. Sensaker, lajar, timtemer, amitsür, shiranger, aser loktii jentokba purtem dak sakloka meima yaritsüla. Akokba lenmang nungbo alima terenlok asoshi aser lanur yangluba nung arogo temulung lapoka alitsüla. – **Social Justice & Reforms**



6. Lenir yangluba yinsem arogo. Tanü asen tendak arogo nung, yimten yimli nung, aser lokti tentet ajak nung lenisüri anünga lir. Anungji asüng arogo aser lokti anitsü sempet alirtem dak, tang nungi tenük yoka yaritsüla. Yisu tanaben alimai maru tashi arogo ya alitsü. Tanü arogo ya doctrine balala, theology balala, Lai ratetba balala, aser tai tesayubatemi anokshir aser tali anokshitsü. Anungji tang nungi lenir tajung—tenendak, tejangja, techira, bendanga agütsüba, tangatet— adokdaksütsü asoshi tasah balala yanglua arogoi rongsen, shisatsü, aser tangatetba parnok dak rizüngtsüla. Meyilungibo KABA atsüki nung atangba süngjang tajung aseni achitsü. – **Leadership Development**

7. Küm 75 tashi nung KABA toklang tenzüker tetsür ana ordained süa lir. Deacon board nung tetsür shima kanga junga tenzüktagi. Ya takok aser tepelatsü tulu osang lir. Süra centenary atongdang, KABA nung pastoral ministry nung tetsür Associate Pastor kwi alitsü? Mesüra tetsür Pastor inyaka alidang noklangmongji amongtsü koda? Tamakoktsübo masü.

Item onük tenet ya KABAi teinyakdak mapasa lir. Saka alizüng ka atongba shia, meyipa reprangshiba aser teinyakdak asatangba nüngdaker. Aser iba dakji ajemdaker asüng teinyaktsü tejangjaba nung tuyuteter. KABA nükjidong “Tamang, Tenzükba, Mission” dak rangloker, tamanger shiai Yisu temang yanglulokba nung shilem tajungba agitsü ayongzüker.




KABA KÜM 75 JUBILEE



KABA Toklang tenzükertem



KABA Property Committee



KABA Finance Committee



KABA KÜM 75 JUBILEE



KABA Mapangser



Jubilee Nüngo Committee



Jubilee Music Committee



KABA KÜM 75 JUBILEE



Jubilee Programme Committee



Jubilee Planning & Souvenir Committee



Jubilee Transportation Committee



Volunteer & Parking Committee



KABA KÜM 75 JUBILEE



Jubilee Physical Arrangement Committee



Jubilee Video Clipping Committee



KABA Fellowship tenla ki Chowkidartem



KABA KÜM 75 JUBILEE



KABA MMC Tesayurtem



KABA Deacon Board 2014



KABA KÜM 75 JUBILEE



Kohima Ao Baptist Arogo Platinum Jubilee Sentong



1939-2014

Omen:
Tsüngremer Tesüngmangtsü Temeim

Mapang : 11:00 AM
Anogo : 28th December, 2014
Tesentepdak : NBCC Convention Centre

Sentong Tarensen

Lenir : Mr. Sentisashi
Tezülur : 1. Miss Benjungla Yaden
2. Mr. Temjenmongba Sempo

Tekülem aser Tetushi : Praise Fountain
Pianist : Miss Aosenla Longchar
Ken anir : Mr. A. Moa Longchar

1. Jubilee lapokba aser Golden Jubilee
monger nungü shiti
2. How Great is our God : Rev. M. Asangba Longkumer, Pastor
3. Sarasademtsü : Christian Education
4. Salem O : T. T. Y. Chuba
5. Jubilate Deo : ABAM (5 mts)
6. Nüngo kaket saya : Eirene Choir
7. Jubilee tenla bendentsü
Tenla bendendang temeja ken : Rev. T. Sübong, Former Pastor
8. Tenüngsang aser tetushi : Mr. A. Chuba Jamir
9. Halleluya, Tsüngrem tenüng asanger : (1) Mr. L. Tekasashi aser
Mrs. C. Temjen Jamir telok
10. Tsüngrem temeim : (2) Mr. Moanok Tzüdir aser
Miss Moachetla Jamir telok
11. Tsüngrem O : Mrs. Amongla Toy
12. Jubilee lemtet aser melepzüng O : Jubilee Choir
13. Halleluya : Ken No. 54
14. Moatsü sarasadem : Rev. Taku Longkumer
BIM Development Consultant
15. Halleluya : Rev. I. Bendangmeren
Convenor, Planning Committee
16. Moatsü sarasadem : Jubilee Choir
17. Halleluya : Rev. T. Chuba Jamir



KABA KÜM 75 JUBILEE

Tsüngrem Ne Tenüng Asanger

KABA 75 Years Celebration
Theme Song

Temjen Aler, 2014

Joyfully with feeling

1. Ki - bu ba te - me - im te - süng - mang - tsü, ma - sa - dang - tet ta - lu - bo -
2. Ne - bur tem - i Ne te - nüng a - sang - er, o - zü Küm - tet - dak - ba Tsüng -

sa, Pu - tu a - jak nung Ne 'mu lung lem tet - ba ta - tem ma - ka, Ne tsüng -
rem, Ta - ma - ren Chu - ba o - nok - i Ne 'nüng te - ti mo - a - tsür, Sen - tsü -

dang o - nok - i a - pu - dak - er, Ne 'nüng - sangken o - nok - i a - ten - er, Na
wang - shi ko - rang Ne nem sem - tsür, Te - pe - la tu - lu a - gi Na tu - shir, Na

te - me - shi Tsüng - rem, Hal - li - lu - ya, Hal - li lu - ya, o - nok - i Na kü - lem - er.
te - ti Chu - ba - tsü, Hal - li - lu - ya, Hal - li lu - ya, Ne te - nüng a - jung - ket - er.

Temetetsü:

1. KABA Platinum Jubilee mong nung atentsü, Kohima nung alir Aor aser anük-apang ajak pelashishia jaoker.
2. Jubilee ki naro inoktsü Sanctuary Flower Club.
3. Jubilee sentepi arutsü atema fellowship ajak nung bus renema lir, anungji kiyong mapangser den tongtepbangma.
4. Sentep temer 'Jubilee Süngo Ajemba' mapang alitsü.
5. Jubilee temoatsü agizüktsü asoshi, kija aser kibong ajaki sarasadema atadi.

Masadangtet Temeim



KABA KÜM 75 JUBILEE



Photo- mdoulo

Masadangtet Temeim/

KABA **75** YEARS CELEBRATION
Masadangtet Temeim

Published by: JUBILEE PLANNING & SOUVENIR COMMITTEE
on behalf of Kohima Ao Baptist Church
© Kohima Ao Baptist Church

